

San Mateo

Jesube bēts taitanga

(Lc 3.23-38)

¹ Quemēnga imnamna Jesucristbe bēts taitanga: Jesucristna Rey David y Abrahám bentsana entšá inamna.

²⁻⁶ Abraham yojamna Isaacbe taitá; Isaacna Jacobēbe taitá y Jacob, Judá y chabe catšátangbe taitá. Judá, Fares y Zarabe taitá; y chatbe mamá Tamar yojamna;

Fares Esrombe taitá y mua Arambe taitá.

Aram Aminadabēbe taitá; Aminadab Naasonbe taitá y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna; y Obedna Isaíbe taitá.

Isaí Rey Davidbe taitá;

David Salomonbe taitá y muabe mamá yojamna chē Uríasbe shema inamná.

⁷⁻¹¹ Salomón Roboambe taitá;

Roboam Abíasbe taitá y Abíasna Asabe taitá;

Asa Josafatbe taitá;

Josafat Jorambe taitá y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.
 Ezequías Manasesbe taitá;
 Manasés Amonbe taitá
 y Amón Josíasbe taitá.

Josíasna Jeconías y chabe catšátangbe taitá yojamna.

Chë Babilonioca entsanga chë israelitënga tmojánishëche y choca imojanëtámena ora, Josías chë básenga yojánabamna.

12-16 Ya Babilonioca ndutámenënga ora;

Jeconías Salatielbe taitá;
 Salatiel Zorobabelbe taitá.
 Zorobabel Abiudbe taitá;
 Abiud Eliaquimbe taitá
 y Eliaquimna Azorbe taitá.
 Azor Sadoche taitá;
 Sadoe Aquimbe taitá
 y Aquimna Eliudbe taitá.
 Eliud Eleazarbe taitá;
 Eleazar Matanbe taitá
 y Matán Jacobëbe taitá.

Jacob Josebe taitá yojamna y Josena Mariybe boyá.
 María Jesusbe mamá, Jesús chë Bëngbe Bëtsabe
 Uámana Uabuayaná, chë Cristo ca uabainá.

17 Chcasna, Abrahámbentsana Davidbentscoñe bnëtsana canta bëts pamíllanga imojëftsemna. Davídbentsana y chë israelitënga Babilonioca imojanëtamenëntscuana inye bnëtsana canta bëts pamíllanga; y inye bnëtsana canta bëts pamíllanga chë Israeloca entsanga imojanëtamenentsana, chë Cristo tojanonýnántscoñe.

*Jesucristo tojanonýná
 (Lc 2.1-7)*

18 Jesucristo jónynanamna mēntśá tojanopasá: María tbojansbuachená Joséftaca jobouamayama, pero cabá ndoñe cányiñe ibontsiyena ora, tojanopasá Mariyna ngomamaná yojoquéda chë Uámana Espíritbe obenánaca.

19 José, Mariybe boyá, canye nyetsca soyēnguiñe tšabá jamama bośá inamna. Cha ndoñe yontseboše entšangbe delante cha mal jaquédana; chíyecna tojanjuabó nye iytēcana Mariybentšana jtsojuánañana.

20 Y chca yojtsejuabnantscuana, mo otjenayoquécá canye Bēngbe Bētsabe ángel tbojáninye y chana Josébioye tbojaniyana: “José, Davídbentšana entśá, ndoñe matenócochinñenana Maríaftaca jobouamayama, er chë bochántsebmna šešona chë Uámana Espíritbe obenánaca cha bochántsebmna.

21 María canye šešona bochántsebmna y cha Jesús ca cochjuabaye. Chca echantsabaina er cha chabe entšanga chēngbe bacna soyēnguentšana echanjátsebacaye ca” —chë ángel tbojaniyana.

22 Lempe chca tojanochñēngo, cachcá chaotsemnama ntšamo Bēngbe Bētsá chabe juabna oyebuambnayēngbiajana tojanayancá. Chë oyebuambnayá mēntśá tojánayana:

23 Chë cabá boyabása nduabuatmá ngomamaná echanjoquéda

y canye šešona boyabásetema bochántsebmna,

y cha mochanjuabaye Emanuel ca.

(Emanuel endayana “Bēngbe Bētsá bēngaftaca ca”.)

24 José chë otjénayentshana tojanofšená ora, tojanma ntšamo chë Bëngbe Bëtsabe ángel tbojanmandacá y Mariáftaca tojanobouamá.

25 Pero ndoñe cányiñe ibontsaniyena, sinó nñe chë šešonatema tojanonñná orscana. Chë šešonatema tojanonñná orna, José chábioye Jesús ca tbojanabaye.

2

Reyes Magos Jesúsbioye tmojána

1 Herodes judiëngbe rey yojamna ora, canñe pueblo Judeoca, Belén ca uabáinentše Jesús tojanonñná. Chentshana, báseftanga, estrellënga uat-sjëndayënga, magos ca uabáinënga, canñe bëts puebloye Jerusalén ca uabáinoye tmojánashjajna. Chënga tmojánabo shinñe bocanoye luarëngocana.

2 Jerusalenocna chënga, Heródesbioye tmojána y tmojanënoticiá: “¿Ndayentše yojtsemna chë judiëngbe rey jtsemnama tojonñná cha ca? Bëngbe luarëngoca shinñe bocanoye chabe onñnana estrella fsënjinñe y as muentše cha jaboadorama tifjabo ca.”

3 Rey Herodes chca tojanuena ora, corente yojtsenócochinñena, y nñetsca chë Jerusalenentše oyenëngnaca.

4 Chentshana chë rey tojánachembo nñetsca chë judiëngbe bachnangbe amëndayënga y chë judiëngbe ley abuátambayënga jenoyeunayëngama. Mëntšá tojanatjá: —¿Ndayentše chë Bëngbe Bëtsabe Uámana Uabuayaná, chë Cristo ca uabainá, jónñnama ibomna ca?

⁵ Chënga tmojanjuá: —Judeoca, Belén pueblentše ca. Bayté entsemna chë Bëngbe Bëtsabe juabna oyebuambnayá Miqueas mëntšá tojanábema:

⁶ Y tšëngaftanga, Judeoca Belenentše oyenënga, canyë mandayá tšëngaftangbentšana echanjabo. Cha nyetsca chë Judeoca mándayëngbiana más uamaná echántsemna, y atšbe entšanga Israeloca echántsanýena.

Chíyeca tšëngaftangbe pueblo ndoñe nyë batsá uámana pueblo quenátsmëna ca.

⁷ Chora Herodes iytëcana chë maguënga tojánachembo y cuedádoca tojanatjá ntseco ora chë estrella tmojáninýama.

⁸ Herodes chë soyënga yojtsetátšëmbo ora, Belenoye chë maguënga tojanichamó, y mëntšá tojanéyana: “Choye motsajna y tšabá chë šešona šmochjánguango. Chašmojínýena ora, šmochjabëuenaye, as átšnaca chayobená jama chë šešona jadórama ca.”

⁹ Rey Herodes chë soyënga tojánëyanentsana, chë maguënga tmojtsatanoñe. Chora cachiñe tmojtandinýe chë chëngbe luarëngoca tmojáninýe estrella y yojtsanebnatsana chë šešona yojtsemnëntskoñe. Chentša juatsbuacá chë estrella yojójayiye.

¹⁰ Chë maguënga chë estrella tmojáninýe orna, corente oyejuayënga imojtsemna.

¹¹ Chë yebnoye tmojánamashjna ora, chë šešona tmojáninýe chabe mamá Maríaftaca. Chorna, tmojanoshamentšé y chë šešonatema tmojanadorá. Chora chëngbe cajontémënga tmojanëtsécaca y tmojanatštá castellano, incienso y canyë botamana uanguëtše soye, mirra ca uabáiniye.

12 Chentshana, mo canye otjenayoquécá Bëngbe Bëtsá chë maguënga tojanabuayená rey Herodes-biajana ndoñe chamondesshëcuanama. As chënga chentshana inye benachëjana cachëngbe luarëngoye tmojésanshëcuana.

Egiptó luaroye tmojtsanachá

13 Chë maguënga tmojtsatanoñe ora, otjénayoca José canye Bëngbe Bëtsabe ángelbioye tbojáninye y cha mëntsá tbojaniyana: “Motsbaná, chë šešonatema y chabe mamá mesëbiatše y Egiptoye motsachá. Herodes chë šešonatema bochanjánguango jtsóbama, chíyeca choca cochtsoquedañe atše chacbochjábuayenantscuana ca.”

14 As José tojantsbaná, chë šešonatema y chabe mamá tojesanëbiatše y ibeta Egiptó benache tojëftsanbocna.

15 Y choca imojtsanomñe Herodes tojanóbanëntscuana. Chca tojanopasá, cachcá chaotsemnana ntšamo Bëngbe Bëtsá chabe juabna oyebuambnayabiajana tojanayancá. Chë oyebuambnayá mëntsá tojánayana: “Egiptocana atšbe uaquiñá sënjanchembo ca.”

Herodes tojanmandá basetémënga jtsëbáyama

16 Chë maguënga tmojtsaningñema Herodes tojántatšëmbona ora, puerte tbojánetna, y tojanmandá lempe jtsëbáyama base boyabásetemënga uta uata bomnënga y cabá uta uata ndbomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninýama.

17 Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

18 Ramá ca uabaina pueblentše canye oyebuambnayanana tmojanuena, ngménaca ošachiyana y becá tsetšanánaca oyebuambnayanana.

Raquel yojamna chabe básengbiama ošachiyiñe, pero ndoñe yontseboše chamuatebiajuama, chabe básenga ya obanënga causa ca –cha tojanábema.

19 José cabá Egiptoca yojtsomñe ora, Herodes tojanóbana. Chentšana, otjénayoca José canye Bëngbe Bëtsabe ángelbioye tbojáninye y cha mëntsá tbojanianana:

20 “Motsbaná, chë šešonatema y chabe mamá mesëbiatše y Israeloye cochtá. Chë šešonatema jóbama bošënga ya obanënga montsemna ca.”

21 As José tojantsbaná y chë šešonatema y chabe mamá Israel luaroye tojtésanëbiatše.

22 Arquelao Judeoca yojanmánda chabe taitá Heródesbe cuentiñe, y José chca tojántatsëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Josena Galilea ca uabaina luaroye tojána.

23 Choye tojánashjango ora, José tojána canye pueblo Nazaret ca uabáinoye chentše joyénanama. Chca tojanochnëngo cachcá chaotsemnama ntšamo chë Bëngbe Bëtsabe juabna oyebuambnayënga tmojanayanacá. Chënga tmojánayana: “Nazaretocá ca Jesús mochantsábobaina ca.”

3

*Juan chë Ubayaná entsanga yojanabuayiyná
(Mc 1.1-8; Lc 3.1-9, 15-17; Jn 1.19-28)*

¹ Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama.

² Mëntsá cha yojanëtsëtsnaye: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

³ Juan yojamna canya ndabiama chë Bëngbe Bëtsabe juabna oyebuambnayá Isaías mëntsá tojánayana:

Entsanga ndoyena luaroca canya enduáyebuache:
“Bëngbe Utabná echanjabo ca;

mo nda canye benache tojtseprontacá canye
uámana entšá jashjanguama,

tšëngaftángnaca cachcá, Bëngbe Utabná
jabama ainaniñe tšabe juabnéngaca
šmochtseprontana ca” –cha tojánayana.

⁴ Juanbe entsayá inauapormana camellbe stjënasheca y bobache yojanasnana. Cha inasaye chapulinatémënga y tjoca tjouangbe méloye.

⁵ Jerusalemoca entsanga, nyetsca Judea luarentša entsanga y chë Jordán ca uabaina béjaye béconana oyenënga imojánbocana Juan joyeunayama.

⁶ Bëngbe Bëtsábioye chëngbe bacna soyëngama jaimpáda chentšana, Juan chë Jordán béjajiñe chënga yojanëbáyana.

7 Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanéyana: “¡Mëtšcuaye entsanga! ¿Nda tcmënjáuyana chë echanjóshjango uabouana castigüentsana šmochjotsbocá cá?

8 Bëngbe Bëtsábeñe ndegombre ošbuáchiyënga šmochtsemna, as chca chaotsinýna chë bacna soyënga amana tšëngaftanga ndegombre šmojsajbanama.

9 Y ndoñe šmattsejuabnaye cach tšëngaftangbiana jayanama: ‘Abrahábentsana entsanga fsëndmëna cá’. Er atše šcuayana, Bëngbe Bëtsá quem ndëtšbéngacnaca Abrahábentsana entsanga nanjábiana.

10 Chë tatšná ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tontseshajo, jtseshatëtšana y iñoye jtsatmetšana. Tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

11 “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiana más obenana bomná comna, y atše merecido taitatobuajoñe ni mo chabe shecochëtjonëshe jtsámbañama. Chë chabe benache aíñe chamojtishachëngbiana Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháumashënguama. Pero chë benache ndoñe chamontishachëngbiamna, Bëngbe

Bëtsá echanjama chë echanjabábeyeca, corente castigánënga chamotsemnama, mo iñeshequëcá.

¹² Canÿe entsá chabe mëtstá cucuatshiñe jiyëbana, chabe trigo jtsóbobemana y chë ndoserverna shácuanënga jtsejashtsëtsana. Chabe trigo chë grano uaquëcjnaye tsañe jtsabuájuaana, y chë ndoserverna shácuanëngna iñoye jtsatmetšana. Cachcá, chë atšbe ústonoye echanjabana, chë tšabe entsanga echanjúbuaja, y chë bacna entsangna canÿe iñeshiñe echantsacastígaye, y chë iñe ndocna te queochátsfsana ca” —cha tojanëyana.

Juan, Jesúsbioye tbojanabaye
(Mc 1.9-11; Lc 3.21-22)

¹³ As Jesús, Galileocana tojána Jordán béjayoye, Juan yojtsemnoye, cha chabuábayama.

¹⁴ Pero Juan ndoñe yontseboše Jesús juabáyama, y mëntsá tbojaniyana: —Atše šontsemna aca chašcuabayey, y ¿más atše aca cbochjuabayey ca?

¹⁵ Chora Jesús tbojanjuá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.

As Juan vojouena Jesús juabáyama.

¹⁶ Jesús ya uabainá yojtsemna ora, chë buyeshoicana tojtanshëbëbocna. Chorna Jesús tshanánoye yojontješiye y tojáninÿe chë celoca atëfjniñe y chë Uámana Espíritu mo canÿe palomatemcá chábioye yojtsastjajuana.

¹⁷ Chora celocana Bëngbe Bëtsá mëntsá tojánayana: “Mua atšbe bonshana uaquiñá endmëna. Chabiyama corente sëntsoyejuá ca.”

4

Jesús tojanobená Satanás jayěňjanama

(Mc 1.12-13; Lc 4.1-13)

¹ Chentsana chë Uámana Espíritu entsanga ndoyena luaroye Jesús tbojanánatse, as Satanás chauábama cha jisháchichiyama.

² Chentše canta bnětsana te y canta bnětsana ibeta ntjascá tbojanjétana; chíyeca chora tbojaneshěntsena.

³ As Satanás tbojanobobeconá y tbojanियana: — Aca ndegombre Běngbe Bětsabe Uaquiñá tcomněse, momandá quem ndětšbenga tanděse chaobiama ca.

⁴ Pero Jesús tbojanjuá: —Běngbe Bětsabe uabemana palabrenguiñe měntšá endayana: “Entšá n̄ye tanděseca ndoñe vida ntsebomnana, sinó entšá endobena jtsiyenana lempe ntšamo Běngbe Bětsá tojayancá tbojtseyeunaněse ca.”

⁵ Chentsana Satanás, Jerusalén, chë uámana běts pueblo ca uabáinoye Jesús tbojanánatse, y chë Běngbe Bětsabe běts yebnentše chë más tsbanánoca tbojanatsá.

⁶ Chentše Satanás měntšá tbojanियana: —Aca ndegombre Běngbe Bětsabe Uaquiñá tcomněse, muentšana fshantsoye montsěnja, er Běngbe Bětsabe uabemana palabrenguiñe endayana: Běngbe Bětsá chabe angelěnga echanjichamuá, chacmotsin̄yena.

Chěnga buacuatšěngaca cmochanjishache, shecutše ndětšbeñe ndocá chacondomama ca — cha tbojanियana.

⁷ Chora Jesús tbojanjuá: —Cach Běngbe Bětsabe uabemana palabrenguiñe měntšá endayana:

“Ndoñe matsbošana acbe Bëtsá chë Utabná bacna soyëngama jacochënguama ca.”

⁸ Cabana, Satanás tbojanánatse canye bëts tjoye y betesco nÿetsca quem luarentša amëndayëngbenache y chentša nÿetsca uámana soyënga Jesúsbioye tbojaninÿinÿé.

⁹ As Satanás tbojaniana: —Aca chacojoshëntsamentšé y chašcojadorase, lempe chë soyënga cchochjatštaye ca.

¹⁰ Y Jesús tbojanjuá: —¡Satanás, átsbentsana mojuaná! Bëngbe Bëtsabe uabemana palabrënguiñe mëntšá endayana: “Bëngbe Bëtsá cochtsadorana y nÿe cha cochtseservenena ca.”

¹¹ As Satanás cachcá tbojanonÿá. Cachora Bëngbe Bëtsábiocana angelotëmënga tmojánabo Jesús jtseservénama.

Jesús tojanontsé Galileoca chabe trabajo jamana

(Mc 1.14-15; Lc 4.14-15)

¹² Juan chë Ubayaná cárceloye tmojanëtámiamama Jesús tojanuena ora, Galilea luaroye cha tojtaná.

¹³ Pero ndoñe tonjanoquedá Nazaret pueblentše, sinó Capernaumoca, uafjajónaye tsachañe; choye tojána joyéanama, chë uámana bëts taitata Zabulón y Neftalibe luariñe.

¹⁴ Chca tojanochnëngo, cachcá chaotsemnana ntšamo chë Bëngbe Bëtsabe juabna oyebuambnayá Isaías tojanayancá. Isaías tojánayana:

¹⁵ Zabulón y Neftalibe luare, Jordán béjaye chenguánoica, uafjajónaye tsachañe; Galilea luariñe, ndoñe judío entšanga oyenentše.

16 Chë mo ibetiñe cuaftsiyencá imojoyena entšanga, Bëngbe Bëtsabe soyënga nduabuatma causa, tmojinÿe canÿa entšangbe juabnënga binÿnayá.

Chë chëngbe juabnënga binÿnayá entsebuashinÿinÿana chë Bëngbe Bëtsábioye nduabuatmëngbiama, y chë causa chabiamama imomna mo obanëngcá, ndoñe binÿniñe jtsiyenëse ca –cha tojanábema.

17 Cach orscana Jesús tojanontsé entšanga jábuayenama: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná ca.”

Jesús tojánachembo canta boyabásenga beonga ashebuánayënga cha chamuastama
(Mc 1.16-20; Lc 5.1-11)

18 Canÿe te, Jesús chë Galilea uafjajónaye tsachajana yojtsaye y ndeolpe uta boyabásata tojanÿe: canÿa yojamna Simón, chë Pedro cánaca uabainá, y chabe uabentsá Andrés. Chatna atarraiëshangá ibnetsashbuëtsetšañe, er beonga ashebuánayata ibnamna.

19 Jesús tojanëyana: “Atšeftaca mabata; atše cbochanjábiama Bëngbe Bëtsabiamama entšanga anguayata, y morscana nÿe beonga ashebuánayata ya ndoñe quešochátsmëna ca.”

20 Cachora chatbe atarraiëshangá cachcá tbojésanaboshjuana y Jesús tmojanasto.

21 Y más chcoye, Jesús inÿe uta catšátata tojánanÿe: Santiago y Juan, chë Zebedeobe

uaquiñata. Chata ibojtsomñe canye barquëshañe, chatbe taitáftaca, chëngbe atarraïëshangá atapórmayíñe. Jesús tojánachembo,

²² y cachora chë barquëshá tbojésanaboshjona, chë taitá cachentše imojéseboshjona y Jesús tmojanasto.

Jesús ba entsanga yojanabuatambá y yojánashnaye
(Lc 6.17-19)

²³ Jesús nyets Galilea luarëjana yojánana, chentše judiëngbe enefjuana yebnënguenache abuatambaye. Chë tšabe noticiënga Bëngbe Bëtsabe amëndayama entsanga yojanabuayiná y nyetsca šocanëngama y tsetšanëngama yojánashnaye.

²⁴ Nyets Siria luarëjana entsanga cha imojtsebáyana. As entsanga nyetsca šocana bomnënga Jesúsbioye imojtsënachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nyetscanga yojánashnaye.

²⁵ Mallajta entsanga Galileocana, Decápolis luarocana, Jerusalenocana, Judeocana y chë Jordán béjaye chenguanocana Jesús imojústona.

5

Ndayá Jesús tjoca tojanabuatambá

¹ Jesús chë mallajta entsanga tojánanyë ora, bat-sjoye tojántsjua y tojanótbema. Chabe ústonënga tmojanobobeconá y

² Jesús tojanontsé mëntšá jabuatambana:

*Ndëmuanyënga imomna chë ndegombre
oyejuayana bomnënga
(Lc 6.20-23)*

³ “Puerte oyejuayënga mochántsemna chë Bëngbe Bëtsabe soyënga tša imuajaboto ca juabnayënga. Chca entsanga mochántsemna chë Bëngbe Bëtsabe amëndayoca mochtsiyenënga.

⁴ “Puerte oyejuayënga mochántsemna chë mondbétsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

⁵ “Puerte oyejuayënga mochántsemna chë uámanënga ndoñe mondbétsenobiamnayënga, er chënga mo chëngbe otocana soycá quem luare mochanjójyëngacñe.

⁶ “Puerte oyejuayënga mochántsemna chë nyetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nyetsca soyënguiñe tšabá jamama bošënga mochanjobenaye jëftsinyëana lempe ntšamo tmojtsebošcá.

⁷ “Puerte oyejuayënga mochántsemna chë ínÿengbiana ongmiayënga, er Bëngbe Bëtsá chëngbiana bochanjóngmia.

⁸ “Puerte oyejuayënga mochántsemna chë nÿe tšabe juabnënga ainaniñe bomnënga; chënga Bëngbe Bëtsá mochanjinÿe.

⁹ “Puerte oyejuayënga mochántsemna chë nyetscanga natjëmbana chamotsiyenama amënga, er chënga Bëngbe Bëtsabe básënga ca mochantsabaina.

¹⁰ “Puerte oyejuayënga mochántsemna chë ínÿënga tmojama chamotsesufrínënga, ntšamo

Bëngbe Bëtsá yobošcá bétsamama; chca entšanga mochántsemna chë Bëngbe Bëtsabe amëndayoca mochtsiyenënga.

11 “Puerte oyejuayënga tšëngaftanga šmochtsemna, entšanga chacmojoyáanguango y chacmojtsécamena ora y nýetscna soyëngaca chacmojtsëbuayatsenaye ora, atšbe ústonënga bétsemnana.

12 Móyejuanga, puerte móyejuanga, tšëngaftanga celoca becá šmochanjóyëngacñe. Er ntšamo entšanga tšëngaftanga cmëcamena, cachcá chë Bëngbe Bëtsabe juabna oyebuambnayëngbioye, chë tšëngaftangbe natsana monjaniyenëngbioye entšanga monjanëcamena ca” —Jesús tojánayana.

Ošbuáchiyënga jtsemnana mo tamocá y binýnayënga quem luarentša entsangbiana

(Mc 9.50; Lc 14.34-35)

13 “Tšëngaftanga, quem luarentša entšanga jtsëjabuáchanëse šmojtsiyena, Bëngbe Bëtsabe soyënga chamotsetatšëmbuama, as chëngbiana šmochántsemna mo chë mëntšena ndoñe chaondónbemama tcojatboto tamocá. Pero chë tamó fténana tojtsóbemëse, ndoñe ntsopodénana tempcá sanana cachiñe jtëtsmënana. Chca, ya tondayama ntsoservénana; chíyeca chë tamó tsáshenoye jtsëtšenana y entšanga jtsebotájayana.

14 “Tšëngaftanga, ntšamo tšabá yomncá šmojtsiyenëse, as quem luarentša entsangbiana šmochántsemna mo chë ibetiñe tojtsebínýna soycá. Canýe bëts pueblo batsjo juatsbuañe tomnëse, ndoñe ntsopodénana iytëmencá jtsemnana.

15 Canye uajuinyanésha tcojuajuinýena ora, ndoñe cajonéshe tajsoye jtsabuájuama, sinó tsbanánoca juajájuama, chca, nyetsca entšanga chë yebnentše tmojtsemnëngbiamana chaotsebínýnama.

16 Cachcá tšëngaftanga, entšangbe delante mo binýnayëngcá šmochtsemna, as chënga tšëngaftanga tšabe soyënga šmuamama chamuinýama, y chca, chënga chamuinýanyé chë Taitá, Bëngbe Bëtsá celoca endmëná, corente uamaná y obená bëtsemnama ca” —Jesús tojánayana.

Chë Moisesbe leyama Jesús tojanabuatambá

17 “Ndoñe šmattsejuabnaye, ntšamo Moisesbe leyíñe iuayancá y chë Bëngbe Bëtsabe juabna oyebuambnayënga tmojanayancá jabétsepochochama atše tijabo ca. Atše ndoñe chiyátabo chë soyënga jabétsepochochama, sinó jabábuayenama ndayá chë soyënga ndegombre bétsayanama.

18 Ndegombre šcuayana: Celoca y quem luare chaojftsemnëntscuana, ndocná queochatobenaye ni canye punto, ni canye letra chë leyënguentsana jtsejuánana, lempe ntšamo jochnënguama yomncá chaojtsemnëntscuana.

19 Chíyeca, nda nýe mo canye mando chë leyënguñe ndoñe tonjoyeuná cha, masque nýe base soye chë mando tojtsemna, y chë ínýenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuanýënga tmojtsama ntšamo Bëngbe Bëtsá tojamëndacá y chë ínýenga cachcá chamotsamama tmojtsabuátambase,

chënga Bëngbe Bëtsabe amëndayoca uámanënga mochántsemna.

²⁰ Chë soyëngamna mëntšá šcuayana: Tšëngaftanga chë ley abuátambayënga y fariseúngbioye ndoñe šmontsayënjanase, jtsamama ntšamo Bëngbe Bëtsá tcmojamëndacá, ndocna te Bëngbe Bëtsabe amëndayoye quešmochátamashjna.

Ndayá chë ínÿengaftaca tbojetnama Jesús tojanabuatambá

²¹ “Tšëngaftanga šmojouena ntšamo Bëngbe Bëtsá tšëngaftangbe bëts taitanga tojanamëndacá: ‘Ndoñe catjôba ca. Chca ochjajnayá bontsemna jobuambayana chë entsangbiamama tšabá o ndoñe tšabá tmonjamama endbayanabe delante, ndáyeca chca ca.’

²² Pero atše šcuayana, nda cachabe catšátaftaca tbojetna, chánaca bontsemna jobuambayana chë entsangbiamama tšabá o ndoñe tšabá tmonjamama endbayanabe delante, ndáyeca chca ca. Nda cachabe catšátbioye puerte tbojtsáboyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda cachabe catšatbiamama opjema ca tojayana, ntšamo cha bétsamama, cha bontsemna chë infiernoca iñeshoye jama.

²³ “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catšata ácaftaca etonaná yojtsemna ca,

²⁴ as chë tcojiyëbo soye chë altarentša natsanoica cochjéseboshjona, cochtá y acbe catšátaftaca cochtenoyántsia. Chentšana cocayé

altaroye cochjá y chë tcojuamba sóyeca Bëngbe Bëtsá cochjëtschuaye.

²⁵ “Nderado nda tcmojademanda y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšiñe cmochanjáboshjona y chënga cárceloye cmochanjutame.

²⁶ Ndegombre cbëyana: Chentšana ndoñe que-cochtëtsbocna lempe candesopagantscuana ca” — Jesús tojánayana.

Chë boyá o shémbioye ínÿaftaca íngñayama Jesús tojanabatambá

²⁷ “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbioye ínÿaftaca ndoñe catjaíngña.’

²⁸ Pero atše cbëyana: Nderado canÿe boy-abása ndëmuanÿe shembásabioye tbojinÿe y toja-juabó ‘malaye cha ca’, chë boyabása chca tojajua-bose, ainanoca ya chë inÿe shembásaftaca cachabe shémbioye tbojtseingñé.

²⁹ “Chíyeca, nderado acbe catšbioica bomínÿeca bacna soye tcojinÿe y cachca soye tcojamëse, más tšabá nántsemna chë bominÿe cochtsenobuch-jatsëca y cochtsëtšena. Nÿets cuerpo jtsebomnana y lémpeca infernoye jama chacmotsëtšenamna, acbiama más tšabá nántsemna nÿe canÿe soye acbe cuerpentšana chacoperdé.

³⁰ Nderado acbe catšbioica cucuatšeca bacna soye tcojamëse, más tšabá nántsemna chë cucuatše cochtsenástjango y cochtsëtšena. Nÿets

cuerpo jtsebomnana y lémpeca infiernoye chacmotsétsenamna, acbiamá más tšabá nántsemna nýe canýe soye acbe cuerpentšana chacoperdé ca” —Jesús tojánayana.

Chë bouamnata enëtsanama Jesús tojanabu-atambá

(Mt 19.9; Mc 10.11-12; Lc 16.18)

³¹ “Mëntšánaca leyiñe enduábemana: ‘Ndëmuanýe boyá chabe shémaftaca tbojtsenëtsena, chë boyá bontsemna chabe shema canýe tsbuanácha juiyiyana, ndayéchañe chaotsayana cha ya ndoñe chabe shema yontsemna ca.’

³² Pero atše cbéyana: Nda chabe shémaftaca tbojtsenëtsena y chca tojopasá ndoñe chë shema ínÿaftaca tbontseingñé causa, as chë boyá jt-samana cha chabotseingñema, chë shema ínÿaftaca tojtóbouamase. Y nda chë útsena shémaftaca tojto-bouamá, chana canýe uabuatmá jtsebomnana, y chca, chë tsëm boyánaca canýe bacna soye jamana ca” —Jesús tojánayana.

Chë entsanga júrayama Jesús tojanabuatambá

³³ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado tcojayana: De Dios chë soye chanjama ca; ojal chë soye ndoñe catjama ca.’

³⁴ Pero atše cbéyana: Tondayama šmattsejúraye; ni celocama, er choca Bëngbe Bëtsabe tbemaniñe endmëna.

³⁵ Ni quem luarama, er Bëngbe Bëtsabiamá mo tšenëtemcá endmëna, chiñe chabe shecuatšënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo.

36 Ni tšëngaftangbe bestšašama cach ndoñe, er tšëngaftanga ndoñe quešmátobena ni mo canye stjēnashe ftsenguēshe o fjantsēshe jabemana.

37 Tšëngaftanga aíñe ca jayanama šmojtsebošese, nýe aíñe ca šmochjayana, y ndoñe casna nýe ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

*Chë entsanga mondbátenachnēnguama Jesús tojanabuatambá
(Lc 6.29-30)*

38 “Tšëngaftanga šmojouena ntšamo tšëngaftangbe bēts taitángbioye tmojanēyancá: ‘Nderado nda tcmojtsebuchjatsēca, ácnaca derecho contsebomna canýebé cha jētsbuchjátsēcama ca; y nderado nda canýe juatsaše tcmojtsásiye, ácnaca derecho contsebomna cánýēše cha jtašiyama ca.’

39 Pero atše cbēyana: Ndoñe matsbošana chë ndayánaca tcmojaborlábioye jtachnēnguama; chamna, ndánaca catšbioica tcmojajueb-jantšetase, cochjomiye chë ínýoica cachcá chacmomama.

40 Nderado nda tcmojademandá y tojtseboše acbe shabuanguañjua jtsabocñama, cha molesenciá acbe quēfsaíyanaca chauetsácñama.

41 Nderado nda tcmojuasmá y tcmojamandá bnētsana cuadroca juyambama, inýe bnētsana cuadro cochjuyamba.

42 Nda ndaye soye tcmojotjañēse, cochjatštaye; y nda ndaye soye tcmojuatjase, cha ndoñe stētsoye catjaquéda ca” —Jesús tojánayana.

*Chë uayayëngbiama bonshánana jtsebomnana
(Lc 6.27-28, 32-36)*

⁴³ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Acbe amigo cochtsebobonshana y acbe uayayá cochtsaboyënja ca.’

⁴⁴ Pero atše cbëyana: Tšëngaftangbe uayayënga šmochtsababuánjëshana, y chë cmëcamenëngbiama Bëngbe Bëtsá šmochtseimpadana.

⁴⁵ Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbétsama tšabe y bacna entsángbeñe chabe shinÿe chaotsebinÿnayama, y endbétsama chë nÿetsca soyënguiñe tšabá jamama bošënga y ndoñe chca entsángbeñe chauaftema.

⁴⁶ Tšëngaftanga nÿe chë tšëngaftanga tcmo-jtsababuánjëshanënga šmojtsababuánjëshanëse, ¿Bëngbe Bëtsábiocana ndayá šmochjuacaná? Romocama crocénana entsángbioye atjanayëgnaca chca monduamana.

⁴⁷ Y nÿe chë amiguëngbioye šmojtsacheuanase, ¿ndaye bëts soye šmojtsama? Chë ndoñe judiëgnaca chca mondbétsama.

⁴⁸ Tšëngaftangbe Taitá, Bëngbe Bëtsá celoca endmëná, nÿetsca tšabe soyënga bomná y amá endmëna. Tšëngaftángnaca cachcá šmochtsemna ca” –Jesús tojánayana.

6

*Jesús tojanabuatambá ntšamo tšabe soyënga
ínÿengbiama jamana*

1 “Cuedado šmochtsebomna ndoñe ntsamama entsángbeñe tšëngaftangbe tšabe soyënga, nÿe chënga chca chamuinÿama. Chca šmojamëse, tšëngaftangbe Taitá, Bëngbe Bëtsá, celoca endméná ndocna uacanana soye quecmochtétatsataye.

2 “Chcasna, nderado nda caridá tcojábemëse, chca ndoñe šmatjama chë ntšamo šmojtsamama nÿetscanga chamotsetatsëmbuama, mo canÿe trompetéfjua cuaftsajatëtancá, chë caridá šmojábemama chaotsótatsëmbuama; chca monduamana chë bacna entsanga chë ntšamo ndegombre tmojuabnacá ndinÿinÿnayënga, chë judiëngbe enefjuana yebnënguenache y tsáshenañe. Ndegombre cbëyana, chë chca amënga ya chëngbe uacanana soye tmojóyëngacñe, ntšamo chënga tmojamama entsanga tšabá chëngbiamama tmojtsoyebuambná ora.

3 Chcasna, nda caridá tcojábema ora, ndocná más chaondétsetatsëmbo, mo chë uañicuayoica cucuatše ndoñe queondbatstatsëmbcá ndayá chë catšbioica cucuatše tojtsamama,

4 chca, acbe caridá iytëcana chaotsemnana. As, tšëngaftangbe Taitá, nda bominÿe endbétsequëcjnaye chë iytëmencá tcojtsama soye, acbe uacanana soye cmochántatštaye ca” —Jesús tojánayana.

Jesús tojanabuatambá ntšamo Bëngbe Bëtsáftaca jencuéntana

(Lc 11.2-4)

5 “Bëngbe Bëtsáftaca šmojtsencuénta ora, ndoñe šmattsama chë bacna entsanga ntšamo ndegombre tmojuabnacá ndinÿinÿnayëngcá.

Chënga corente jtsogusetánana chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuéntayana, chca, nÿe entsanga chë soye chamuinÿama. Ndegombre šcuayana: chënga nÿe morscama ya montsábouacanana, chënga tšabá imojtsama ca entsanga tmojayana ora.

⁶ Pero aca Bëngbe Bëtsáftaca jencuéntama orna, acbe tsoye cochtamáshëngo, bëshása cochtatame y cháftaca cochjencuénta. Chánaca chë iytëmenentše ácaftaca echántsemna. Bëngbe Taitá lempe bominÿe endetsequëcñá, masque cánÿenga šmojtsemna ora šmojtsama soyëgnaca. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatštaye.

⁷ “Bëngbe Bëtsáftaca šmojtsencuénta ora, ndoñe nÿe cachcá ndoservena palabrënga ba soye šmattsichamo. Chca mondbëtsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámësna, Bëngbe Bëtsá chënga más yochjóyaunaye ca.

⁸ Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtsëjabotcá.

⁹ Chamna tšëngaftanga mëntšá cmontsétocana Bëngbe Bëtsáftaca jencuéntana:
Bëngbe Taitá, celoca icotsomñe.
Acbe uabaina chë más uámana uabainana chauesomñe.

¹⁰ Acbe amëndayana chaóshjango.
Celoca yojtsemna ntšamo icobošcá;
quem luariñnaca cachcá chaotsemna.

¹¹ Mënté šmiyatšatá cada te šnetsëjaboto tandëse.

12 Bacna soyënga bënga fsënjama:
šmotsaperdónaye;
cachcá ntšamo chë bëngbiana bacna soyënga
amënga fsëndbetsaperdonaycá.

13 Bacna soyënga jamama šojocochëngo ora,
šcochjajuache chca ndenobuíyama.
Nÿetsca bacna soyënguentsana šmatsebacaye.

14 “Chë tšëngaftangbiana bacna soyënga amënga
šmojtsaperdónasna, Bëngbe Taitá chë celoca
endëtsomñá, tšëngaftanga cmochanjáperdonaye.

15 Pero chë tšëngaftangbiana bacna soyënga
amënga ndoñe šmontsaperdónasna, Bëngbe Taitá
cachcá, tšëngaftanga ndoñe quecmochátaperdonaye
ca” —Jesús tojánayana.

*Chë Bëngbe Bëtsáftaca jencuéntama tondaye nt-
jascá*

16 “Y nderado tšëngaftanga inÿe ora tondaye nt-
jascá šmojtsemna Bëngbe Bëtsáftaca jencuéntama,
juebëngménënga ndoñe šmattsemna, ntšamo chë
bacna entšanga chë ndegombre tmojuabnacá nd-
inÿinÿnayënga mondbetsamcá, as chca, chënga
imojtsayúnama entšanga chamuinÿama. Nde-
gombre šcuayana, chëngbe uacanana soye ya
tmojóyëngacñe, chënga tmojayunáyeca entšanga
tšabá chëngbiana tmojtsoyebuambná ora.

17 Aca nderado tcojtsayúna ora, cochtsojueb-
jabebiye y aceitíyeca botamana cochtenochquëca,

18 as chca, entšanga ndoñe cha-
mondëtsetatsëmbo aca tondaye ntjascá
cojtsemnama. Nÿe acbe Taitá, lempe chë mo
iytëmencá yomna soyëngama tatsëmbuá, chama
echántsetatsëmbo. Y cha, chë iytëmencá tcojama

soye bominÿe endbetsequëcjnáyá, acbe uacanana soye cmochántatštaye ca” —Jesús tojánayana.

Chë celoca bomnana
(Lc 12.33-34)

19 “Bomnana quem luarentše ndoñe šmattsëjuabaye. Muentšna chë mejojón y inÿe pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana.

20 Más tšabá tšëngaftangbiamana entsemna, mora quem luarentše tšabe soyënga šmojtsamamna, uacanana soyënga celoca chaotsójuabaye. Chentše ni chë mejojón, ni chë inÿe pochócaye soyënga acbe soyënga quemochatspochóca, ni atbëbanënga quemochátamashjna jatbëbama.

21 Er chë ndayentše acbe bomnana tojtsementša soyëngama acbe ainánaca cochántsejuabnaye ca” —Jesús tojánayana.

Chë cuerpama uajuinÿanësha
(Lc 11.34-36)

22-23 “Acbe bominÿe tšabá totsomñëse, mo canÿe uajuinÿanëshacá acbe cuerpama jtsemnana, chíyeca aca jtsobenana ntšamo tcojtsamcá chë bomínÿeca jtsonÿayana. Chë bominÿe ndoñe tšabá tontsemnësna, chë bominÿe tondaye ntsoobenana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnësna, lempe ntšamo chacojtsamcá ndoñe tšabá queochátsmëna. Y

chca, aca cochantsiyena soyënga jtsamëse mo puerte ibetiñcá ca” —Jesús tojánayana.

Chë Bëngbe Bëtsabiama bonshánana o chë nyë quem luarentša soyënga jtsebošana

(Lc 16.13)

²⁴ “Ndocná ntsobenana uta mandayata jtsaservénana: cánÿabioye bochantśáboyënja y chë ínÿabioyna bochantśebobonshana, o cánÿabiama tśabá echántsetrabajaye y chë ínÿabiamna ndoñe tśabá. Ndoñe quecátobena Bëngbe Bëtsá jtsebobonshánana, nyë quem luarentša soyënga jtsebonnama yapa tcojtsebošëse ca” —Jesús tojánayana.

Bëngbe Bëtsá chabe básenga jtsanÿenana

(Lc 12.22-31)

²⁵ “Chcasna atše šcuayana: Ndoñe šmattsenócochinÿena ndayá šmochjase o šmochjofsiye vida jtsebonnama, ni ndaye entśayá šmochjuíchëtjuama cach ndoñe. Ndegombre, vida chë sanama más enduámama y cuerpo chë entśayama más.

²⁶ Smochjanÿe chë shloftšënga jtsongüefjnayana. Chënga tondaye ntjájena, ni jaja saná ntjátbanana, ni chë grano uaquëcjnaye yebnënguiñe quemnat-squëcjná; pero Bëngbe Bëtsá, celoca endmëná, chënga saná jtsatśatnayana. ¡Y tšëngaftanga chë shloftšetémëngbiama puerte más šmonduámama!

²⁷ Masque chca endmëna, canÿa masque tša tojt-senócochinÿena, ¿ntśamo nanjobenaye jamana chë ntsachetśá vida yochtsebonmentšana, canÿe hora vida más jabotiyana?

28 “Y ndayá šmochjuíchëtjuama, ¿ndáyeca šmojtsenócochinýena? Šmochjinýe chë jajañe lirio uantšefjushangá jtsajuajnana: ndoñe ntsetrabájayana, ni ntseshabiamnayana.

29 Pero atse cbëyana, ndegombre ni mo Rey Salomón nyetsca chabe bomnánaca nyetšá botamana mo chë lirio uantšefjushangacá quenjat-spormana.

30 Bëngbe Bëtsá tša botamana shácuana tojuama, y chë shácuana mënté jajoca jtsamnana, yëfsana iñoca. Chca chë shácuanaca cha tojamëse, ndegombre tšëngaftangbiámna Bëngbe Bëtsá echanjama entšayá chašmotsábomnana, jentšanga nýe batšá Bëngbe Bëtsábeñe ošbuáchiyënga!

31 Ndoñe šmattsenócochinýena, mëntšá jtsichámëse: ‘¿Ndayá mochjase?’ o ‘¿Ndayá mochjofsiye?’ o ‘¿Ndayá mochtichëtjo ca?’

32 Chë soyëngama, chë Bëngbe Bëtsábioye nduabuátmënga mondbétsenocochinýena, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtsëjabortama endétatšëmbo.

33 Chíyeca, tšëngaftangna natsana šmochjshétseboše Bëngbe Bëtsá tšëngaftangbe ainaniñe chaotsemándama y lempe ntšamo cha tojamandacá šmochtsama. Chca šmojamëse, Bëngbe Bëtsá lempe ntšamo cmojtsëjabortcá cmochanjátataye.

34 Ndoñe matenócochinýenana ndayá yëfse yochjochnënguama. Yëfse luare cochántsebojna chë soyënga jinýama y jamama. Cada tescama endbétsemna yapa totcá soyënga jájandmanama ca”
—Jesús tojánayana.

7

Ndoñe ntsichámuana chë ínÿenga tšabá o ndoñe tšabá tmonjamama

(Lc 6.37-38, 41-42)

¹ “Ndocá ínÿengbiamama šmattsichamo chë ndoñe tšabá tmonsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca.

² Chë ntšamo tšëngaftanga ínÿengbiamama šmojtsichamcá tšabá o ndoñe tšabá tmonsamama, cachcá Bëngbe Bëtsá tšëngaftangbiamama chë ntšamo šmojamama echántsichamo. Y ntšamo ínÿengbioye chašmojábiama, uabouana o ndoñe jabuache soyënga, cachcá Bëngbe Bëtsá tšëngaftangbioye cmochanjábiama.

³⁻⁵ “Nderado canÿa chabe bominyiñe canÿe niñëfja tojtsebomñese, cha ndoñe ntso benana chabe catšata jauyanama: ‘Acbe bominyëntšana canÿe polvështema jtsebuchjátsęcama šmolesenciá ca’. Natsana cha bontsemna cachabe bominyëntšana chë niñëfja jtsebuchjátsęcana tšabá jinÿama jobenayama, chabe catšatbe bominyëntša polvështema jtsebuchjátsęcama. Cachcá entsemna acbiama, jbacna entšá chë ntšamo ndegombre tcojuabnacá ndinÿinÿayá!, chë tša bacna soye cojtsama ca acbe catšata tcojauyana ora, cach aca tša bëts bacna soyënga cojtsamama ntjenouaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngménaca jshatenójuaboyana y chca amana

jtsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama.

⁶ “Chë Bëngbe Bëtsabe soyëngama josértama ndëboše entšanga ndoñe šmattsabuayiynaye. Aíñese nántsemna mo chë Bëngbe Bëtsabe bëts yebnoca uátšëmbona mëntšena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtsëtémënga cotšëngbioye cuaftsëtšancá, chënga nyë jtsebotájayana ca” —Jesús tojánayana.

*Smochjotjañe, šmochjáanguango y
šmochjachembo
(Lc 11.9-13; 6.31)*

⁷ “Smochjotjañe y Bëngbe Bëtsá
cmochanjátšataye; šmochjáanguango y
šmochanjínýena; šmochjachembo y bëšáša
cmochanjébëtafjo.

⁸ Er ndánaca tojtsotjanañá, jójëngacñana; y nda tojtsenguá cha, jónýenana; y nda tojtsechem-buanábioye jebiatëfjuana.

⁹ “¿Ndëmuanýe boyabása tšëngaftanguentsá, canýe tandëse chabe uaquiñá tbojtsotjanañe ora, canýe ndëtsbé chábioye buanjatštaye?

¹⁰ ¿O canýe mëtscuaye buanjatštaye, beona tbojtsotjanañe ora?

¹¹ Y chca, tšëngaftanga, bacna soye amënga, tšëngaftangbe basetémënga tšabe soyënga jatsatayama šmojtsamanëse, ¡más tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátšataye!

12 “Inyengaftaca šmochtsama ntšamo chë ínÿenga tšëngaftangaftaca chamotsamama šmojtsebošcá. Chca endmëna ntšamo Moisesbe leyiñe y chë Bëngbe Bëtsabe juabna oyebuambnayëngbe buatëmbana soyënguiñe endayancá ca” —Jesús tojánayana.

Chë base utëntśá bësásá
(Lc 13.24)

13 “Chë base utëntśá bësásajana šmochjámashjna. Chë utëntśá bësásajana y chë paselo jóyename benache, infierno ye cmochanjuánatse y banga chëjana mondámashjuana.

14 Chë tšabe vida binÿnoye jamna base utëntśá bësásajana endmëna y ndoñe paselo jóyename benache, y chiñe báseftanga mondbínÿena.

*Chë Bëngbe Bëtsabe ndoñe ndegombre juabna oye-
buambnayënga*
(Lc 6.43-44)

15 “Cuedado šmochtse bomna chë Bëngbe Bëtsabe ndoñe ndegombre juabna oye-
buambnayëngbiama. Chëngna mo oveshëngcá tšëngaftangbiøye mochanjabo, pero ndegombre chënga mondmëna mo tšátjaye tjañe quešëngcá.

16 Tšëngaftanga betiyënga jtsabuatomana ntšamo cada ona tojtseshajcá; cachcá tšëngaftanga chcanga šmochantsëbuatma, ndayá chënga mochtsamama. Uchmašëshe betiyentšana ndoñe uvas ntjuátatabiana, ni higuëbé cardo betiyentšana.

17 Chca, nyetsca tšabe betiyiñe tšabe soye jashájonana; y chë ndoñe tšabeshiñna podesca soye.

18 Canye tšabe betiyiñe quenátopodena podesca soyenga jashájonana, ni canye ndoñe tšabe betiyiñe tšabe soyenga jashájonana.

19 Ndaye betiye podesca shajuanēshe jtseshatētšana y iñoye jtsatmetšana.

20 As chca tšëngaftanga chënga šmochantsëbuatma, ndayá chënga mochtsamama ca” –Jesús tojánayana.

Bëngbe Bëtsabe amëndayoye ndoñe nyetscanga jamashjana

(Lc 13.25-27)

21 “Ndoñe nyetscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nye ntšamo atšbe Taitá, celoca endmëná, tojtsebošcá amëngna aiñe.

22 Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, ábeñe betsošbuáchema, bënga fsëndoyebuambná, y ácbeyeca bacna bayëjëngbe juabna entšángbentšana fsëndëtabocana, y ácbeyeca bëts soyenga fsëndama ca.’

23 Chora atše chanjójuaye: ‘Ndocna te checbaisëbuátmana. Atšbentšana mojuánanga, bacna soye ama entšanga ca’ ” –Jesús tojánayana.

Chë uta ucuatjoniñe

(Mc 1.22; Lc 6.47-49)

24 “Chcasna, nda atše šojoyeuná y chë ntšamo sëntsichamcá tojtsama, endmëna mo canye tšabá juabnaye boyabasacá. Chë boyabásana ndëtšbeñe chabe yebna yojajebo.

25 Uaftena yojuáshjango, chë béjayënga yojóftjajna, chë yebnoye puerte yojtsebinÿiaye, pero chë yebna ndoñe ntjuáshajayana, chë yebna ndëtsbeñe inajéboyeca.

26 Pero nda atšbe palabra tojouena y ntšamo sentsichamcá ndoñe tontsama, endmëna mo canÿe ndëjuabnaye boyabasacá. Chë boyabásana chabe yebna cascajuñe vojajebo.

27 Uaftena yojuáshjango, chë béjayënga yojóftjajna, chë yebnoye puerte yojtsebinÿiaye y chë yebna uabouancá yojtsáshajaye ca” —Jesús tojánayana.

28 Jesús chë soyënga jóyebuambayama tojanpochocá ora, chë entšanga ojnánënega imojtsemna ntšamo cha tojánabuatambama.

29 Jesús tojanabuatambá nÿets obenánaca, mo canÿa mando bomnacá y ndoñe nÿe mo chë ley abuatambayëngcá.

8

Jesús, canÿa bacna nguayanánaca šocábioye tbojanshná

(Mc 1.40-45; Lc 5.12-16)

¹ Jesús tjoicana tojtantsmá ora, ba entšanga tmojanasto.

² Chora canÿe boyabása bacna nguayanánaca šocá Jesúsbioye tojanobeconá, chabe delante yojshamentšiyey tbojaniyana: —Utabná, aca tcojtsebošëse, catjobenaye atšbe šocana jtsebojuánana ca.

³ As Jesús tojanacuenÿanëjaná, chë boyabásabioye tbojánbojajo y tbojaniyana: —Aíñe, sëntseboše. Socana cbotsebojuaná ca.

Y cachora chabe šocana tbojtsanóbojuanañe.

⁴ Jesús chë shnanábioye tbojaniana: —Mouena, ndocnábeñe cattsecuéntaye; nÿe chë Jerusalenoca báchnëbioye motsa, y cha cochjinÿinÿiye mora aca ya tšabá cojtsatsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nÿetscanga chamotatsšëmbona mora aca ya ndoñe šocá contsemnama ca —Jesús tbojaniana.

*Jesús canÿe Romano soldadëngbe amëndayabe
bochichnayábioye tbojanshná
(Lc 7.1-10)*

⁵ Jesús Capernaumoye tojánamashëngo ora, canÿe Romano soldadëngbe amëndayá Jesúsbioye tojanobeconá canÿe pavorama jaimpádama.

⁶ Jesúsbioye tbojaniana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

⁷ Chora Jesús tbojanjuá: —Cha jáshnama chanjá ca.

⁸ As chë soldadëngbe amëndayá tbojaniana: — Señor, atše merecido taitsatobuajoñe atšbe yebnentše chacuamashënguama; nÿe mayana y atšbe bochichnayá tšabá echántsatsmëna.

⁹ Atšbioye mándayënga atše sëndábamna y átšnaca soldadëngbe amëndayá sëndmëna. Atše canÿe soldado stjauyana “motsa ca”, cha cachora jana; y inÿa stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

¹⁰ Jesús chca tojanuena ora, tojanenjnana y chë ústonënga tojanëyana: —Ndegombre cbëyana, ni mo nyets Israelentse ni canya quem boyabasacá Bëngbe Bëtsábeñe nyetsá ošbuachiyá chiyátinyena.

¹¹ Y šcuayana, shinje bocanoicana y shinje uenatjëmbambanoicana bëtscá entšanga mochanjabo, y Abraham, Isaac y Jacob, chë judiëngbe tempsca uámana bëts taitángaftaca mochanjotbiana Bëngbe Bëtsabe amëndayoca, cányiñe juasama.

¹² Ba Israeloca entšanga, chë ndëmuanjengbiana Bëngbe Bëtsabe amëndayana natsana yochtsanmëna, chocana mochantëbuacana chë ndëbinyna luaroye, infernoye. Chentse puerte mochanjenóbošachna y chë tsetšanama juatsašënga mochantsenoftëšjojnaye ca —Jesús tojánayana.

¹³ Chora Jesús chë soldadëngbe amëndayábioye tbojaniana: —Ache yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá yojtsatsmëna.

*Jesús, Pédrëbe uambén mamábioye tbojanshná
(Mc 1.29-31; Lc 4.38-39)*

¹⁴ Chentšana Jesús, Pédrëbe yebnoye tojána. Chentse Pédrëbe uambén mamá šocá calentóracá yojtsejutsnajona.

¹⁵ Chora Jesús chë uambén mamabe cucuatse tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontsé chënga jobuácuedana.

*Jesús ba šoquënga tojanashná
(Mc 1.32-34; Lc 4.40-41)*

16 Chë te jaibétatama ora, Jesús yojtsemnoye banga bacna bayëjëngbe juabna uambaye entsanga tmojanënatse. Chora, nÿe canÿe Jesús jóyebuambayëse chë bacna bayëjënga imojtsaisebocana y nÿetsca šoquënga tojanashná.

17 Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntsá tojánayana: “Cha bëngbe šocanënga tonjaftsanca y bëngbe nÿetsca tsetšanana chábeñe tonjanoquedá ca.”

*Chë Jesús juastama bošënga
(Lc 9.57-62)*

18 Jesús tojánanÿe mallajta entsanga chabe shëconana; as tojanmandá uafjajónaye chenguana jama.

19 Chorna, canÿe ley abuatambayá Jesúsbioye tbojanobobeconá y tbojaniyana: —Buatëmbayá, atše sëntseboše aca juastama, ndëmoye chacojtsá choye ca.

20 As Jesús tbojaniyana: —Chë zorrënga mondbomna cuevëshënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

21 Chora inÿa, cach uatsjendayënguentšá, Jesúsbioye tbojaniyana: —Bëngbe Utabná, šmoleenciá atšbe taitá chjshesabotbontsañe ca.

22 Chora Jesús tbojanjuá: —Nÿe šmasto. Chë Bëngbe Bëtsabiama mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsëtebuantsañe ca.

Jesús chë binÿia y chë béjaye bonguana yojëtsbema

(Mc 4.35-41; Lc 8.22-25)

²³ Chentšana Jesús canÿe barquëshoye tojánamashëngo y chabe uatsjëndayënga imojtsetjëmbambnaye.

²⁴ Ndeolpe tša jabuache binÿia chë uafjajónaye béjayiñe yojóshjango; nÿetsá jabuachana yojtsemna, chë olëshënga barquëshu imojtsëtsbotsana. Y Jesús chora inétsomañe.

²⁵ As chabe uatsjëndayënga tmojána Jesús jetsefsenama y tmojaniyana: —¡Bëngbe Utabná, šmatsebacá. Montsenatjëmbambana ca!

²⁶ Chora Jesús tojanëyana: —¿Ndáyeca tša šmojtsauatja? ¿Tša batsatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojanëyana y tojantsbaná. Chora tojanmandá chë binÿia y chë búyeshe bonguana chaotsatsmënama, y lempe natjëmbana yojtsatsmëna.

²⁷ Chabe uatsjëndayënga ojanánënga imojtsemna y mëntsá imojtsichamo: “¿Nda quem boyabása yomna? Cha tonjayana y chë binÿia y chë búyeshe tmonjoyeuná ca.”

Chë Gadara luaroca entsata, bacna bayëjbe juabna uambayata

(Mc 5.1-20; Lc 8.26-39)

²⁸ Jesús uafjajónaye chenguana tojánashjango, canÿe luare Gadara ca uabáinentše. Chorna chë utabuantsánëngbentšana útata, bayëjbe juabna uambayata, tbojánbocna y Jesúsbioye tbojanobobéconata. Puerte tšatjayata ibnamna,

chíyeca entšanga ndoñe ntsobenana chējana jtsachnējuaanana;

²⁹ y chora tbojanontsé chë bacna bayējēngbeyeca mēntšá uayebuáchana: —¿Ndayá bēngaftaca cojtseboše, Jesús, Bēngbe Bētsabe Uaquiñá? ¿Moye tcojabo bēnga chafsufrema, chama cabá ndoñe chë tempo yontsemna ora ca?

³⁰ Chentša béconana ba cotšēnga imnajena y chēnga imnétsosañe.

³¹ Y chë bayējēnga Jesús tmojanimpadá: — Muentšana jésebocanama aca tcojamēse, cochjama bēnga chë cotšēngbeñe fchayamashjna ca.

³² Y Jesús tojanéyana: —Motsajna ca.

Chora chë bayējēnga chë boyabásatbentšana tmojésanbocana y chë cotšēngbeñe tmojánamashjna; cachora chë cotšēnga batsjocana penēšējana uafjajónayoye imojtsoshbuetše y yojtsatajo.

³³ Chora chë cotšēnga anýenēnga tmojtsanacheta, y chë pueblloye tmojánashjajna ora, tmojanontsé lempe ntšamo yojochnēngcá jacuéntana y ntšamo chë bayējbe juabna uambayátaftaca tojanopasámnaca.

³⁴ Chora nýetsca entšanga chë pueblentšana tmojánbocana y Jesús yojtsemnoye tmojána. Chë entšanga Jesús tmojáninýe ora, tmojanimpadá chë luarentšana chaueseboचना.

9

*Jesús, canýe jama ndobenábioye tbojanshná
(Mc 2.1-12; Lc 5.17-26)*

¹ Chca tojanopasá chentšana, Jesús canýe barquëshoye tojánamashēngo, uafjajónayoye chenguana

tojáná y cachabe puebloye Capernaumoye tojt-anashjango.

² Chora, canye jama ndobená, tjuashiñe jajoná, Jesús yojtsemnoye básefta boyabásenga tmojanamba. Jesús tojáninye chënga tša imojtsošbuáchema chë šocábioye jáshnama cha bétsobenama; as chë šocábioye tbojaniyana: “Sobreno, añemo matsca; acbe bacna soyënga tcbontseboperdoná ca.”

³ Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiana; mo chábioye cuafjoyenguangcá entsemna ca.”

⁴ Pero Jesús yojtsetátšëmbo ntšamo chënga imojtsejuabnaycá; chiyeca tojanëyana: “¿Ndáyeca nyëtsá bacna juabnënga ainaniñe šmojtsebojna ca?”

⁵ ¿Tšëngaftangbiana ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca’?

⁶ Atše cbochanjínyanýiye ntšamo chë Bëngbe Bëtsá Entšá tbojanbemá quem luarentše mando yobomnama, entšanga bacna soyëngama jáperdonama ca” —Jesús tojanëyana.

As chë jama ndobenábioye tbojaniyana: “Matëtsbaná, acbe tjuashe mesocñe y acbe yebnoye motsatoñe ca.”

⁷ Chorna chë jama ndobená tojtantsbaná y cachabe yebnoye yojtsatoñe.

⁸ Chca tmojáninyama chë entšanga auatjanánënga imojtsemna y Bëngbe Bëtsá

imojtsatschuanaye, cha chca obenana entšanga tojánatsatama.

*Jesús, Matéobioye tbojanchembo chabuastama
(Mc 2.13-17; Lc 5.27-32)*

⁹ Jesús chentšana tojtsanoñe y canye entšábioye tbojáninye, Mateo ca uabainá, chë Romocama impuesto entšángbioye atjanayentše inétsotbemañe. Chora Jesús tbojaniyana: “Šmasto ca.” As Mateo chentšana tojěftsantsbaná y tbojanasto.

¹⁰ Jesús cach Mateobe yebnentše yojtsesaye ora, banga Romocama impuesto entšángbioye atjanayënga y ínÿenga bacna soye amënga tmojánashjajna y mesëshentše Jesús y chabe uatsjëndayëngaftaca imojotbiamá.

¹¹ Chë fariseunga chca tmojáninye ora, Jesusbe uatsjëndayëngbioye tmojanatjá: —¿Ntsámo chca yojtsemna, tšëngaftangbe buatëmbayá chë impuesto atjanayënga y bacna soye amëngaftaca entsesá ca?

¹² Jesús chca tojanuena y chë fariseunga tojanéyana: —Chë salud bomnënga ashnayá ndoñe ntsëjabótana, pero chë šoquënga aíñe.

¹³ Smochjá y ntsámo ndegombre iuayancá smochjuatsjinye quem Bëngbe Bëtsabe uabemana palabrënguiñe:

Atše sëntseboše tšëngaftanga lastemadënga chašmotsemna,

y ndoñe nÿe bayënga chašmotsëbánaye Bëngbe Bëtsá jëtschuayama ca.

Atše ndoñe chiyátabo chë Bëngbe Bëtsabe bominiñe tšabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

*Jesús tmojantjá chë Bëngbe Bëtsáftaca jencuéntama
tondaye saytescama*

(Mc 2.18-22; Lc 5.33-39)

¹⁴ Chentshana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuéntama. ¿Ndáyeca acbe uatsjëndayënga ndoñe chca ca?

¹⁵ As Jesús tojanëjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentshana mochantsánatseñe; chora cocayé chë ófjanënga tondaye más jasama quemochátsbomna. Ntsamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjëndayëngaftacnaca.

¹⁶ “Ndocná canye uatanguá entsáyá base tsëm entsëjuaca jtarmëndana. Er chë tsëm entsëjua jtsabéconana y chë uatanguá entsáyá más jtsatanëcanana, y chca chë uátanëcniñe más bëtsiñe jtsabemana.

¹⁷ Y cach ndoñe chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámama; y chca, chë jasabenga y chë vínoye jtsoservénana ca” —Jesús tojánayana.

*Jesús canye shembásabioye tbojanshná y tojanma
Jairébe bembetema cháuatayenama
(Mc 5.21-43; Lc 8.40-56)*

18 Jesús entšanga yojsétsétsnantscuana, chë judiëngbe enefjuana yebnentša canye mandayá tojánashjango y Jesusbe shecuatšentše yojobamentšiyé. Chë mandayá tbojaninyana: “Atšbe bembe tontsóbana. Diosmanda atšbe yebnoye mabo; cochjabojajo y cha echántayenaca.”

19 Chentšana Jesús y chabe uatsjëndayënga chë mandayá tmojanasto.

20-21 Imojtsaye ora, canye shembása stëtšoicana Jesúsbioye yojobeconá. Bnétsana uta uatama oboftjajuanánaca cha inapadecena. Chë šocá Jesúsbioye yojobeconá ora, yojtsejuabnaye: “Masque nýe mo chabe entšayá sibiájua chajjuábojajo, salud chantinýena ca.” Chentšana chë šocá Jesusbe entšayá tojanábojajo.

22 Tojanábojajo ora, Jesús tojanobuértana, chë shembásabioye tbojáninýe y tbojaninyana: “Añemo matsca, shembása. Bëngbe Bëtsábeñe icošbuachéyeca, mora tšabá contsatsmëna ca.” Y cach orscana cha tšabá yojsatsmëna.

23 Chënga tmojtëtanontsé ayana y chora chë mandayábioca chënga tmojánashjajna. Chentše Jesús tojánanýe, ínýengna chë veloriamá imojtsanflautaye y ínýengna tša imojtsošachiye.

24 Chora Jesús tojanényana: “Muentšana mobocnënga. Chë shembásetema cabá ndoñe obaná quenátsmëna; nýe endëtsomañe ca.”

Pero chë entšanga Jesúsbioye nýe imojtsáfchaye.

²⁵ Pero Jesús pronto chënga chë yebnentshana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacueshache y cachora chë shembásetema tojtantsbaná.

²⁶ Y nyets chë luarëjana ndayá Jesús yojamama nyetsca entšanga imojátatšëmbona.

Jesús uta jtanata tojanashná

²⁷ Jesús chentšana tojěftsanbocna ora, uta jtanata tbojanasto y mëntšá ibojtsaiuáye buache: —¡Davídbentšana Entšá, bëndata šmotsalastemá ca!

²⁸ Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuaché atše chca jamama chjobenaye ca?

Y tmojanjuá: —Arseñor. Aíñe ca.

²⁹ Chora Jesús tojánabuchbojajo y tojanëyana: —Ntšamo tsëndatbe ošbuáchiyana yomncá, cachcá chaotsemna ca.

³⁰ Y cachora jinýama ibojtsobena. Jesús bëtscá chata mëntšá tojanamëndá: —Ndocná más quem soye chaondětsetatšëmbo ca.

³¹ Pero chata chentšana tojěftsanbocna y cachora tbojanontšé ndayá Jesús chátaftaca tojanmama nyets chë luarëjana jacúntana.

Jesús, canye ndëbiábioye tbojanshná

³² Chë jtanata ibojtsebocanëntscuana, básefta entšanga canye ndëbiá, bacna bayëjbe juabna uambayá, Jesúsbioye tmojanamba.

33 Jesús chë bacna bayëja chábentšana tbojtanábocna y cachora chë ndëbiá tojtanontsé oye-buambnayana. Entšanga ojanánënga imojtsichamo: “¡Ndocna te Israelentše chca bëts soye chemuáisinýe ca!”

34 Pero chë fariseunga imojtsichamo: “Cach bacna bayëjëngbe amëndayá, Satanás, muábioye obenana tbojatštá chë bayëjënga entsángbentšana jtëbuacanama ca.”

Jesús entsangbiana tbojanongmé

35 Jesús nyetsca pueblënguëjana y luarënguëjana yojtsachñëjuana y chë judiëngbe enefjuana yebnënguenache entsanga yojtsabuátambaye. Yojanabuayiyná chë tšabe noticiënga Bëngbe Bëtsabe amëndayama, y nyetsca šocanëngama y tsetšanama yojánashnaye.

36 Y chë entsanga tojánanýe ora, puerte tbojanongmé. Er chënga imojtsemna mo abujajënyã ndbomna oveshëngcá, puerte uamëntsnayënga ba soyëngama padecena causa, y chaújabuachama ndocná ntsebmncá.

37 Chora chabe uatsjëndayënga tojanëyana: “Canýe bëts jajañe bëtscá játbanama entsemna, pero peonga nýe báseftanga. Cachcá quem luarentše, bëtscá entsanga Bëngbe Bëtsábioye nduabuátmënga montsemna, y chëngbioye chabiana abuayiynayënga nýe báseftanga.

38 Peonga tmojtsashbenëse chë nduíñbioye jaimpádana ba peonga chauichamoma chë jaja saná játbanama. Cachcá, Bëngbe Bëtsábioye moimpadanga ba abuayiynayënga

chauichamoma, quem entsanga chábioye chamúbuajama ca” —Jesús tojanéyana.

10

Jesús chë bnëtsana uta uatsjéndayënga tojanabacacá

(Mc 3.13-19; Lc 6.12-16)

¹ Chentšana Jesús tojánachembo chabe bnëtsana uta uatsjéndayënga, y obenana tojanatsatá bacna bayëjengbe juabna entsángbentšana jtabocnama y nyetsca šocanëngama y tsetšanama jashnayama.

² Chë bnëtsana uta uatsjéndayënga mëntšá imo-janabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata;

³ Felipe y Bartolomé; Tomás y Mateo, chë Romocama impuesto entsángbioye atjanayá; Santiago, Alfeobe uaquiñá y Tadeo;

⁴ Simón, chë celote ca uabobainá y Judas Iscariote, chë uayayengbe cucuatšine Jesúsbioye boshjuaná.

Jesús, chabe bnëtsana uta uatsjéndayënga tojanichamó, Bëngbe Bëtsabe amëndayama jábuayenama

(Mc 6.7-13; Lc 9.1-6)

⁵ Jesús chë bnëtsana uta boyabásenga tojanichamó chë tšabe noticiënga entsanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjéftsamashjna.

6 Nýe Israeloca pueblëngoye šmochjá. Choca entšanga mo ótsena oveshëngcá montsemna, Bëngbe Bëtsábioye corente nduabuatma causa.

7 Šmochjá y entšanga šmochjábuayenaye Bëngbe Bëtsabe amëndayana echanjóshjanguama.

8 Chë šoquënga šmochjáshnaye, šmochjama chë obanënga chámuatayenama, bacna nguayanánaca šoquënga šmochjáshnaye y bacna bayëjengbe juabna entšángbentsana šmochtábocna. Chë obenana šmonjóyëngacñe tondaye ntjëtsjajuacá; cachcá, chë soyënga šmojtsamama tondaye entšanga šmattsayëngacaye.

9 “Ndoñe šmattsambaye crocénana uasnanëchiñe.

10 Ni shecnaja sanaca benachiñama, ni inýe entšayá jtsenomódama, ni shecochëtjonëshënga, ni jatjonëfja, er chë tšabe trabajayá jtsomerecénana ntšamo tbojtsajabotcá jóyëngacñama.

11 “Nderado canýe bëts pueblentše o base pueblentše chašmojáshjajna ora, šmochjáanguango canýe tšabe entšá, ínýengbioye ndaingñayá, y chabe yebnentše šmochtsoquedañe, inýe puebloye játantscuana.

12 Canýe yebnoye chašmojáshjajna ora, nyetsca chentša oyenënga mëntšá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’

13 Chë yebnentša entšanga ainaniñe tšabe ebionana jtsebomnama mercedo tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndoñesna, nýe cach tšëngaftangftaca chaotsomñe.

14 Y nderado canye pueblentse o bēts pueblentse chē entsanga ndoñe tcmónjúbuaja y ndoñe tcmónjóyaunase, chentsana šmochjésebecana y chē shecuatšentša polvėshe šmochjésenstoto. Chca, chē entsanga mochántsetatšēmbo chēnga tšēngaftangaftaca ndoñe tšabá tmonjamama.

15 Ndegombre šcuayana, quem luare jopochócama te, chē ndoñe chacmonjúbuaja y ndoñe chacmonjoyauná entsanga Bēngbe Bētsá puerte jabuache echantsacastígaye, y chē bacna entsanga Sodoma y Gomorra luaroquēngna ndoñe nya nyetšá jabuache queochatacastígaye ca” — Jesús tojánayana.

Ntsamo chē uatsjéndayēnga mochjansúfria

16 “Smochjouena. Atše cbontsachamná mo oveshēnga cuenta tjañe quešēngbeñe. Chíyeca studio bomnēnga mo mētšcuayēngcá šmochtsemna y uamanēnga mo palomatemēngcá.

17 Entšangbiana cuedado šmochtsebomna, chēngbe pueblentša amēndayēngbe cucuatšiñe tšēngaftanga cmochanjábashejuana y chēngbe enefjuana yebnēnguenache cmochanjátsetšenaye.

18 Atšbe ústonēnga bétsemnama, mandadēngbioye y reyēngbioye cmochanjunatse. Y chca, tšēngaftanga šmochanjobenaye chēngbeñe y chē ndoñe judiēngbeñe ntsamo atšbiana šmotatšēmbcá jóyebuambayama.

19 Pero chē mandadēngbe cucuatšiñe chacmojábashejuana ora, ntsamo o ndayá šmochjayanama ndoñe šmattsenócochinýena. Chca orna, Bēngbe Bētsá tšēngaftanga cmochanjabuayená ntsamo o ndayá jóyebuambayama.

20 Tšëngaftanga ndoñe chë oyebuambnayënga quešmochátsmëna, sinó chë tšëngaftangbe Taitá, Bëngbe Bëtsabe Espíritu, tšëngaftangbiajana echantsóyebuambnaye.

21 “Y canyë entsá cachabe catšátbioye uayayëngbe cucuatšiñe bochanjáboshjona chamotsóbama; y canyë taitá cachabe uaquiñábioynaca. Y chë básenga chëngbe bëtsëtsangbe contra mochántsemna y uayayëngbe cucuatšiñe mochanjábashjuana chamotsébáyama.

22 Tšëngaftanga atšbe ústonënga bétsemnama, nyetsca entsanga cmochantsëbuayënja; pero nda nyets tempo átsbeñe ošbuachiyá chaotsomñá, atsbocaná echántsemna.

23 Canyë pueblentše chacmojtsécamena ora, inyë puebloye šmochtsacheta. Ndegombre cbëyana, Israelentša nyetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

24 “Ni canyë uatsjendayá chabe bu-atëmbayabiana más uamaná ntsemnana, ni chë oservená chabe nduiñbiana más uamaná.

25 Chë uatsjendayá ya cachabe buatëmbayacá jtsemnama tojashjáchése, ndayá más nanjátsboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canyë yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntšamo chënga tšëngaftanga cmochtsëbobuatma ca?” —Jesús tojanëyana.

*Nda ndegombre cuantsebiauatja
(Lc 12.2-7)*

²⁶ “Chiyeca entsangbiana ndoñe matauatjengana. Chë yoyitëmena soyentsana tondaye ntjinýcá queochaisoquéda, y chë ndótatsëmbo soye, ntsotatsëmbcá queochaisoquéda.

²⁷ Chë mora cbontsëtsësná soyënga, chë entsangbiana mo ibetiñe cuaftsemncá soyënga, tsëngaftanga šmochjama entsanga botamana chama chamotsetatsëmbuama. Y chë iytecana cbontsëtsësná soyënga nyetsca entsanga šmochtsabuayiynaye, mo nda canye yebnentša tsbanánocana noticiënga tojtsayebuachcá.

²⁸ Ndoñe matauatjengana nýe chë tsëngaftangbe cuerpo japochócama imobenëngbiana y ainana jtsepochoçama ndoñe ntsobenana. Más šmochtsebiauatja chë nda endobena tsëngaftangbe cuerpo y tsëngaftangbe ainana jtsepochoçama, nyetsca tescama infernoca.

²⁹ “Uta jaja shloftsetémata nýe canye denario crocénánama mondbétsena. Masque chca, ni cányetema obanatema fshantsoye jotsatsana, tsëngaftangbe Taitá, Bëngbe Bëtsá ndoñe tontsebošëse.

³⁰ Y tsëngaftangbiana, Bëngbe Bëtsá botamana jtsantješnana, y chca, cha lempe tsëngaftangbiana jtsetatsëmbuana, bueta stjënashënga tsëngaftangbe bestšašifne yomnámna.

³¹ Chiyeca ndoñe matauatjengana, tsëngaftanga ba jaja shloftsetëmëngbiana corente más šmonduámana ca” —Jesús tojánayana.

Ndabiana Jesucristo yochjayana chabe entsá

yomna ca

(Lc 12.8-9)

³² “Nda atšbe entšá yomna ca entšangbe delante tojayanabiama, átšnaca, atšbe Taitá, chë celoca endmënabe delante chanjayana cha atšbe entšá yomna ca.

³³ Pero nda entšangbe delante atšbe entšá ndoñe yondmëna ca tojayanabiama, átšnaca, atšbe Taitá, chë celoca endmënabe delante chanjayana cha atšbe entšá ndoñe yondmëna ca” –Jesús tojanëyana.

Jesube causa, entšángbeñe más jtsentsjanayana
(Lc 12.51-53; 14.26-27)

³⁴ “Ndoñe šmattsejuabnaye atše quem luaroye tijabo nyetsca entšanga natjëmbana chamotsiyenama. Atše chama ndoñe chiyátabo; atše sënjabo causa, entšanga más mochántsejjanaye.

³⁵ Atše sënjabo chë uaquiñá cachabe taitabe contra chaotsemnama, chë bembe cachabe mamabe contra y chë bebincuá chabe uambén mamabe contra chaotsemnama.

³⁶ Y chca, ba entšangbe uayayënga cachëngbe pamíllanga mochántsemna.

³⁷ “Nda cachabe taitá o mamábioye atšbiana más tbojtsebobonshánëse, cha ndoñe ntsomerecénana atšbe entšá jtsemnama. Nda cachabe uaquiñá o bémbëbioye atšbiana más tbojtsebobonshánëse, cha cach ndoñe.

³⁸ Y nda nyetsca chabe quem luare soyënga ndoñe tonjëseboshjona atše juastama, y atšbiana jasúfriama ndoñe tontseprontana y cruciñe jobanámnaca, cha ndoñe ntsomerecénana atšbe entšá jtsemnama.

39 Nda tojtsentšena quem luarentše bētsá soyēnga jtsebomnama y atšbiamá jasúfriama ndoñe tontseprontana, chē n̄yetsca tescama yomna tšabe vida echanjobuetše. Pero nda quem luarentša soyēnga cachcá tojeson̄yá atše juastama, masque chaóbana, chē n̄yetsca tescama yomna tšabe vida echántsebomna ca” —Jesús tojánayana.

Chē uacanana soyēnga

(Mc 9.41)

40 “Nda tšēngaftanga chacmojúbuaja, átšnaca cha šochanjoŋja; y nda atše chašojoŋja, chē nda šojichmóbioynaca cha bochanjoŋja.

41 Nda can̄ye Bēngbe Bētsabe juabna oyebuambnayábioye tbojoyeuná, cha chca bētsemnama, chábioye Bēngbe Bētsá can̄ye uacanana soye bochántatšetaye, mo cach Bēngbe Bētsabe juabna oyebuambnayabe uacanana soycá. Y nda can̄ye n̄yetsca soyēnguiñe tšabá amábioye tbojoŋja, cha chca uamanama, chábioye Bēngbe Bētsá can̄ye uacanana soye bochántatšetaye, mo cach n̄yetsca soyēnguiñe tšabá amabe uacanana soycá.

42 Y ndánaca, tšēngaftanguentsá can̄ye nduamanábioye masque n̄ye mo base búyeshtema tbojuabuatšetá, atšbe ustoná bētsemnayeca, ndegombre Bēngbe Bētsá can̄ye uacanana soye chábioye bochántatšetaye ca” —Jesús tojánayana.

11

Juan chē Ubayanabe ichmónēnga

(Lc 7.18-35)

1 Jesús tojanpochocá chabe bnětsana uta uatsjéndayēnga jábuayenama, y chentsana tojtsanoñe chě luariñe pueblēnguenache oyena entsanga Bēngbe Bětsabe palabra jabuátambama y jábuayenama.

2 Chě tempo Juan chě Ubayaná cárceloye tmojanětame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonēnga tojanichamó,

3 měntśá jatjayama: —¿Aca ndegombre cojtsemna chě jabama ibojanmēná, chě Uámana Uabuayaná, o šojtsamna ínŷabiana jatobátmama ca?

4 Chca tmojantjá orna, Jesús tojanējua: —Smochjá y Juan šmochjauyana ntśamo šmojouena y šmojinŷcá.

5 Cha šmochjacuénta: Chě jtanēnga tśabá entsatēbinŷna, chě coshetēnga tśabá montsatana, chě bacna nguayanánaca šoquēnga shnánēnga montsatsmēna y chě tēsmēnga montsuenana, chě obanēnga tmontayena y chě ndbomnějémēngbioye chě tśabe noticiēnga montsabuaiyná ca.

6 ¡Puerte oyejuayá chaotsemna chě nda atše bacna soye ndoñe stsama ca jtsejuabnayēse, átšbeñe ošbuáchiyana ndoñe tontsajbaná cha ca! —Jesús tojanēyana.

7 Chēnga tmojtsatanoñe ora, Jesús tojanontśé Juanbiana chě entsanga jáuyanana, mēntśá: “Juan jinŷama šmojánbocana ora, ¿ndayá jinŷama chě entsanga ndoyena luaroye šmojánbocana? ¿Canŷe entśá ainaniñe tondaye añemo ndbomná, mo canŷe šěse bínŷiaca shatiyeyněścá?

⁸ Y ndóñese, ¿ndayá jinyäma choye šmojánbocana? ¿Canÿe boyabása uámana entšayaca bopormaná? Ndoñe. Tšëngaftanga šmondétatšëmbo chë boyabásenga uámana entšayaca bopormánëngna chë mándayëngbe yebnënguiñe mondbétsiyenama.

⁹ Y asna, ¿ndayama choye šmojánbocana? ¿Canÿe Bëngbe Bëtsabe juabna oyebuambnayá jinyäma? Ndegombre, aíñe; y cbéyana, ndegombre cha canÿe Bëngbe Bëtsabe juabna oyebuambnayabiama más bëtsá endmëna.

¹⁰ Cha, Juan, endmëna ndabiama Bëngbe Bëtsá chabe uabemana palabrënguiñe tojánayana mo chabe ichmonacá, mëntsá tojánayana ora: Cristo, atšbe entšá natsana sënjichmó acbiama chaóyebuambama, entšanga jábuayenama aca jabama ainaniñe tšabe juabnëngaca chamotseprontánama ca.

¹¹ Ndegombre cbéyana: Nyets tempo entšángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batšá uamaná, más bëtsá echántsemna ntšamo mora Juan yomnama.

¹² “Juan chë Ubyaná tojánabo orscana mëntscoñama, bëtsca entšanga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imomnëngna, chëngbe nyets añémoca montseboše chë mándayana jtsepochócama.

¹³ Juan candabëntscuana, nyetsca Bëngbe Bëtsabe juabna oyebuambnayënga y Moisesbe Ley nye Bëngbe Bëtsabe amëndayama tmonjanobuambá.

¹⁴ Y tšëngaftanga chë soyënga jójyëngacñama šmojtsebošëse, Juan entsemna chë Bëngbe Bëtsabe

juabna oyebuambnayá Eliascá, chë jabama ibojamná.

¹⁵ Chë jouenama tmojtsobenënga, chamouena ca” –Jesús tojánayana.

¹⁶ Mëntsánaca Jesús tojánayana: “¿Ndayacá morsca entsanga imomna? Chënga mondmëna mo chë plazëngoca mondbetsetbiámána basetemëngcá; chënga chëngbe enutëngbioye jtsayebuáchana

¹⁷ y mëntsá jtsichámuana: ‘Tšëngaftangbiamá fsënjaflautá y ndoñe chešmatslantsá; ngménaca fsënjaversiá y ndoñe chešmatošachna ca.’

¹⁸ Juan tonjánabo, y bëtscá entsángbeñe ndoñe quenjatamana ni jasana, ni jofšiyana, y entsanga montsanichamo chana bacna bayëjbe juabna uambayá yojamna ca.

¹⁹ Morna, chë Bëngbe Bëtsá Entsá tbojanbemá tonjabo, y chana aíñe entsamana bëtscá entsángbeñe jtsesayana y jtsofsëšnayana, y entsanga montsichamo chana yapa uasayá y vínoye tmoyá entsemna ca y Romocama impuesto entsángbioye atjanayënga y bacna soye amëngbe amigo ca. Pero Bëngbe Bëtsá endbétsinÿanÿnaye cha nÿets osertánana bomná yomnama, chë ndayá cha tojama ora ndayá chentsana tojóbcna soyëngaca ca” –Jesús tojánayana.

*Chë nduauenana entsanga
(Lc 10.13-15)*

²⁰ Chentsana Jesús tojanontsé jucácanana chë entsanga, ndëmuanÿenga imojoyena chë pueblënguiñe ndayenache ba chabe bëts soyënga tojanma, chënga bacna soyënga amana ndoñe

tmontsanajbanama y Bëngbe Bëtsabe benache ndoñe tmontanishachama. Mëntsá yojtsichamo:

²¹ “¡Tša lastema, Corazín puebloca entsangbiam! ¡Tša lastema, Betsaida puebloca entsangbiámnaca! Chë chentše sënjama bëts soyënga, Tiro y Sidón bëts publënguentše matënjochnënguse, chentša bacna entsanga ya tempo ngmënaca matmëntenojuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótatsëmbuama uajojësha entsayangaca matmëntopormanga y chëngbe bestsäsiñe jatinyá matmënjenotbótoto.

²² Pero ndegombre cbëyana, ntšamo entsanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebozna, chë Tiro y Sidonoca bacna entsangbe castiguama.

²³ Y tšëngaftanga, Capernaumoca entsanga, ¿šmojtsejuabná celóntscoca atsebánanënga šmochtsemna ca? ¡Chë uabouana infernoye cmochantsësetjango! Chë muentše sënjama bëts soyënga Sodomoca matënjochnënguse, choca entsanga ya tempo ngmënaca chëngbe bacna soyëngama matmëntenojuabó y Bëngbe Bëtsabe benache matmëntishache, y chë bëts pueblo cabá cachcá mëntscuana mantsomñe.

²⁴ Pero ndegombre cbëyana, quem luare jopochócama te, Bëngbe Bëtsá puerte jabuache cmochantsacastígaye, y chë Sodoma luaroca entsángbioye ndoñe nyëtsá jabuache quemochatacastígaye ca” —Jesús tojánayana.

*“Atšbioye mabënga y šmochjóchna”
(Lc 10.21-22)*

²⁵ Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nÿe batsá tatsëmbënga tcojanÿanÿé, chë tša tatsëmbënga y osertánëngbiana tcojaiytëme soyënga.

²⁶ Aíñe, chama cbontsadorana, Taita, chca chaotsemnama tcojábošenayeca.

²⁷ “Atšbe Taitá lempe chca šonjatštá. Chë Uaquiñábioye ndocná corente quebnatábuatma; nÿe chë Taitá aíñe. Y chë Taitábioye ndocná corente quebnatábuatma; nÿe chë Uaquiñá aíñe, y ndábioye chë Uaquiñá tojtseboše nda chë Taitá yomnama jinÿanÿiyama, chánaca chë Taitábioye bochantšabuatma.

²⁸ “Atšbioye mabënga nÿetsca tšëngaftanga uamëntšnayënga y bëtscá trabajo uangménënga, y atše chanjama tšëngaftanga chašmochnama.

²⁹ Ntšamo canÿe entšá, uacná yuguëšiñe juabatsëcana juanatsama, cachcá, tšëngaftanga atše šmochjaleséncia jobnatsayama y jabuátambama. Atšbentšana šmochjuatsjinÿe: atše uantado mëná sëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsemna.

³⁰ Mo canÿe uacnacá, ndoñe tishuta yuguëšeca o ndoñe uauta uasmanëshaca, paselo jama jobenayana, cachcá tšëngaftanga šmochántsemna atše cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y

más paselo nyetsca soyënga jamama echántsemna ca” —Jesús tojánayana.

12

Jesube uatsjédayënga ochnayté trigo tmojanátabebe

(Mc 2.23-28; Lc 6.1-5)

¹ Chë tempo, Jesús canye ochnayté canye jajana yojtsachñëjuana. Chabe uatsjédayëngna shëntseca imojtsemna, chíyeca tmojanontsé trigo juatabebiana y chë meshënga jasana.

² Chë fariseunga chca tmojáninÿe ora, Jesús tmojanianya: —Minÿe, acbe uatsjédayënga canye soye montsama y chë soye ochnayté jamama ndoñe quenátslesenciana ca.

³ As Jesús tojanëyana: —¿Ndoñe šmëndualía y šmondétatsëmbo ndayá David y chabe enutënga tmojanmama, shëntseca imojtsemna ora?

⁴ Chca orna, David, Bëngbe Bëtsabe bëts yebnoye yojámashëngo y chë Bëngbe Bëtsá chentše yojamnama inÿinÿnaye tandëšënga yojase. Chë tandëše nÿe ndánaca jasama ndoñe yonjalesenciana, ni Davidbiana, ni chabe enutëngbiana. Nÿe bachnangbiana belesenciana chë tandëše jasama. Masque David chca tojanma, Bëngbe Bëtsá chora ndoñe tonjánayana David canÿe bacna soye tojanma ca.

⁵ ¿O ndoñe šmëndualía y šmondétatsëmbo, Moisesbe leyiñe, chë bachnanga ochnayté Bëngbe Bëtsabe bëts yebnentše jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama?

⁶ Y atše šcuayana: Muentše canya entsemna, cha chë Bëngbe Bëtsabe bëts yebnentša bachnangbiana más uamaná endmëna y chabe amëndayoca soyënga más entsámána chë bachnangbe mándayentša soyëngama.

⁷ Bëngbe Bëtsabe uabemana palabrënguiñe mëntšá endayana:

Atše sëntseboše tšëngaftanga lastemadënga chašmotsemna,

y ndoñe nÿe bayënga chašmotsëbánaye Bëngbe Bëtsá jëtschuayama ca.

Ntšamo chiñe entsayancá ndegombre cmojtsësertánëse, tšëngaftanga ndoñe chëngbe contra šmattsichamo, chë ochnayté chca tmojtsamëngbiana.

⁸ Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca — Jesús tojánayana.

*Chë buashana cucuatše bomna entšá
(Mc 3.1-6; Lc 6.6-11)*

⁹ Chentšana Jesús tojtsanoñe y chentša judiëngbe nefjuana yebnoye tojánamashëngo.

¹⁰ Chentše yojtsemna canye boyabása buashana buacuatše bomná. Chë fariseunga imojtsenguaye ndayánaca, as chca chënga jtsebomnama ndaye sóyeca Jesús mal jaquédama. Chcasna, chora chënga Jesús tmojantjá: —¿Queojtselesenciana canye ochnayté šocá jáshnama ca?

¹¹ Y Jesús tojanëjua: —¿Nda tšëngaftanguentšá, canye oveshá tbojtsebomna y nÿa chë ochnayté canye fshantsentše atëfjnoye chë oveshá

tojtsótsatše, chora chë boyabása nanjá o ndoñe chë oveshá jatábocnama?

12 ¡Entsá oveshabiana puerta más uamaná endmëna! Chcasna, entselesenciana chë ochnayté tšabe soye jamama ca —Jesús tojanëyana.

13 Chora Jesús chë buashana buacuatše bomnábioye tbojaniyana: “Macuenÿanëjaná ca.” Y chë boyabásana tojanacuenÿanëjaná y chora chëtša tšabá yojtsatamna mo cach inÿetšacá.

14 Pero chë fariseunga tmojésanbocana ora, tmojanontsé juabnayana ntšamo jamëse Jesús jóbama.

Ndayá chë Bëngbe Bëtsabe juabna oyebuambnayá Jesusbiana tojánayana

15 Jesús chë soye tojántatšëmbona ora, chentšana tojtsanoñe y ba entšanga tmojanasto. Nÿetsca šoquënga tojanashná,

16 y tojanamëndá chabiana entšángbeñe ndoñe chamondëtsóyebuambnama.

17 Chca tojanamëndá, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana:

18 Muentše atšbe oservená entsemna. Atše cha sënjabocacá,

atšbe bonshaná, y atše corente chabiana sëntsoyejuá.

Atše chanjama atšbe Espíritu chabe ainaniñe chaotsemnama

y entšanga echanjabuayená, Bëngbe Bëtsá nÿetsca luarënguentsana entšangbiana yochjayanama chënga tšabá o ndoñe tšabá tmonjamama.

19 Cha ndoñe queochátayajuatsana, ni queochátschembumbuana.

Chabe oyebuambnayana tsáshenañe ndocná queochatuena.

20 Mo nda chë atcana šěše ndoñe más jatsndbemana,

chë ndobenęga cha ndoñe queochátapochocaye.

Mo nda chë quinýeněfjua nýe uabojátšena uajuinýněfjua ndoñe ntsafsanana,

chë Bęngbe Bętsábeñe jtsošbuáchiyama imojtsebojátšangbe obatmanana chábeñe, cha ndoñe queochátabuajuanaye.

Cha nýets añémoca echanjěftsetrabája,

entšanga chęngbe ainaniñe Bęngbe Bętsabe ndegombre soyęga chamóyęngacñęntscuana.

21 Y nýetsca luaręnguentšana entšanga chábeñe mochantsobátmana ca –cha tojánayana.

Fariseunga tmojánayana Jesús Satanásbentšana obenana tojanóyęngacñe ca

(Mc 3.20-30; Lc 11.14-23; 12.10)

22 Chora, Jesús yojtsemnoye canýe boyabása jtaná y nděbiá tmojanánatse. Chana bacna bayějbe juabna uambayá inamna; y Jesús chábioye tbojanšhná, chabuatabínýnama y chabuatauénanama.

23 Y nýetsca entšanga ojanánęnga imojtsichamo: “¿Mua yojtsemna chë Davíd bentšana Uámana Entšá, chë Cristo ca?”

24 Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayějęngbe amęndayá, quem boyabásabioye obenana tbojatštá chë bayějęnga chauatěbuacnama ca.”

25 Y Jesús yojtsetátšëmbo ntšamo chënga imojtsejuabnayama; as tojanéyana: “Canÿe amëndayentše entsanga tmojtsenojatá y tmojtšenáyase, cachënga jenpochócana. Cachcá, canÿe bëts pueblentša entsanga o canÿe yebnentša pamíllanga tmojtsenojatá y ndoñe tmontsenëyeunanëse, chënga ndoñe tšabá nyets tempo quemochátsmëna.

26 Cachcá, Satanás cachabe bayëjënga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarentše jëftsebomnana?

27 Tšëngaftanga šmontsichamo atše Beelzebube obenánaca chë bayëjënga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebomna chë bacna bayëjënga jtëbuacnama? Chíyecna, chënga montsinÿinÿná ntšamo ndegombre yomnana y tšëngaftanga ndoñe ndegombre soye šmontsichámuama.

28 Y atšna, chë Bëngbe Bëtsabe Espíritbeyeca chë bayëjënga entsángbentšana sëndëtëbuacana; y chë soye entsinÿinÿná Bëngbe Bëtsabe amëndayana tšëngaftangbioye tojóshjanguama.

29 “¿Ntšamo nda nanjobenaye canÿe corente añemo bomna entsabe yebnoye jamashënguana y chabe soyënga jtsebocana, ndoñe natsana chábioye tconjshétsebatsëquëse? Nÿe tcojshétsebatsëquësna aíñe cuanjobenaye cha jefcana. Atše ya chca Satanásoftaca sënjama.

30 “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe

tontsetrabája, chana atšbe contra jtsetrabájayana.

³¹ “Chíyeca cbéyana, Bëngbe Bëtsá entsanga echanjáperdonaye nÿetsca chëngbe bacna soyënga y chë Bëngbe Bëtsabiama puerte bacá oye-buambnayana, mo chábioye cuafjoyenguangcá; pero ndoñe queochátaperdonaye chë Uámana Espíritbiama puerte bacá ichámënga.

³² Bëngbe Bëtsá bochanjaperdóna chë Cha Entśá tbojanbemabiama ndoñe tšabá ichamuábioye; pero chë Uámana Espíritbiama ndoñe tšabá ichamuábioyna, ni quem luarentše, ni ndocna te queochatsperdóna ca” —Jesús tojánayana.

Tšabe betiye o ndoñe tšabe betiye tondmënama, jtsotatsëmbuana ntšamo tojashajoncá

(Lc 6.43-45)

³³ “Canÿe betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënama, jtsotatsëmbuana ntšamo chëshe tojashajoncá.

³⁴ ¡Mëtscuaye entsanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entsanga šmojtsemnëse? Er ndayá ainanoca becá tomnama entśá jtsóyebuambnayana.

³⁵ Chë tšabe entśá, chë ainanoca tšabe juabnënga bomnentsana jtsóyebuambnayana, y chë bacna entsana chë ainanoca bacna juabnënga tobomnentsana jtsóyebuambnayana.

³⁶ Y ndegombre cbéyana, chë entsangbiama tšabá o ndoñe tšabá tmonjamama jayanama

tempo chaojobuache ora, ndaye ndoservena palabra šmojóyebuambama, Běngbe Bětsabe delante šmochanjayana ndáyeca chca ca.

³⁷ Er ntšamo tcojtsóyebuambnama Běngbe Bětsá echanjayana tšabá o ndoñe tšabá tconjamama, y cmochanjauyana aíñe o ndoñe cmontsemna castiganá jtsemnama ca” —Jesús tojánayana.

Chě bacna entšanga Jesús tmojanimpadá canye běts soye chaoma, chabe obenana jinýama (Lc 11.29-32)

³⁸ Chentšana, básefta fariseunga y Moisesbe ley abuátambayěnga Jesús tmojantjá: —Buatěmbayá, běnga fsěntseboše aca canye běts soye chacoma, acbe obenana chašcuinýanýema ca.

³⁹ As Jesús tojanějua: —Quem puerte bacna entšanga y ndošbuáchiyěnga montseboše atše canye běts soye chaima, atšbe obenana jinýanýiyama; pero chca soye ndoñe quemochátinýe, sinó nýe chě ndayá yomna mo chě Běngbe Bětsabe juabna oyebuambnayá Jonásoftaca tojanopasá soycá.

⁴⁰ Ntšamo Jonás unga te y unga ibeta chě běts beonbe uafsbioye yojěftsemncá, cachcá chě Běngbe Bětsá Entšá tbojanbemá unga te y unga ibeta fshantse jashenoye echanjěftsemna.

⁴¹ Morsca entšanga tšabá o ndoñe tšabá tmonjamama Běngbe Bětsá yochjayana te, Nínive běts pueblocá entšanga mochanjotsaye y morsca entšangbiama mochanjayana ndoñe tšabá tmonjama ca; er chěnga, Jonás yojtsabuayiynaye ora, tmojanoyeuná y chě tšabe

benache tmojtanishache, y chë mora muentše entsemnana, Jonasbiana más uamaná endmëna.

⁴² Morsca entšanga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entšangbiana echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrénga jouenama, y chë mora muentše entsemnana, Salomonbiana más uamaná endmëna ca —Jesús tojánayana.

*Ndayá inopása chë bacna entšángaftaca
(Lc 11.24-26)*

⁴³ Jesús mëntšánaca tojánayana: “Canye bacna bayëja canye entšábentsana tojësebocna ora, chë bayëjna bojojo luarënguenache jtsanana ndayentše jóchnama onguayiñe, y canye luare ndoñe tonjínÿena ora cha jenójuaboyana:

⁴⁴ ‘Atšbe oyenoye, chë ndayentsana sënjëftsebocnoye chanjesshëcona ca’. Y choye tojtashjango orna, jinÿenana lempe tšabá cha jtesamashënguama, mo chentše ndocná tontsiyencá, tsajniñe y lempe botamaniñe cuaftsemncá.

⁴⁵ Chorna chë bayëjna jana y inÿe canÿsëfta bayëjenga chabiana más opëjenga jobiatšana y nÿetscanga choye jamashjnana chë boyabásabeñe joyéanama. Y chca, chë boyabása tempscama más bacna entšá jtsemnana, chora chë natsanama más bayëjenga abamna causa. Morsca puerte bacna entšángaftaca cachcá echanjochnëngo ca” —Jesús tojánayana.

*Chë Jesusbe ndegombre pamillanguentsënga
(Mc 3.31-35; Lc 8.19-21)*

⁴⁶ Jesús cabá entšanga vojtsëtsësnaye ora, chabe mamá y catšátanga tmojánashajna y imojtseboše Jesúseftaca jóyebuambayama. Nýe shjoca imojtsemna;

⁴⁷ asna, canýe boyabása Jesúsbioye tbojanbuayená: —Acbe mamá y acbe catšátanga shjoca montsemna y montseboše ácaftaca jóyebuambayama ca.

⁴⁸ Pero Jesús chë jauenayama tojánabioye tbojaniyana: —¿Nda atšbe mamá yomna, y ndëmuanýenga atšbe catšátanga ca?

⁴⁹ Y cachora chabe cucuatše tojanatsbaná, chabe uatsjëndayënga tojanënýanyé y tojánayana: —Quemënga montsemna mo atšbe mamacá y mo atšbe catšatangá.

⁵⁰ Er ndánaca, ntšamo atšbe Taitá, celoca endmënë yobošcá tojtsama, jtsemnana atšbe catšata, atšbe uabena y atšbe mamá, atšbe ndegombre pamillanguentsá ca —Jesús tojánayana.

13

*Chë jenabe cuento
(Mc 4.1-9; Lc 8.4-8)*

¹ Cach te, Jesús yebnentsana tojëftsanbocna y uafjajónaye tsachoca tojanótbema.

² Mallajta entšanga choye tmojanobeconá; as Jesús, chë uafjajónayentše yojanamna canýe barquëshoye tojánašëngo, tojanótbema; y chë entšangna tsachoca imojtsemna.

³ Chorna ba soyëngama cuentëngaca chënga tojanabuatambá.

Mëntšá tojaněyana: “Canje jená chë jénaye jau-
jquëshama yojëftsebecna.

⁴ Yojsějquëshaye orna, básefta jénaye benache
juachañe yojuatquécjana, pero chë jaja
shloftšënga imojástjajna y lempe imojtsósañe.

⁵ Inye meshëngna ndëtšbenguiñe yoju-
atquécjana, ndoñe yapa fshantse binÿnentše.
Chiñna betscó yojuábocna, fshantse ndoñe
jashenocana yonjanmëna causa,

⁶ pero shinÿe yojábocna ora, puerte yojojënÿána y
yojtsancta; y yojtsábojo, bëtscá tbëtëjënga tondaye
causa.

⁷ Inye meshëngna uchmëshangañe yoju-
atquécjana, y chë uchmëshangá yojuájua orna,
lempe yojtsatscué.

⁸ Y inÿe meshëngna, uanguanëshiñe
yojuatquécjana y puerte botamana chiñe
yojuashajo: ínÿenache nÿe canÿe jénayentsana
mo patse meshënga yojuashájona, ínÿeñna mo
chnënguana bnëtsana meshe y ínÿeñna mo unga
bnëtsana meshe.”

⁹ Jesús chca jacuéntama tojanpochocá
ora, mëntšá tojánayana: “Chë jouenama
tmojtsobenënga, šmochjouena ca.”

*Ndáyeca Jesús cuentëngaca yojánabuatambaye
(Mc 4.10-12; Lc 8.9-10)*

¹⁰ Chora chë uatsjëndayënga tmojanobeconá y
Jesús tmojantjá: —¿Ndáyeca entšanga cuentëngaca
cojtsabuatambá ca?

¹¹ As Jesús tojanějua: —Bëngbe Bëtsá tšëngaftanga
cmontsinÿanÿná nÿetsca chë mo iytëmencá
yomna soyënga chabe amëndayama, pero chë
ínÿengbioyna ndoñe.

12 Nda tojtsebomnábioye más jatštayana y chca cha corente bētská jtsebomnana; pero chē ton-daye tondbomnábioyna, chē batšatema tobomna sóynaca mochántseboca.

13 Chíyeca atše cuentēngaca chēnga sēntsētsētsná. Chca, masque corente chamotsafšna, ndoñe chamondobená Bēngbe Bētsabe soyēnga jinŷama; y masque becă chē soyēnga chamouena, ndoñe tšabá quemochátuenana, ni queochátēsertana.

14 Chcáyecna, chēngbeñe entsemna cachcá ntšamo chē Bēngbe Bētsabe juabna oyebuambnayá Isaías tojanayancá:

Masque becă chamouena, ndoñe queochátēsertana.

Masque puerte chamotsantješna, ndoñe quemochátinŷe

15 Quem entšanga ndoñe quemátsboše botamana jajuaboyana;

chēnga uamatsáchtōnēnga montsemna y chēngbe bomínŷnaca cachcá.

Chca ndóñesna, chēnga muantsobena jinŷama, jouenama y ainaniñe josértama;

y chca, chēnga bacna soyēnga amana muantsajbaná y atšbe benache muantishache,

as atše chēnga chayatsebacama ca –cha tojēftsanbema.

16 “Tšēngaftangna oyejuayēnga šmochanjoyena, er šmondobomna bominŷe y matscuašēnga Bēngbe Bētsabe soyēnga jinŷama y jouenama.

17 Ndegombre cbéyana, banga Bēngbe Bētsabe juabna oyebuambnayēnga y nyetsca soyēnguiñe tšabá amēnga tmonjánbošena chē

tšëngaftanga šmontsonjá soyënga jinjama, y ndoñe chemátaninje; tmonjánbošena chë tšëngaftanga šmontsuenana soyënga jouenama, y ndoñe chemátanuena ca” —Jesús tojanëyana.

*Jesús chë jenabe cuentama tojanabuayená
(Mc 4.13-20; Lc 8.11-15)*

¹⁸ “Chcasna, oído šmochjajajo; chë jenabe cuento mëntšá endayana:

¹⁹ Chë Bëngbe Bëtsabe amëndayama tmojouena y ndoñe tontsésertana entšanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentšana jabëtsabuajuanama, chënga chiñe ndoñe chamondëtsošbuáchema.

²⁰ Y chë ndëtšbenguiñe yojuatquécjana jénaye entsemna mo chë aíñe Bëngbe Bëtsabe palabra tmojouena y Bëngbe Bëtsabeñe jtsošbuáchiyama oyejuayënga tmojtsemna entšangcá;

²¹ pero ndoñe nyets tempo chana jocochájuana, y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inyënga chëngbioye mochantsëbuayënja y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonjaye.

²² Chë uchmëshangañe yojuatquécjana jénaye entsemna mo chë Bëngbe Bëtsabe palabra tmojouena entšangcá, pero quem luarentša soyëngaca oyejuayënga jtsemnana yapa mochántsenojuabnaye y mallajta crocénana y ba soyënga jtsebomnana mochántseboše. Chíyeca

chënga Bëngbe Bëtsabe palabra jtsebnëtjombana y ntšamo cha tojayancá ndoñe ntsamana.

23 Pero chë uanguanëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entšangcá. Mo canye betiye puerte tšabá tojtseshajuancá, chënga bëtscá tšabe soyënga Bëngbe Bëtsabiana mochántsama. Inyengna ínýengbiana más bëtscá soyënga mochántsama, y chca, ínýenga jtsemnana mo chë patse meshënga tojanshajo jenaycá, ínýenga mo chë chnënguana bnëtsancá y ínýengna mo chë unga bnëtsana meshënga tojanshajo jenaycá ca” —Jesús tojanabuayená.

Chë tríguañe bacna shacuanama cuento

24 Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canye boyabása chabe jajañe yojáje.

25 Pero nyetscanga imojtsomañe orna, chabe uayayá yojáshjango y chë trigo jeniñe bacna shácuana yojesejé y yojtsatoñe.

26 Y chë trigo yojuájua y ya yojtseshajuana orna, chë bacna shácuañenaca yojuábocna.

27 As chë peonga imojá chë nduiño jauyanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuana chiñe tojuábocna ca?’

28 Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuana jetsejashtsëtsama ca?’

29 Pero chë nduiño yojáuyana: ‘Ndoñe. Chë bacna shácuana šmojtsejashtsëtsana ora, chë trígnaca šmattsejashtse ca.

³⁰ Más tšabana, cachcá mochjonÿaye cánÿiñe chaójuama, chë jaja saná játbanama tempo chaojobuáchëntscuana. Chora chë trabájayënga chanjichamuá y chanjámëndaye natsana chë bacna shácuana chamotsejashtsëtse y chamotsentsacuacjuá jtsejuinÿiyama, y chentšana chë shajuana chamuatbaná y atšbe grano uaquëcjnaye yebniñe chamotsatsuamá ca’ ” —Jesús tojánayana.

Chë mostaztiye jenayama cuento

(Mc 4.30-32; Lc 13.18-19)

³¹ Jesús mëntšánaca tojanacuntá: “Bëngbe Bëtsabe amëndayana endmëna mo canÿe mostaza betiye jenaycá, canÿe boyabása chabe jajañe yojáje.

³² Ndegombre, nÿetsca jenayëngama chë mostaza jénaye chë más básetema endmëna, pero tojójua orna, chë jajañentše chë más bëts betiye jóbemana. Tša bëts betiye jtsemnana, chíyeca ba buacuashangá jtsabomnana y chë jaja shloftšënga jana y chiñe uajajonëtemëngá jauábopormana ca’ —Jesús tojánayana.

Chë levadurama cuento

(Lc 13.20-21)

³³ Quem inÿe cuétnaca tojanëyana: “Bëngbe Bëtsabe amëndayana endmëna mo levadurcá; canÿe shembása chana jenájuabana unga medida arninÿañe, nÿetsana chauabochama ca.”

Ndáyeca Jesús entšanga cuentëngaca yojanabuayiyiná

(Mc 4.33-34)

³⁴ Jesús nÿetsca chë soyëngama lempe cuentëngaca entšanga jtsëtsësnayana, y

cuenténgaca ndóñesna ndoñe yonjanoyebuambná.

³⁵ Chca yojamna ndayá cachcá chaochnënguama ntšamo chë Bëngbe Bëtsabe juabna oyebuambnayá tojanayancá, mëntšá:

Jabuátambamna cuenténgaca chanjóyebuambaye;
chanjayana chë iytëmena soyëngama y
chë entsanga ndoñe mondétatšëmbo
soyëngámnaca;

Bëngbe Bëtsá quem luare tojanma orscana chë
soyënga yomna ca –cha tojánayana.

Chë tríguañe bacna shácuana cuentama Jesús tojanabuayená

³⁶ Chentšana Jesús chë entsanga tojtanichamó y yebnoye tojtanamáshëngo. Chentšna chabe uatsjédayënga tmojanimpadá ndayá chë bacna shacuanama cuento betsayancá chauabuayenama.

³⁷ As Jesús tojanéyana: “Chë tšabe jénaye jená endmëna chë Bëngbe Bëtsá Entšá tbojanbemá,

³⁸ y chë jajañna, quem luare. Chë tšabe jénaye entsemna chë Bëngbe Bëtsabe amëndayoye mochjámashjna entsanga, y chë bacna shácuana entsemna chë bacna bayëjëngbe amëndayabe entsanga,

³⁹ y chë uayayá, chë bacna shácuana yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotémënga.

40 Ntšamo chë bacna shácuana jtsejashtsëtsana y iñoye jtsatmetšana jtsejuinÿiyama, cachcá echántsemna quem luare jopochócama te.

41 Chorna, chë Bëngbe Bëtsá Entšá tbojanbemá chabe angelotémënga echanjichamuá chë ínÿenga bacna soye chamomama amënga y chë bacna soyënga amënga chabe amëndayentšana chamot-sajuanayama.

42 Y chora chëngbioye chë uabouana iñeshoye mochantsésetjango y chentše puerte mochanjenóbošachna y chë tsetšanama juatsašënga mochantsenoftëšjojnaye.

43 Chora, chë ntšamo Bëngbe Bëtsá yomandacá amëngna corente mo shinÿcá mochantsebuashinÿinÿana chëngbe Taitá, Bëngbe Bëtsabe amëndayoca. Chë jouenama tmojtsobenënga, šmochjouena ca” —chora Jesús tojánayana.

Chë fshantsiñe uaiytëmena bomnanama cuento

44 “Bëngbe Bëtsabe amëndayana endmëna mo chë fshantsiñe uaiytëmena bomnancá. Canÿe boyabása chë bomnana yojuinÿena y chentšana iytëcana cachentše yojesatbontsá. Corente oye-juayá yojtá, nÿetsca chabe bomna soyënga yojet-satobuiye y chentšana chë fshantse yojtobuámiñe ca” —Jesús tojánayana.

Chë corente uámana fñantse ndëtsëtémama cuento

45 “Mo canÿe entšá uámana fñantse ndëtsëtémënga obuamnañacánaca endmëna chë Bëngbe Bëtsabe amëndayana.

46 Chana, canÿe corente uámana ndëtsëtëma yojinÿena ora, yojtá y lempe chë inabomna soyënga

yojetsatobuiye y chë ndëtsëtema yojtobuámiñe ca”
—Jesús tojánayana.

Chë atarraiëshama cuento

⁴⁷ “Bëngbe Bëtsabe amëndayana endmëna mo canÿe atarraiëshacá, buyeshoye jutšenana y nÿetsca beonga jashebuáyana.

⁴⁸ Chë atarraiëshasha jútjena tojtsamna orna, chë beonga ashebuánayënga jtsashëbjátsëcana, tsachoye juyambana y chentše juatbemana chë beonga jabocacayama; chë tšábenga sbarëquënguiñe juatsuámana y chë ndoñe tšábengna jtsëtšanana.

⁴⁹ Cachcá echanjochnëngo quem luare jopochócama tempo chaojobuache ora. Chë angelotëmënga mochanjábocana chë tšabe entšángbentšana bacna entšanga jaluárama,

⁵⁰ y chë bacna entšangna chë uabouana iñeshoye mochántsatquëcjaye, y chentše puerte mochanjenóbošachna y chë tsetšanama juatsašënga mochantsenoftësjojnaye ca” —Jesús tojanacuntá.

Anteo y tsëm uámana bomnana

⁵¹ Chora chabe uatsjëndayënga Jesús tojanatjá: — ¿Lempe chama quecmojtsësertana ca?

Y chënga tmojanjuá: —Arseñor, aiñe ca.

⁵² As Jesús tojanéyana: —Canÿe ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bëtsemnama cha tojtsatsjendá orna, mo canÿe yebnentša nduiñcá cha jtsemnana. Chë nduiña chabe grano uaquëcjnaye yebnocana

anteo y tsēm uámana bomnana juabocnana. Cachcá chē ley abuatambayá, Bēngbe Bētsabe soyēngama jtsabuátambayana chē tempo Bēngbe Bētsá tojanoyebuambá soyēngama y chē tsēm soyēngnaca Bēngbe Bētsabe amēndayama ca — tojanéyana.

Jesús Nazaretoca

(Mc 6.1-6; Lc 4.16-30)

⁵³ Jesús chē soyēnga jacuéntama tojanpochocá ora, chentšana tojtsanoñe.

⁵⁴ Y cachabe luaroye tojtanashjango y chentša judiēngbe enefjuana yebnentše tojanontsé jabuátambama. Entšanga ojnánēnga imojtsichamo: —¿Chē lempe yojtsetatsēmhcá ndēmoca mua tojuatsjinye ca? ¿Ntsamo nantsobena chca bēts soyēnga jamama ca?

⁵⁵ ¿Mua ndoñe yondmēna chē calpinterbe uaquiñá y chabe mamá ndoñe María? ¿Mua ndoñe yondmēna Santiago, José, Simón y Júdasbe catšata,

⁵⁶ y chabe uabénanga ndoñe muentše bēngaftaca mondoyena? ¿Ndayentšana lempe chca mua yojtsebomna ca? —chēnga imojtsichamo.

⁵⁷ Y chē causa chē entšanga tmojanotjayaná y ndoñe imontseboše cha joyeunayana. Pero Jesús tojanéyana: —Nyetsquénache canye Bēngbe Bētsabe juabna oyebuambnayá bētsá jabemēngana, pero cachabe luarentše, cachabe yebnentše ndoñe ca.

⁵⁸ Chíyeca chentše Jesús ndoñe tonjēftsanna ba bēts soyēnga Bēngbe Bētsabe obenánaca, chē entšanga chábeñe ndoñe montsanošbuaché causa.

14

Ntšamo Juan chë Ubayaná tojanóbana (Mc 6.14-29; Lc 9.7-9)

¹ Chë tempo, Rey Herodes, chë Galileoca mandayá tojanuena ntšamo nyetsca entšanga Jesucristbiana imojtsichamcá.

² As cha chabe oservénënga tojanéyana: “Mua Juan chë Ubayaná ctsemna, obanënguentšana tojtayena, chíyeca chca obenana bëts soyënga jamama yojtsebmna ca.”

³ Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámíama. Herodes chca tojanma Herodíasbe causa, chabe catšata Felipbe shema.

⁴ Juan Heródesbioye mëntšá ibnauácacana: “Ndoñe quenátslesenciana aca acbe catšatbe shémaftaca jobouamayama, acbe catšata cabá ainá yotsomñe ora ca.”

⁵ Y chama Herodes yojtseboše Juan jóbana, pero entšangbiana yojtsauatja, er chënga imnajuabnaye Juan ndegombre Bëngbe Bëtsabe obenánaca yojanoyebuambná ca.

⁶ Pero Heródesbe cumpleño oboyejuaye ora, Herodíasbe bembe entšangbe delante tojanlantsá y Herodes puerte chama yojtsóyejuaye.

⁷ Chíyeca Herodes, jajúrase, tbojanšbuachená ndayánaca jatšetayana, ntšamo tbojotjañcá.

⁸ Y Herodíasna lempe bémbëbioye ibojabuayená ntšamo Herodes jojuama. As chë bembe tbojaníyana: “Canýe šcneniñe Juan chë Ubayanabe bestšaše šmatšetá ca.”

9 Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnama.

10 Y as tojanmandá chë Juan yojanëtámenoca chabe bestšaše chamuetséstjanguama.

11 Chentsana, canye šcneniñe chë bestšaše tmojanamba y chë tobiaše tmojanëntšabuaché y chana, chabe mamábioye.

12 Chentsana, Juanbe ústonënga tmojánashjajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojancuentá.

Jesús shachna uaranga boyabásenga saná tojanacaredadó

(Mc 6.30-44; Lc 9.10-17; Jn 6.1-14)

13 Jesús chca tojanuena ora, canye barquëshañe tojtsanoñe canye bën luaroye, entšanga ndoyena luaroye. Pero entšanga chama imojátatšëmbona y chë pueblënguentsana tmojánbocana shecuátseca cha juastama.

14 Chentsana, chë barquëshoicana tojtanastjango ora, Jesús ba entšanga tojánanye, chë cha tmojánguanguënga. Chëngbiamama tbojanongmé y chë entšanguentsana ba šoquënga tojanashná.

15 Ya jetiñe yojtsemna, chíyeca chë uatsjédayënga Jesúsbioye tmojanobeconá y tmojanianyana: –Ya jetiñe entsemna y quem luariñe ndocná quenatiyena. Entšanga cuantichamuá, pueblotémëngoye chamotsoñama, saná chamobuámiñama ca.

16 As Jesús tojanějua: —Ndoñe quenátsiyta chënga chamotsatoñama. Tšëngaftanga saná šmochjacaredádaye ca.

17 Y chënga tmojanjuá: —Muentše tondaye queftsátsbomna; nýe shachna tandëse y uta beónata ca.

18 As Jesús tojanéyana: —Chë soyënga moye miyëbo ca.

19 Chentšana Jesús tojanmandá entšanga chamoshëntsjatbiamama. Chorna, chë shachna tandëse y chë uta beónata tojanca, celaye tojanontješé y Bëngbe Bëtsábioye chama tbojtanchuá. Chora chë saná tojanjatá, chabe uatsjëndayënga tojanējátaye, y chëngna nýetsca entšanga tmojanacaredadó.

20 Nýetsca entšanga tmojanse jtoshachaye nýetsá y cabá chë ojamnëtémëngaca bnëtsana uta sbarëcua tmojanajutjé.

21 Chë tmojansënga imojamna mo shachna uaranga boyabásenga, shembásenga y básenga ntjacuntacá.

*Jesús béjaye juatsbuacá yojtsaye
(Mc 6.45-52; Jn 6.16-21)*

22 Chentšana, Jesús chabe uatsjëndayënga tojanamëndá chë barquëshoye jtamashjna y chë uafjajónaye chenguánoica chabe natsana jashjaj-nana. Chëntscuana Jesús entšanga yojtichamuá.

23 Nýetscanga tojtanichamó orna, Jesús canýe tjoye tojántsjua canýa jtsemnama, Bëngbe Bëtsáftaca jencuéntama. Yojaibétata ora, cha canýa chentše yojtsemna,

24 y chë barquëshana tsachocana bënoca yo-jtsamna. Y chë olëshënga chë barquëshana yo-jtsájantsetaye, chë binÿia chëngbe contra yo-jtsemna causa.

25 Ya bínÿanoyna, Jesús chëngbioye yojobeconá; bėjaye juatsbuacá yo-jtsaye.

26 Chabe uatsjéndayënga chca cha tmojáninÿe orna, tša imojocochauatjaná y puerte auatjanánënga tmojanoyó: —¡Canÿe añemëse entsemna ca!

27 Pero chora Jesús tojanëyana: —¡Añemo šmochtsebomna, atše Jesús sëndmëna; ndoñe matauatjëngana ca!

28 Chora Pedro, Jesúsbioye tbojanianyana: —Bëngbe Utabná, ndegombre aca tcojtsemnëse, momandá atše bėjaye juatsbuacá ácbioye chayá ca.

29 Y Jesús tbojanianyana: —Mabo ca.

Chora Pedro chë barquëshoicana tojánastjango y tojanontsé bėjaye juatsbuacá Jesúsbioye jama.

30 Pero chë binÿia tša jabuache yo-jtsemnama tojáninÿe ora, Pedro puerte yo-jtsauatja y tbojanontsé jtsenatjëmbambana. Chíyeca cha jabuache tojanchembo: —¡Bëngbe Utabná, šmatsbocá ca!

31 Y cachora Jesús tbojtano buácuëtëntsiye y tbojanianyana: —¡Tša batšatema ošbuachiyá! ¿Ndáyeca ndoñe bëtscá átšbeñe contsošbuaché ca?

32 Chentšana chë barquëshoye chata tbojtanamáshëngo y cachora chë binÿia bonguana yo-jtsatsmëna.

33 Y chora, chë barquëshoye imojtsemnënga Jesusbe shecuatšentše tmojanoshamentsé y

tmojanियana: —¡Aca ndegombre Bëngbe Bëtsabe Uaquiñá comna ca!

Genesaret ca uabáinoca, Jesús ba šoquënga tojanashná

(Mc 6.53-56)

³⁴ Chë uafjájónaye tmojánenashbuachengo y canýe luare Genesaret ca uabáinoýe tmojánashjajna.

³⁵ Chentša entsanga Jesús tmojantëmbá ora, chë luarentša nýetsca entsanga chama tmojántatšëmbona. As chë entsanga chëngbe šoquënga Jesúsbioýe tmojanënatse.

³⁶ Y imojtseimpadana nýe mo chabe entsáyá sibiájuanaca juabojajuama chë šoquënga chaualesenciama. Y nýetscanga chabe entsáyá sibiájua tmojanábojajënga, shnánënga imojtsatoquédaye.

15

Ndáyeca canýe entsá Bëngbe Bëtsabe delante ndoñe tšabia nántsemna

(Mc 7.1-23)

¹ Chora básefta fariseunga y judiëngbe ley abuátambayënga, Jerusalenocana tmojánabënga, Jesúsbioýe tmojanobeconá y tmojanियana:

² —¿Ndáyeca acbe uatsjëndayënga ndoñe montsama chë ntšamo bëngbe bëts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábenga jtsatsmënama ca?

³ As Jesús tojanëjua: —¿Y ndáyeca tšëngaftanga ndoñe šmontsama ntšamo Bëngbe Bëtsá

tojanmandacá, n̄ye cach t̄šəngaf̄tangbe b̄əts̄ətsanga
imn̄étsama soȳənga jtsamama ca?

⁴ B̄əngbe B̄ətsá m̄ənt̄sá tojanmandá: “Acbe
b̄əts̄ətsata st̄əts̄oye ndoñe cat̄jáquedaye”, y “nda
cachabe b̄əts̄ətsatb̄iama podesca tojóyebuambase,
chana jóbanama jtsemnana ca.”

⁵ Pero t̄šəngaf̄tanga šmond̄b̄étsichamo can̄ye
ent̄sá canobena chabe taitá o chabe mamá
jauyanana: “Lempe nt̄samo s̄ənd̄bomncá B̄əngbe
B̄ətsá jas̄erviama entsemna, chíyeca tondaye
quets̄átsbomna aca juajabuáchama ca”;

⁶ y šmond̄b̄étsichamo n̄ye ndánaca chca
tojayan̄ese, ya ndoñe ntsemnana chabe taitá
o chabe mamá st̄əts̄oye ndoñe ntjaquédana, ni
ntjuajabuáchana ca. Y chca, t̄šəngaf̄tangb̄iama
tondaye ntsámanana nt̄samo B̄əngbe B̄ətsá
tojanmandacá, y aín̄e šmontsama nt̄samo
t̄šəngaf̄tangbe b̄əts̄ətsanga imojanamancá.

⁷ ¡Bacna ent̄šanga, nt̄samo ndegombre
šmojuabnacá ndin̄ȳin̄ȳnaȳənga! N̄ye t̄šabá
ch̄ə B̄əngbe B̄ətsabe juabna oyebuambnaya
Isaías t̄šəngaf̄tangb̄iama tojanoyebuambá, m̄ənt̄sá
tojánayana ora:

⁸ B̄əngbe B̄ətsá tonjayana: “Quem ent̄šanga
mond̄b̄étsichamo B̄əngbe B̄ətsá t̄ša t̄šabia
yomna ca; chca n̄ye uayásaca,
pero ch̄əngbe ainanent̄še at̄sb̄iama ndocna t̄šabe
juabn̄əngaca.

⁹ Ch̄ənga n̄ye bonamente mond̄b̄étsichamo: B̄əngbe
B̄ətsá t̄ša t̄šabia yomna ca;
ch̄ənga n̄ye ent̄šangbe mand̄ənga jtsabuátambayana
y B̄əngbe B̄ətsabe mand̄ənga ndoñe ca” —cha
tojánayana.

10 Chentšana Jesús entšanga tojánachembo y tojanéyana: —Smochjouena y chacmésertá.

11 Ndayá entšá tojtsesacá, ndoñe quebochátsbema Bëngbe Bëtsabe delante ndoñe tšabia. Inyetsá comna: ndayá entšá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

12 Chora chë uatsjéndayënga Jesúsbioye tmojanobeconá y tmojanianyana: —¿Quéctsetatšëmbo, ntšamo tconjayanama chë fariseunga ndoñe tšabá chenatëuénana ca?

13 As Jesús tojanéjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nýe entsangbe buatëmbana soyëngaca.

14 Cachcá mónýaye; chënga montsemna mo jtanënga inýe jtanënga unachayëngcá. Y canýe jtaná inýe jtaná tbojtsánachase, nýets útata canýe tbuabentšë bochanjetsótsatšë ca —Jesús tojánayana.

15 Chora Pedro, Jesúsbioye tbojanianyana: — Ntšamo chë cuento bétsayanama šmabuayená ca.

16 As Jesús tojanéjua: —¿Tšëngaftángnaca cabá ndoñe cmontsésertana ca?

17 ¿Cabá ndoñe cmontsésertana lempe ntšamo šmojascá uafšbioye jomashënguana y chentšana cuerpentšana jtabocnana?

18 Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšábenga jábiamana.

19 Ainanocana jtsóbocanana bacna juabnënga: jenóbama, shema o boyábioye ínÿaftaca jaíngñama, shembása o boyabásaftaca bacna soye jamama, jatbëbama, jobostérama y ínÿabiamama jtsayátsenayama.

20 Chë soyënga cocayé jtsobenana entsábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tšabia jabemama ca —Jesús tojánayana.

*Canÿe shembása inÿe luarocana ashjanganá
Jesúsbeñe yojtsošbuaché*

(Mc 7.24-30)

21 Jesús chentšana, Tiro y Sidón luarëngoye tojt-sanoñe.

22 Canÿe shembása Caná luarocá chentše inoyena; cha Jesúsbioye yojobeconá y mëntsá yojtsáyebuache: —¡Utabná, Rey Davídbentšana Entšá, šmotselastemá! ¡Atšbe bembe puerte entsesuf-rina, bacna bayëjbe juabna entsebomna causa ca!

23 Jesús ndocá tbonjanjuá. As chabe uat-sjëndayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

24 As Jesús tojánayana: —Bëngbe Bëtsá atše šonjichmó jtsanÿenama nÿe chë entsanga, chë mo ótsena oveshëngcá imomnënga Israeloquënga, y chë ndoñe judiëngna ndoñe ca.

25 Pero chë shembása tojána, Jesusbe shecuatšentše tojanoshamentšé y tbojanियana: —¡Utabná! Diosmanda pavor šmotsebema. ¡šmotsajabuache ca!

26 Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbioye tchojuajabuache y chëngbioye ndóñesna, nántsemna mo chë básengbe saná chënga cuaftsëbaquëcá y quešënga ftsëbuajocá. Chca jamana ndoñe tšabá quenátsmëna ca.

27 As cha tbojanjuá: —Arseñor. Pero chë quešëgnaca chëngbe nduiñëngbe mesëshentsana tmojatquëcjanatemënga mondbase, chë nduiñënga tmojtsesá ora. Chcasna, Diosmanda šmotsajabuache ca.

28 Chora Jesús tbojanijana:

—¡Shembása, Bëngbe Bëtsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtsatsmëna.

Jesús ba šoquënga tojanashná

29 Jesús chentšana tojëftsanbocna y chë Galilea uafjajónaye tsachoye tojána. Chentšana, canye batsjoye tojántsjuá y choca tojanótbema.

30 Mallajta entšanga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatsëntše tmojanéshejango y cha nyetscanga tojanashná.

31 Y chca orna, chë entšanga tmojáninye: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanëngna yojtsëbinýna; y chama chënga corente ojnánänënga imojtsemna. Chora chënga

tmojanontsé jëtschuayana chë Israelentša entsanga imojánadorana Bëngbe Bëtsá.

Jesús canta uaranga boyabásenga saná tojanacaredadó

(Mc 8.1-10)

³² Chentsana Jesús, chabe uatsjëndayënga tojánachembo y tojanëyana: —Quem entsangbiana šontsengmena, er ya unga te chënga átšeftaca muentše montsemna y jasama tondaye quemátsbomna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuatécja ca.

³³ As chabe uatsjëndayënga tmojanatjá: —¿Ntsamo muatjobenaye quem luarentše, ndocna entšá ndoyenentše, chëfta entsangbiana saná jinÿenama ca?

³⁴ Y Jesús tojanatjá: —¿Bueta tandëse šmojtsebomna ca?

Y chënga tmojanjuá: —Canÿsëfta tandëse y básefta beonatémënga ca.

³⁵ Chora Jesús tojanamëndá nÿetsca entsanga fshantsiñe chamotbiamama.

³⁶ As chë canÿsëfta tandëse y chë beonatémënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjëndayënga tojanëjatá. Chentsana nÿetsca entsángbioye tmojanacaredadó.

³⁷ Nÿetsca entsanga tmojanse jtoshachaye nÿetšá. Y chentsana cabá canÿsëfta bëts sbarécua tmojanajutjé chë tojanójamëtemëngaca.

³⁸ Chë tmojansënga imojamna canta uaranga boyabásenga, shembásenga y básenga ntjacuntacá.

³⁹ Chentšana Jesús, chë entšanga tojtanichamó, barquëshoye tojánamashëngo y Magadán luaroye tojtsanoñe.

16

*Chë fariseunga y saduceunga tmojánbošena
Jesús chaoma canye bëts soye
(Mc 8.11-13; Lc 12.54-56)*

¹ Fariseunga y saduceunga tmojána Jesús jinŷama, y jisháchichiyama imojtseimpadana canye bëts soye chaoma, as jtsetatšëmbuama Jesusbe obenana ndegombre Bëngbe Bëtsábiocana tainóbocanama.

² Pero Jesús tojanëjua: “Tšëngaftanga jetiñoye šmondbétsichamo: ‘Yëfse tšabe te echántsemna, er celoca buánganiñe entsemna ca.’

³ Y cachëse šmondbétsichamo: ‘Mënté echanjuafté, er celoca buánganiñe y ibetiñe entsemna ca.’ Tšëngaftanga celoye jontješiyëse, ntšamo chë tempo yochtsemnama tša tšabá jayanama šmojtsobenëse, ¿ndáyeca ndoñe šmontsobena jtsetatšëmbuana ndaye bëts soye Bëngbe Bëtsá quem tempo cmojtsinŷanŷnama?

⁴ Quem puerte bacna entšanga y ndošbuáchiyënga montseboše atše canye bëts soye chaima, obenana jinŷanŷiyama; pero ndoñe chca quemochátinŷe, sinó nŷe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá ca” —Jesús tojánayana.

Chora Jesús tojésanabashejuana y chentšana tojtsanoñe.

*Jesús tojanabuayená chë fariseungbe
buatëmbana soyëngama
(Mc 8.14-21)*

⁵ Chë uafjajónaye chenguanocana chënga tmo-
jtanabo ora, chë uatsjëndayënga yojésebnëtjomba
tandëse jesocñana.

⁶ Chora Jesús tojanëyana: —Smochtsantjesna;
cuedado šmochtsebmna chë fariseunga y sa-
duceungbe levadurama ca.

⁷ Pero chë uatsjëndayëngna imojtsenatsëtsnaye:
—Chca entsichamo, bënga tandëse ndoñe tmonje-
socñama ca.

⁸ Jesús chë soye yojtsetátšëmbo; chíyeca
mëntšá tojanëyana: —¿Ndáyeca tandëšama
šmojtsenatsëtsná ca? ¡Tša batšatema ošbuáchiyana
šmobomna!

⁹ ¿Cabá ndoñe cmontsësertana y ndoñe
šmontsabouínÿna chë shachna tandëšentsana
shachna uaranga entšanga sënjanëjuatšema y
bnëtsana uta sbarëcua šmonjánajutjema?

¹⁰ ¿Y ndoñe šmontsabouínÿna chë canÿsëfta
tandëšentsana canta uaranga entšanga
sënjanëjuatšema y canÿsëfta sbarëcua
šmonjánajutjema?

¹¹ ¿Ndáyeca ndoñe cmontsësertana atše
tandëšama ndoñe sëntsóyebuambnama? Cuedado
šmochtsebmna fariseunga y saduceungbe
levadurama ca —Jesús tojanëyana.

¹² As chora chë uatsjëndayënga tojanësertá, Jesús
ndoñe tonjánayana chë tandëšentsa levadurama
cuedado jtsebmnanana ca, sinó ndayá chë farise-
unga y saduceungbe buatëmbana soyëngama.

*Pedro tojánayana, Jesús chë Cristo bétsemnama
(Mc 8.27-30; Lc 9.18-21)*

¹³ Jesús, Cesarea de Filipino luaroye tojánashjango ora, chabe uatsjéndayënga tojanatjá: —¿Nda ca entsanga imojtsichamo chë Bëngbe Bëtsá Entšá tbojanbemá yojtsemna ca?

¹⁴ Chënga tmojanjuá: —Báseftanga montsichamo Juan chë Ubayaná ca, ínÿengna Elías ca, ínÿengna Jeremías y ínÿengna tempsca inÿe Bëngbe Bëtsabe juabna oyebuambnayá ca.

¹⁵ As Jesús tojanatjá: —Y tsëngaftangna, ¿nda atše bétsemnama ntšamo šmochjayana ca?

¹⁶ Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

¹⁷ Y Jesús tbojanayana: —Simón, Jonasbe uaquiñá, oyejuayá cochanjoyena. Ndocna quem luarentša entsá chë soye checmatinÿinÿé, sinó atšbe Taitá, celoca endmëná.

¹⁸ Y mëntsánaca cbëyana: Mora acna Pedro o chë ndëtsbecá contsemna, y chë ndëtsbeñe atšbe bëts yebna chanjajebo, y ni Satanás, chabe obenánaca entsá jóbanama, queochatobenaye jtsepochoćama.

¹⁹ Atše cbochanjátsetaye obenana, mo llavëfjá, entsanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuénta ora, canÿe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y cháftaca chacojtsencuénta ora, canÿe soye aiñe chaotsemna ca chacojayanëse, Bëngbe Bëtsá echanjayana aiñe chca chaotsemna ca —Jesús tbojanayana.

20 Chentšana chabe uatsjéndayënga tojanamëndá ndocnábeñe ntsecuéntayana cha, Jesús, chë Bëngbe Bëtsabe Uámana Uabuayaná, chë Cristo bétsemnama.

Jesús tojánayana cha ibojamna jóbanana y jtayenana ca

(Mc 8.31-9.1; Lc 9.22-27)

21 Chorscana Jesús tojanontsé chabe uatsjéndayënga jábuayenana cha ibojtsemna Jerusalenoye jama, y chocna chë bëtsëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerte chaopadecema ca. Tojanëyana cha mochjanóba, pero unga tianoye yochtanayena ca.

22 Chora Pedro, Jesús seftaca tojanoluaré y tojanontsé mëntśá uatsëtsnayana: —¡Atśbe Utabná, Bëngbe Bëtsá ndoñe chaondëlesenciá chca chaopasama! ¡Ndocna te quenaisopodena chca ácaftaca jopásana ca!

23 As Jesús tojanobuértana y Pédrëbioye tbojaniyana: —¡Satanás, átśbentšana mojuaná! ¡Aca contseboše atśe canye bacna soye chaśócochënguama! Pedro, acbe juabnënga Bëngbe Bëtsábíocana ndoñe quenatóbocana, sinó nye entśángbentšana ca.

24 Chentšana Jesús chabe uatsjéndayënga tojanëyana: —Nda atśbe uatsjendayá jtsemnama tojtseboše, cháuyana nye Bëngbe Bëtsá yobena sempre chabe vidiñe jtsemándayana ca, chabe quem

luarentša soyënga cachcá chauesonýá atše juastama, y atšbiamá jasúfriama chaotseprontana y cruciñe jobanámnaca.

²⁵ Nda tojtsama quem luarentše bëtscá soyënga jtsebomnana y atšbiamá jasúfriama ndoñe tontseprontana, chë nyetsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, masque chaóbana, chë nyetsca tescama yomna tšabe vida echántsebomna.

²⁶ ¿Ndayama entsá buanjósérvia nyetsca quem luarentša soyënga jtsebomnana, chë nyetsca tescama yomna tšabe vida tojtsoperdese? Ndegombre, canye entsá chë nyetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nyetsca tescama yomna tšabe vida jtsebomnana.

²⁷ Chë Bëngbe Bëtsá Entšá tbojanbemá, chabe Taitabe obenánaca y puerte buashinýinýaniñe echanjabo chabe angelotémëngaftaca, y chora cada cánýabioye bochántatšetaye cachcá ntšamo cada ona tojëftsemcá.

²⁸ Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtsá Entšá tbojanbemá amëndayacá jabana ntjëftsinýcá ca —Jesús tojánayana.

17

Jesús inýetsá tojanobinýná
(Mc 9.2-13; Lc 9.28-36)

¹ Chentšana chnënguana tianoeye, Jesús tojëftsanëbiatše Pedro, Santiago y chabe catšata

Juan, y ínÿoye tojanënatse nÿe chënga, canÿe bëts tÿoye.

² Chentse, chëngbe delante inÿetšá cha tojanobinÿná. Chabe jubiá shinÿcá yojtsebuashinÿinÿana, y chabe uichëtjonëjuangana mo binÿniñcá uafjantsëjuangá yojtsamna.

³ Chca orna, chabe uatsjëndayënga tmojáninÿe Moisés y Elías tbojanobinÿná, Jesúseftaca encuéntaye.

⁴ Chora Pedro, Jesúsbiöye tbojanianyana: “Bëngbe Utabná, itša tšabá bëngbiama cuanmëna muentše jtsemnana ca! Tcojtsebošëse, unga tambotëmënga atše chjapórma: cánÿetema acbiama, ínÿetema Moisesbiama y ínÿetemna Elíasbiama ca.”

⁵ Pedro chca yojtsóyebuambnantscuana, canÿe buashinÿinÿana jantšetëshe nÿetscanga yojáutsbotse. Y chë jantšetëshoicana canÿe oyebuambnayana tmojanuena mëntšá: “Mua atšbe bonshana Uaquiñá endmëna, atše chabiama sëntsoyejuá. Cha šmochtseyeunana ca.”

⁶ Y chë uatsjëndayënga chca tmojanuena ora, tmojanoshamentšé y jubiaca fshantsóntscoñe tmojanotsejbéna, puerte auatjanánënga.

⁷ Chora Jesús chabe uatsjëndayëngbiöye tojanobeconá, tojánabojajo y tojanëyana: “Matëtsbananga; ndoñe matauatjëngana ca.”

⁸ Y tsbanánoye tmojanontješé ora, Jesús nÿe canÿa tmojáninÿe, ndocná inÿa más.

⁹ Chë tjocana imojtsatstsmaye ora, Jesús tojanamëndá: —Bëngbe Bëtsá Entšá tbojanbemá obanënguentsana candëtayenëntscuana,

ndocnábeñe chë šmonjinÿe soyama šmattsecuéntaye ca.

10 As chë uatsjéndayënga Jesús tmojantjá: — ¿Ndáyeca chë ley abuátambayënga mondbétsichamo, canmëna Elías jabana chë Bëngbe Bëtsabe Uámana Uabuayanabe natsana ca?

11 Chora Jesús tojanëjua: —Ndegombre canÿa Eliascá natsana echanjabo y ntšamo jtsemnama yomncá, lempe echánjabatsma ca.

12 Pero atše cbëyana, canÿa mo Eliascá ya tonjabo, entšanga ndoñe chematanotëmbá y cháftaca entšanga tmonjanma lempe ntšamo tmojanbošencá. Y cachcá, chë Bëngbe Bëtsá Entšá tbojanbemá entšangbe cucuatšiñe echanjasúfria ca —Jesús tojánayana.

13 Chora chë uatsjéndayënga tojanësertá, Juan chë Ubayanabiama Jesús chca yojtsëtsëtsnama.

*Jesús, canÿe bacna bayëja tbojanbojuaná
(Mc 9.14-29; Lc 9.37-43)*

14 Entšanga imojtsemnoye chënga tmojtanash-jajna ora, canÿe boyabása tojanobeconá, Jesusbe natsanoica yojoshamentšiye y tbojanianyana:

15 —Utabná, atšbe uaquiñá motselastemá. Cha ataque bontsësháchichana y puerte entsesufrina, er cha inÿe ora iñoye jtseshajayana y inÿe orna, buyeshoye jtsoshbuetšana.

16 Acbe uatsjéndayëngbioye cha sënjuánatse y ndoñe chematobená jtseboshnama ca —cha tbojanianyana.

17 As Jesús tojánayana: —¡Nÿetsá ndošbuáchiyënga y bacna entšanga ca! ¿Buetayté šojtsemna tšëngaftangaftaca jëftsemnana? ¿Buetayté uantado

tšəngaftangafaca chjəftsemna? Moye chə básetema mánatse ca.

18 Chora Jesús, chə basetémbeñe bacna bayəjbioye tbojanácacana y chábentšana cha tojésanbocna. Cach orscana chə básetema tšabá yojtsatsmēna.

19 Chentšana, chə uatsjéndayənga luaroca Jesúseftaca tmojanoyebuambá y tmojaniyana: — ¿Ndáyeca bənga ndoñe fsənjobená chə bacna bayəja jtabocnama ca?

20 Y Jesús tojanəyana: —Tšəngaftanga tša batšatema ošbuáchiyana bomna causa. Ndegombre šcuayana: tšəngaftanga batšatema ošbuáchiyana šmojtsebomněse, masque nyə mo canyə mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšəngaftanga lempe jamama šmattsobena.

21 Pero chca bayəjənga jtəbuacnamna jobenayana nyə Bəngbe Bətsáftaca jencuéntase y chama tondaye ntjascá jtsemněse ca —Jesús tojanəyana.

Jesús cachiñe tojánayana cha ibojamna jóbanana y jtayenana ca

(Mc 9.30-32; Lc 9.43-45)

22 Jesús y chabe uatsjéndayənga cányiñe Galilea luaroye imojétsaye ora, cha tojanəyana: “Chə Bəngbe Bətsá Entšá tbojanbemá entsangbe cucu-atšiče mochanjáboshjona,

23 mochanjóba, pero unga tianoye echántayena ca.” Chə causa chə uatsjéndayənga puerte ngménaca imojtsemna.

Chë Bëngbe Bëtsabe bëts yebnama impuesto jtsat-squëcjnayama

²⁴ Jesús y chabe uatsjëndayënga Capernaumoye tmojánashjajna ora, chë Bëngbe Bëtsabe bëts yebnama entsángbioye impuesto atjanayënga Pédrëbioye tmojána y tmojantjá: —¿Acbe buatëmbayá Bëngbe Bëtsabe bëts yebnama impuesto queonÿbetsatsquëcjnaye ca?

²⁵ Y Pedro tojanëjua: —Aíñe, cha endbetsat-squëcjnaye ca.

Chentšana, Pedro chë yebnoye tojánamashëngo ora, Jesús natsana mëntšá chábioye tbojaniyana: —Simón, ¿ntšamo catjájuaboye? ¿Quem luarentša reyënga ndëmuanÿngbioye impuesto imnétsayëngacaye y crocénana imnétsatjanaye: cach luarentše oyenëngbioye o chë inÿe luarocana ashjajnëngbioye ca?

²⁶ As Pedro tbojanjuá: —Chë inÿe luarocana ashjajnëngbioye ca.

Y Jesús tbojaniyana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquëcjnayana ca.

²⁷ Pero ndocná mal chabonduínÿnanamna uafjajónayoye motsa, anzuelëfjua cochjútšena y chë natsana chaojuásjana beona cochjuábocna. Cochjuayetëfjoná y choye crocénana cochanjínÿena y chánaca echanjoshjache atšbiama y acbiama jëtsjájua. Cochjëftsejatsëca y cochjatsboshjona ca —Jesús tbojaniyana.

¿Nda chë más uamaná yomna?

(Mc 9.33-37; Lc 9.46-48)

¹ Chentšana chë uatsjéndayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

² Chora Jesús canye basetémbioye tbojanchembo y chëngbe tsëntsaca tbojanatsá.

³ Y tojánayana: —Ndegombre cbëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjóyëngacñe, cha ndocna te queochatobenaye Bëngbe Bëtsabe amëndayoye jamashënguama.

⁴ Chca, nda tojtsejuabná canye nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna.

⁵ Y nda átšbeñe ošbuachiyá bétsemnayeca, tbojofja canya mo quem basetembioycá, chana atše jofjana ca —Jesús tojánayana.

Resjo yomna, nderado bacna soyënga cuanjama

(Mc 9.42-48; Lc 17.1-2)

⁶ “Nda canye básetema átšbeñe ošbuachiyábioye tbojaingñe bacna soye jamama, chabiamama más tšabá nántsemna canye bëts nantsnëbé chamotsetamošëntšbua y chë mar bėjaye shbuatsëntsoye chamotsashbuetše chabotsenatjëmbama.

⁷ ¡Tša lastema quem luarentša entsangbiamama, chë inyënga bacna soye jamama chaócochënguama tmojtsamëngbiamama! Njëts tempo chca amënga mochanjëftsemna. Pero, ¡payajema chë inya bacna soye chaomama tojtsamá ca!

⁸ “Chíyeca, acbe cucuátšeca o acbe shecuátšeca bacna soye tcojamëse, cochtsenástjango y bënoye cochtsëtšena. Acbiama más tšabá nántsemna celoye jamashënguana chë nyetsca tescama yomna tšabe vida jtsebomnama, cucuatše ndbomná o cosheto, y ndoñe nyets uta cucuátšeca o shecuátšeca chë nyets tempo echanjesomñe íñeshoye chacmotsëstjango.

⁹ Nderado acbe bomínýeca bacna soye tcojinýe y cachca soye tcojama, chë bominye cochtsenobuchjatsëca y bënoye cochtsëtšena. Acbiama más tšabá nántsemna, celoye jamashënguana nyë canýe bomínýeca, y ndoñe nyets uta bomínýeca infiernoye chacmotsëstjango, chë bëts íñeshoye ca” — Jesús tojánayana.

*Chë ótšena oveshabiamana cuento
(Lc 15.3-7)*

¹⁰ Mëntšánaca Jesús tojánayana: “Ni mo cánýabioye quem tsëm ošbuáchiyënguentsana, chë mo basetemëngcá mondmënënga, mo nduamanacá šmattsonýaye. Ndegombre cbëyana, chëngbe angelotémënga celoca, sempre atsbe Taitá celocáftaca mondtsemna ca.

¹¹ Er chë Bëngbe Bëtsá Entšá tbojanbemá tonjabo chë pochocánënga jtsemnama imojtsajnënga jabátsebacama.

¹² “¿Ntšamo tsëngaftanga šmatjájuaboje? Canýe boyabása patse oveshënga tojtsabamna y ndeolpe canýe chentša oveshá tojtsotše. ¿Chë boyabása ndoñe chë inýe esconëfta bnëtsana y esconëfta oveshënga tjoca cachcá nanjesënyaye, jama chë ótšena oveshá jetsenguanguama?

13 Y chë oveshá jetsinÿenama tojobenase, ndegombre chë boyabása más oyejuayá jtsemnana chë ótsena oveshabiana, y ndoñe nÿa chca chë inÿe esconëfta bnëtsana y esconëfta oveshëngbiana chë ndoñe tmonjanotšëngbiana.

14 Cachcá, tšëngaftangbe Taitá, Bëngbe Bëtsá, chë celoca endmëná, ndoñe quenátsboše ni canÿa quem basenguentšana mo ótsenacá chaotsemna, bacna soyënga jtsamëse oyena causa ca” —Jesús tojánayana.

*Ntšamo cuanjama inÿa japerdónama
(Lc 17.3)*

15 “Nderado acbe catšata, bacna soye tcmojaborlase, cochjá, cánÿata šochjencuénta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tšabá ácaftaca echántsatsmëna.

16 Pero ndoñe tcmojóyeunasna, inÿe útata cochjáchembo chacmotjëmbambama, chca, chata chabouena ntšamo cochjauyanama y chamuayana ndegombre chca yomnama.

17 Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjayana cha yomna mo canÿa Bëngbe Bëtsábioye nduabuatmacá, mo canÿe ndoñe judiycá ca o canÿe bacna entšá mo canÿa Romocama impuesto entšángbioye atjanayacá yomna ca.

18 “Ndegombre cbëyana: Tšëngaftanga Bëngbe Bëtsáftaca chašmojtsencuénta ora, chašmojayana canÿe soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtsencuénta ora, chašmojayana canÿe soye

aíñe chaotsemna ca, Bëngbe Bëtsá echanjayana
aíñe chca chaotsemna ca.

¹⁹ “Mëntšánaca cbëyana: Nderado útata
tšëngaftanguentsana quem luarentše tbojenoyeuná
Bëngbe Bëtsáftaca jencuéntama ndayánaca
jótjañama, Bëngbe Bëtsá chë celoca endmëná
pronto chë soye cmochanjátšataye.

²⁰ Ndayentše útata o únganga tmojénefjna, átšbeñe
ošbuáchiyënga bétsemnama, chentše atše chëngbe
tsëntsaca chántsemna ca” —Jesús tojánayana.

²¹ As Pedro tojána y Jesúsbioye tbojantjá:
—Bëngbe Utabná, ¿atšbe catšata bacna soye
šojaborlase, bueta soye šojtsemna cha
japerdónana? ¿Canÿsëfta soye ca?

²² Y Jesús tbojanjuá: —Ndoñe nÿe canÿsëfta
soyama quechatatsëtsná, sinó canÿsëfta bnëtsana
soye canÿsëfta ca.

Ndayá inopása chë japerdónama ndëbošëngaftaca

²³ Mëntšánaca Jesús tojanëyana:
“Cbochanjáuyana ntšamo Bëngbe Bëtsabe
amëndayana yomnana. Endmëna ntšamo canÿe
réyëftaca tojanopasacá. Cha yojábošena chabe
oservénënga crocénana jtsëtjañana.

²⁴ Jtsëtjañama yojóntša orna, canÿe boyabása
imojuánatse, chë réybioye mallajta crocénana ib-
nandebena.

²⁵ Chë oservená tondaye yonjábomna chë
ndebénama jëtsjájuama; asna chë rey yojamánda
cha chamotsiye nÿets tempo nÿe ínÿabiama
chaotsoservénama, chabe shema y chabe
básengnaca, y lempe ntšamo yojanbomncánaca,
y chca chë ndebénama jtopágama.

26 Chora chë oservená chë reybe shecuatšentše yojoshamentšiye y ibojtseimpáda: ‘Taita, Diosmanda šmotsëuantajema. Atše lempe cbochanjëtsëntsabuachiye ca.’

27 Chë reyna chë boyabásabiama ibojóngmia; as chë ndebénana ibojtseperdóna y ibojëtsboshjona.

28 “Chë oservenana chentšana yojésebcna y benachiñe inye oservenáftaca ibojenbetše, cach mandadbiama trabajayá. Chë inye oservenana nýe batšatema crocénana chábioye ibnandebena. Chora chë oservená chë enutábioye tamošajentšana ibojishache y ibojóntša jtsëtajuashbebiana y mëntsá ibojauyana: ‘¡Ndebénana šmatsëntsabuaché ca!’

29 Chora cha chë oservenabe shecuatšentše yojoshamentšiye y ibojtseimpáda: ‘Diosmanda šmotsëuantajema. Atše lempe cbochanjëtsëntsabuachiye ca.’

30 Pero chë oservená ndoñe yonjábosena, sinó yojama chë inye oservenábioye cárceloye chamotsëtámiamia, chë ndebénana candëtsjájëntscuana.

31 Chë inye oservénënga chca imojinýe ora, puerte yojóngmia y imojá lempe ntšamo yojopasacá chëngbe rey jacuéntama.

32 As chë rey yojamánda chë boyabása jobetšana, y ibojauyana: ‘¡Puerte bacna oservená! Sconjaimpadáyeca, nýets ndebénana tcbontseperdoná.

33 Acnaca cachcá cmondmëna chë cach aquécá muentša trabájayabiama jóngmiana, ntšamo atše acbiama šonjongmecá ca.’

34 Y tša chë rey ibojtsetna; as yojamánda

jabuache chamotsetsetšená n̄yets ndebénana candëtsjáuantscuana ca” —Jesús tojanacuntá.

³⁵ Chora Jesús tojánayana: “Atšbe Taitá, celoca endmëná, cachcá tšëngaftangaftaca echanjama, tšëngaftangbe catsata ndoñe ndegombre n̄yets ainánaca šmonjaperdonase ca.”

19

Ndayá Jesús tojanabuatambá chë bouamnënga tmojtsenëtsenama
(Mc 10.1-12; Lc 16.18)

¹ Chë soyënga tojánayanentsana, Jesús Galilea luarentšana tojtsanoñe y Judeoye tojánashjango, Jordán chenguánoica.

² Ba entsanga tmojanasto y chentše šoquënga tojanashná.

³ Básefta fariseunga Jesúsbioye tmojanobeconá y jisháchichiyama mëntsá tmojantjá: — ¿Queojtselesenciana can̄ye boyá n̄ye ndayámnaca chabe shëmbioye cachcá jeson̄yayama ca?

⁴ As Jesús tojanëjua: —¿Tšëngaftanga ndoñe chë Bëngbe Bëtsabe uabemana palabrënguiñe šmëndualía, Bëngbe Bëtsá, chë entsanga tojanabiamá, quem luare jobojátsama ora “boyá y shema tojánabiamama”?

⁵ Y Bëngbe Bëtsá tojánayana: “Chíyeca boyabása chabe taitá y chabe mamá echanjésabashejuana, chabe shëmaftaca jenútanama, y chë útata mo can̄yacá bochántsemna ca.”

⁶ Y chca, ya ndoñe útata quebochátsmëna, sinó mo n̄ye can̄yacá. Chcasna, entsá ndoñe

chaonděndbema ndayá Běngbe Bětsá mo canyĩñcá tojěftsema soye ca —Jesús tojánayana.

7 Chora chě fariseunga tmojanianyana: —¿As, ndáyeca Moisés tojanmandá, chě shémbioye canyě uabemana tsbuanácha juiiyana jtsenětšenama y cachcá jesonjyayana ca?

8 Y Jesús tojaněyana: —Tšěngaftanga Běngbe Bětsabe manděnga jójyěngacñama ndoñe quešmátsboše causa, Moisés tmojanalesenciá shémbioye jesětšenana. Pero quem luare jobojátšama orna, ndoñe chca quenjatsměna.

9 Atše cběyana, nda chabe shémaftaca tbojt-senětšena y chca tojopasá ndoñe chě shema chabe boyábioye ín्याftaca tbontseingñé causa, y chě boyá ín्याftaca tojtóbouamasna, cha chě nat-sana shémbioye ín्याftaca jtseíngñayana ca —Jesús tojánayana.

10 Chora chabe uatsjěndayěnga tmojanianyana: — Chca chě boyá y shémaftaca tojtsemnēsna, ndoñe tšabá yontsemna jobouamayana ca.

11 Y Jesús tojaněyana: —Njyetscanga ndoñe quemátobena chě palabrěnga jójyěngacñana, nye chě Běngbe Bětsá tojama jójyěngacñama chamobenama, chěngna aíñe.

12 Ba soyěnga comna ndaye causa chě boyabásenga ndoñe ntsobenana jobouamayana. Inyěnga jónyñana jobouamayama ndobeněnga, ín्यengbioye cach entsanga jábiamana jobouamayama ndobeněnga y ín्यengna, njyets tempo nye Běngbe Bětsabe aměndayama oservena causa ca —tojaněyana.

Jesús, basetémengbiama Bëngbe Bëtsábioye tbojanimpadá

(Mc 10.13-16; Lc 18.15-17)

¹³ Entšanga basetémënga Jesúsbioye tmojanënatse, cha chauabojajuama y Bëngbe Bëtsábioye chëngbiama chaboimpadama. Pero chë uatsjëndayëngna tmojanontsé chë basetémënga unachayënga jtsëcácanana.

¹⁴ Chora Jesús tojanëyana: “Cachcá mónyaye chë basetémënga átšbioye chamuabo y ndoñe matéuyanana; er Bëngbe Bëtsabe amëndayana endmëna mo quem basetemëngcá imomnëngbiama ca.”

¹⁵ As chë basetémënga tojánabojajo, Bëngbe Bëtsá jaimpádate; y chentsana cha tojtsanoñe.

Canye bomna bobontse Jesúsbioye tojana

(Mc 10.17-31; Lc 18.18-30)

¹⁶ Chentsana, canye boyabása tojana Jesús jinýama y mëntsá tbojantjá: —Buatëmbayá, ¿ndaye tšabe soye chjama chë nyetsca tescama yomna tšabe vida jtsebomnama ca?

¹⁷ Y Jesús tbojanjuá: —¿Ndáyeca chë tšabe soye ndayá bétsemnama šcojtsetjaná ca? Tšabia nýe canya endmëna: Bëngbe Bëtsá. Aca chë nyetsca tescama yomna tšabe vida jtsebomnama tcojtsebošëse, mandënga cochtsobedecena ca.

¹⁸ Chora chë bobontse tbojantjá: —¿Ndaye mandënga ca?

Y Jesús tbojanjuá: —“Ndoñe catjóba, acbe shema ínýaftaca ndoñe cattseíngñaye, ndoñe catjatbëba, ndoñe catjuaboínýena.

19 Acbe bētsētsata stētšoye ndoñe catjáquedaye y ndēmua entšánaca cochtsebobonshana ntšamo cach aca cuenobobonshancá ca” —Jesús tbojanियana.

20 Chora chē bobontse tbojanjuá: —Atše lempe chca nŷets tempo sēndocumplina. ¿Ndayá más šojtsebuáshbena ca?

21 As Jesús tbojanियana: —Aca lempe tšabá jamama tcojtsebošēse, motsa, acbe bomna soyēnga cochjetsatobuiye y chē crocénana, ndbomnjémēnga cochtsatšataye; chca, bēts uacanana soye celoca cochántsebomna. Chentšana cochjabo y šcochjuasto ca.

22 Chē bobontse chca tojanuena ora, ngménaca yojtsatoñe, cha corente bomná bemna causa.

23 Chora Jesús chabe uatsjéndayēnga tojanēyana: —Ndegombre cbēyana, puerte totcá entsemna canŷe bomnabiamá Bēngbe Bētsabe amēndayoye jamashēnguama ca.

24 Chē bomnabiamá cachiñe šcuatayana: Más paselo entsemna canŷe camello chē coshufjentša atēfjnējana chauachnēngo, y ndoñe canŷe bomná Bēngbe Bētsabe amēndayoye jamashēnguana ca.

25 Chabe uatsjéndayēnga chca tmojanuena ora, puerte ojanánēnga imojtsemna y imojtsichamo: —As, ¿nda yochjobenaye atsbocaná jtsemnama ca?

26 Jesús chēnga tojanēñyanŷé y tojanēyana: —Entšanga ndoñe quemátobena jamama canŷa atsbocaná chaotsemnama, pero Bēngbe Bētsá aíñe, er cha nŷetsca soyēnga jamama endobena ca.

27 Chora Pedro tbojanियana: —Aca contsonŷá, bēnga lempe chē fsēndbomna soyēnga

fsënjéseboshjona y ácaftaca fsëntsajna. As, ¿ndayá bënga fchjójóyëngacñe ca?

²⁸ As Jesús tojanéyana: —Ndegombre cbéyana, nýetsca quem luarentša soyëngama mo tsmécá jtsemnama tempo chaojobuache ora, chë Bëngbe Bëtsá Entšá tbojanbemá chabe buashinýinýana bëts tšenësiñe reycá echanjót bema jtsemándayama; y tšëngaftanga, chë atše šmëstonëngna, chora bnëtsana uta uámana tbemaniñe šmochanjotbiama mo reyëngcá, chë Israeloca bnëtsana uta bëts pamillentsa entsangbiama jayanama tšabá o ndoñe tšabá tmonjamama.

²⁹ Y ndëmuanýenga, atše jasérviamama tmojëftseboshjona cachëngbe yebna, catsátanga o uabénanga, befta o bebmá, básenga o fshantsënga, chë soyëngama patse soye más mochanjójóyëngacñe y chë nýetsca tescama yomna tšabe vídnaca.

³⁰ Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

20

Chë trabájayëngbiama cuento

¹ Mëntsánaca Jesús tojánayana: “Bëngbe Bëtsabe amëndayana endmëna mo canýe bëts jajañe nduiñcá. Chë nduiña canýe te cabá cachëse yojábocna peonga janguanguama, chabe uvas betiyënga jajañe chamotrabajama.

² Chë nduiño peonga yojánýena orna, imojenóyeunaye canýe tescama canýe denario

crocénana jtëbuénayama. As chora vojichamuá chë uvas betiyënga jajoye jatrabájama.

³ Mo base mošenana ora, chë nduiño cachiñe yojábocna y plazoca atsanënga ínÿenga yojanÿe, tondaye ntsamcá.

⁴ As yojáuyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuénaye ca.’ Y chë entsanga imojá.

⁵ Nÿetsto ora y bëts mošenana ora, chë nduiño cachiñe yojábocna y cachiñe cachcá yojopása.

⁶ Mo la cinco ora, chë nduiño cachiñe yojábocna y chenache ínÿenga yojánÿena, tondaye ntsamcá. As yojátjaye: ‘¿Ndáyeca tšëngaftanga nÿets día ntjatrabajacá muentše šmotsomñe ca?’

⁷ Y chënga imojojuá: ‘Ndocná bënga chešnataimpadá causa ca.’ As chë nduiño yojáuyana: ‘Tšëngaftángnaca atšbe uvas betiyënga jajoye motsajna jatrabájama y cbochtëbuénaye ca.’

⁸ “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojášhjajnënguentsana cochjabojátša y chë natsana tmojášhjajnënga ústonoye ca.’

⁹ Y chë mo la cinco ora imojášhjajnënga imojebconá, y cada ona canÿe denario crocénana yojtáyentšbuachiye.

¹⁰ Chentšana, chë natsana jatrabájama imojášhjajnënga yojtsamna jobéconama y chënga imojétsejuabnaye más crocénana mochjanóyëngacñe ca. Pero chëngnaca cach canÿe denario crocénana yojtëbuénaye.

11 Chca imojóyëngacñe orna, chënga imojóntša chë nduiñbiana bacá ichámuana,

12 mëntšá: ‘Quemënga chë ústonoye tmonjáshjajnënga nÿe canÿe horatema tmonjatrabajá; ntšamo bënga šcontëbuenacá, cachcá chënga contëbuená y bëngna nÿets día jabuache fsënjatrabajá y corente jënÿá fsënjauantá ca.’

13 “Pero chë nduiño canÿa chca yojt-sichamuábioye ibojojuá: ‘Sobreno, achiana ndocna ndoñe tšabe soye chiyatsma. ¿Ndoñe canÿe denario crocénana canÿe tescama tbonjenoyeuná ca?’

14 Chcasna, acbe uacanana crocénana mesocñe y motsatoñe. Atše sëntseboše chë ústonoye jatrabájama tojashjanguá jtabuénayana, cachcá ntšamo aca tcojtabuenacá.

15 Chca entsemna, er atše sëndobena atšbe crocénánaca nÿe ndayánaca jamana. ¿O aca envidia cojtsebonna, atše tšabia tsmënana ca?’ ” —cha yojayana.

16 Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnëngna, nduámanënga mochántsemna ca.”

Jesús cachiñe tojánayana cha jóbanama y jtayenama

(Mc 10.32-34; Lc 18.31-34)

17 Chënga Jerusalenoye imojtsaye ora, Jesús barie tojánachembo chabe bnëtsana uta uatsjëndayënga y tojanëyana:

18 “Tšëngaftanga šmontsonÿá mora bënga Jerusalenoye montsajnama. Chocna chë Bëngbe

Bëtsá Entšá tbojanbemá, chë bachnangbe amëndayënga y ley abuátambayëngbe cucuatšïñe mochanjáboshjona, y chënga mochanjayana jóbanama cha ibojtsemna ca,

¹⁹ y chë ndoñe judiëngbe cucuatšïñe mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

*Chë Santiago y Juanbe mamabe impadana soye
(Mc 10.35-45)*

²⁰ Chentsana, Zebedeobe uaquiñatbe mamá chabe uaquiñataftaca Jesúsbioye tojanobconá, chabe shecuatšentše yojoshamentšïye canÿe pavorama jaimpádama.

²¹ As Jesús tbojantjá: —¿Ndayá cojtseboše ca?

Y chë shembása tbojanियana: —Aca reycá cha-cojtsemánda ora, cochjamánda atšbe uaquiñata chabótbema canÿa acbe catsbioica y chë inÿa acbe uañicuayoica, ácaftaca chabotsemándama ca.

²² Y Jesús tojanějua: —Ntšamo šmontsotjanañama, tsëndata ndoñe quešnástatšëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

²³ Chora Jesús tojanějua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catsbioica o atšbe uañicuayoica chašótbemama. Chë útentše entsemna ndëmuanÿengbiama atšbe Taitá tojaprontacá ca.

²⁴ Chë inÿe bnëtsana uatsjëndayënga chca tmojanuena ora, chë uta catsátaftaca tmojanotjayaná.

²⁵ Chora Jesús chë uatsjédayënga tojánachembo y tojanéyana: —Tšëngaftanga šmondétatšëmbo, chë ndoñe judiëngbeñe chë reyënga lempe jtsemándayana nýa mo nduiñënga cuaftsemncá; y chë bëtsëtsa entsangna chëngbe obenánaca jtsemándayana, ndayánaca jtsamëse, chë inýe entsanga sempre chamotsayaunanama.

²⁶ Pero tšëngaftangbeñna ndoñe chca chaondëtsemna. Inýetsá; masna, nda tšëngaftanguentšë chë más uamaná jtsemnama tojtsebošá bontsemna chë ínýenga jtsaservénana.

²⁷ Y ndánaca tšëngaftanguentšá chë más uamaná jtsemnama tojtsebošá bontsemna jtsemnana mo nýe ínýabiama nýets tempo oservenacá.

²⁸ Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá ínýenga jabáserviama. Y mo nda ínýenga játsëbacama cuafjëtsjajocá, cha echanjóbana, ba entsanga atsebácanënga chamotsemnana ca — Jesús tojánayana.

Jesús uta jtanata tojanashná

(Mc 10.46-52; Lc 18.35-43)

²⁹ Chënga, Jericó bëts pueblentsana tmojánbocana ora, ba entsanga Jesús imojtsëstona.

³⁰ Uta jtanata benache juachañe ibnatbemana. Jesús chëjana yojtsachñëjuanama chata tbojanuena ora, tbojanontšë uayebuáchana: —¡Utabná, Davídbentsana Entšá, šmotsalastemá ca!

³¹ Entšanga chë jtanátbioye tmojtsanëcácana iytëca chabotsemnana, pero chatna más ibojtsáyebuache: —¡Utabná, Davídbentsana Entšá, šmotsalastemá ca!

³² As Jesús yojotsaye, chë jtanata tojánachembo y tojanatjá: —¿Ndayá šojtseboše atše tsëndatbiana chjamama ca?

³³ Y chata tbojanjuá: —Utabná, bëndata chabu-atëbínýnama ca.

³⁴ Jesús chatbiana tbojanongmé y tojánabuchbojajo. Cachora chë jtanata tšabá yojtëbinýna y Jesús tmojanasto.

21

Jesús Jerusalenoye tojánashjango (Mc 11.1-11; Lc 19.28-40; Jn 12.12-19)

¹ Ya Jerusalenoca béconana imojtsemna y canýe pueblo Betfagé ca uabáinoca tmojánashjango, canýe tjashe Olivos ca uabáinentše. Chora Jesús uta chabe uatsjéndayata tojanichamó,

² y mëntšá tojanëyana: “Tsëndatbe natsana entsemna base pueblotémoye motsata. Cachora canýe burrá utsbuaná šochanjínýena y cháftaca canýe burrotema echántsemna. Sochjuajafjoná y šochjuánatse.

³ Nderado nda ndayánaca chacmojáuyanëse, šochjauyana: ‘Bëngbe Utabná bontsájaboto y chentšana camuentše echanjabáisabashejuana ca.’ ”

⁴ Chca tojanopasá, cachcá chaotsemnama ntšamo chë Bëngbe Bëtsabe juabna oyebuambnayá tojanayancá. Cha mëntšá tojanábema:

⁵ Jerusalén bëts pueblentše oyenënga mëyana:
“Minýënga, tšëngaftangbe Rey chentše
tšëngaftangbioye entsabó,

ndoñe mo canya cachá bêtsá enobiamnayacá;
 canye búrrbeñe enjaquená;
 canye burrotémiñe, canye uatrabájaye bayabe
 šešónbeñe ca.”

⁶ Chora chë uatsjéndayata tbojána y tbojanma
 ntšamo Jesús tojanamëndacá.

⁷ Chë uatsjéndayatna chë burrá y chë burrotema
 tmojanënatse, entšayëjuangá chátbeñe tbojanájatse
 y chora Jesús chábeñe tojanenoyayé.

⁸ Bëtsá entšanga chëngbe entšayá chë
 benachëjana imojtsëtétsatsana, y ínÿengna
 betiyeshënguiñe buacuafjënga imojtsetcoye y
 chiñe imojtsequëcñá.

⁹ Y chë natsana imojtsajnënga y chë ústonoyënga
 mëntšá imojtsaiuáyebuache: “¡Rey Davídbentšana
 Entšá matschuanga ca! ¡Corente bendición bomná,
 chë Bëngbe Utabnabe obenánaca tojabá! ¡Bëngbe
 Bëtsá celocá matschuanga ca!”

¹⁰ Jesús Jerusalenoye tojánamashëngo ora,
 nÿetsca entšanga imojtsenbouenana y banga
 imojtsenotíciaye: —¿Nda mua yojtsemna ca?

¹¹ Y chë entšanga imojtsëjuana: —Chë Bëngbe
 Bëtsabe juabna oyebuambnayá Jesús, chë
 Galileoca pueblo Nazaretocá ca.

*Jesús, Bëngbe Bëtsabe bëts yebnentsana enënga y
 obuámnyënga tojtanëbuacna*

(Mc 11.15-19; Lc 19.45-48; Jn 2.13-22)

¹² Chentšana Jesús, Bëngbe Bëtsabe bëts yebnoye
 tojánamashëngo y chë entšanga chentše imojtsena
 y imojtsobuámnañënga chentšana tojtanëbuacna.
 Chéntšnaca imojtsemna entšanga canye crocénana
 enënga, y chë crocénana nÿe Bëngbe Bëtsabe bëts

yebnentšama inoserverna. Chëngbe mesëshangá tojtsanenásatajchquëca y chë palomatema enëngbe tšenëšëngnaca.

¹³ Y tojanëyana: “Bëngbe Bëtsabe uabemana palabrënguiñe cha mëntšá tojánayana: ‘Atšbe bëts yebna echantsabaina átšeftaca encuéntaye yebna ca’; pero tšëngaftangna, atbëbanëngbe oyeniñe chë yebna šmojtsebema ca” —Jesús tojanëyana.

¹⁴ Chentšana, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná.

¹⁵ Chë bachnangbe más uámana amëndayënga y ley abuatambayënga, Jesús bëts soyënga yojtsamama tmojáninýe ora, y chë basetëmënga Bëngbe Bëtsabe bëts yebnentše imojtsayebuáchama tmojanuena ora, tša tmojanotjáyananga. Chë basetëmënga mëntšá imojtsáyebuache: “¡Chë Rey Davídbentšana Entšá matschuanga ca!”

¹⁶ As Jesús tmojanianyana: —¿Ntšamo chë basetëmënga montsichamcá quectsuenana ca?

Y Jesús tojanëjua: —Aíñe, sëntsuenana. Pero, ¿tšëngaftanga Bëngbe Bëtsabe uabemana palabrënguiñe chë soyama ndoñe šmëndualía? Chiñe mëntšá endayana:

Chë basetëmënga y ochóchaye šešonatëmëngbe cantëngaca

aca tcojama entšanga chacmotsatschuanama ca.

¹⁷ Chora Jesús chënga tojésanabashejuana y Jerusalenentšana Betania puebløye tojtsanoñe; y chentše chë ibeta tbojánbobinýna.

Jesús tojánayana canye higo betiye ndoñe más chaondëshájona ca

(Mc 11.12-14, 20-26)

¹⁸ Chë te cachëse, Jesús cach bëts puebloye yojtésa ora, tbojánishëntsena.

¹⁹ Chora canye higo betiye benache juachaca yojinye; as choye yojobeconá, pero nye ena tsbuanáchënga chiñe yojinyena. As Jesús chë higo betiyoye tojánayana: “¡Ndocna te más chacondëshájona ca!” Y betesco chë higo betiye tojtsambuashá.

²⁰ Chë uatsjëndayënga chca tmojáninye ora, imojenjaná y Jesús tmojantjá: —¿Ntšamo chca chë higo betiye canye ora tojtsebuashá ca?

²¹ Y Jesús tojanëjua: —Ndegombre cbëyana, tšëngaftanga Bëngbe Bëtsábeñe ošbuáchiyana šmojtsebmna y chabiamá ainaniñe ndoñe inyetsá šmonjatsjuabnase, šmochantsobena jamama ndoñe nye ntšamo atše quem higo betíyeca sënjamcá, sinó quem tjoye, “muentšana mojuaná y uafjajónayoye moshbuetše ca” šmojayanëse, chca jochnënguana.

²² Y Bëngbe Bëtsáftaca chašmojtsencuénta ora, chábeñe jtsošbuáchiyëse, lempe ntšamo chašmojotjañcá šmochanjóyëngacñe ca —Jesús tojánayana.

Jesusbe obenana

(Mc 11.27-33; Lc 20.1-8)

²³ Chca tojanopasá chentšana, Jesús Bëngbe Bëtsabe bëts yebnoye tojánamashëngo. Chentše yojtsabuátambantscuana, bachnangbe amëndayënga

y judiëngbeñe bëtsëjemëngcá amëndayënga tmojanobobeconá y tmojantjá: —¿Ndaye deréchoca chë contsama soyënga aca cojtsama ca? ¿Chca jt-samama nda mando tcmënjatštá ca?

²⁴ As Jesús mëntšá tojanějua: —Atšnaca canye soye sëntsebomna tšëngaftanga jatjayama, y quešmojojuase, átšnaca cbochjáuyana ndaye deréchoca atše chca stsama.

²⁵ ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga ca? —Jesús tojanéyana.

Chama chënga tmojanontsé mëntšá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As, ¿ndáyeca chë tmojanabuayená soyëngüiñe ndoñe šmonjanošbuaché ca?’

²⁶ Pero ndoñe quemuátobena jayanana ‘entsanga ca’; muentša entsangbiama bënga montsauatja, er nýetscanga mondëjuabná Juan ndegombre Bëngbe Bëtsabe juabna oyebuambnayá yomna ca.”

²⁷ Chcasna chënga Jesús tmojanjuá: —Bënga ndoñe queftsátstatsëmbo ca.

Y as Jesús tojanéyana: —Atše cach ndoñe quebochatéyana ndaye deréchoca chca stsama ca.

Chë uta uaquiñátbiama cuento

²⁸ Chora Jesús entsanga tojanatjá: —¿Ntsamo tšëngaftanga quem soyama šmatjayana? Canye boyabása uta uaquiñata yojánabamna, y cányabioye ibojauyana: “Uaquiñá, mënté motsa atšbe uvas betiyënga jajoye jatrabájama ca.”

29 Chë uaquiñá ibojojuá: “¡Jama ndoñe quetsátsboše ca!” Pero botamana yojenójuaboye y pronto choye yojá.

30 Chentsána chë taitá chë inÿe uaquiñábioye cachcá ibojauyana. As cha ibojojuá: “Arseñor, aínne chanjá ca.” Pero ndoñe yonjá.

31 ¿Chë útatentsána ndëmuanÿá tojanma ntšamo chë taitá yojabošcá ca? —Jesús tojanatjá.

Y chënga tmojanjuá: —Chë natsaná ca.

Chora Jesús tojanëyana: —Ndegombre cbëyana, chë Romocama entsángbioye impuesto atjanayënga y chë bacna vida bomna shembásenga, tšëngaftangbiamá más montseprontana Bëngbe Bëtsabe amëndayoye jamashënguama.

32 Juan chë Ubayaná tonjánabo tšëngaftanga jábuayenama ntšamo jtsiyenana cmamnama, ntšamo Bëngbe Bëtsá yobošcá, y tšëngaftanga chë tmojanabuayená soyënguiñe ndoñe chešmatanošbuaché; y chë cuenta, chë Romocama entsángbioye impuesto atjanayënga y bacna vida bomna shembásengna aínne chábeñe montsanošbuaché. Y tšëngaftanga, masque ntšamo chënga Bëngbe Bëtsábeñe imojtsošbuáchema lempe šmojinÿese, chë juabnayana ndoñe šmonjatrocá, chábeñe jtsošbuáchiyama ca —cha tojanëyana.

Chë puerte bacna trabájayëngbiamá cuento

(Mc 12.1-12; Lc 20.9-19)

33 Mëntsánaca Jesús tojánayana: “Inÿe cuento šmochjatuena chašmuatsjínÿama: Canÿe jajañe nduiño uvas betiyënga yojáje y chë shëconana yojajétja. Chë uvasëšangá juantsëtetjiamna canÿe

base luare yojajutjo y canÿe tsbanana jebna soye yojapórma chentše jtsaishanÿama. Chentšana, inÿe trabájayënga chë jajañe yojárrendaye y chana inÿe luaroye yojtsoñe.

³⁴ Chë uvasëšangá juashacama tempo yojobuache orna, chë jajañe nduiño básefta oservénënga yojichamuá chë arréndayënga jáuyanama ntsachetšá chë nduiño ibojtsotocánama.

³⁵ Pero chë arréndayëngna chë oservénënga imojishëche: inÿengbioyna imojtsajantšetaye, inÿengbioye imojtsëbaye y chë inÿengbioyna ndëtsbéngaca imojtsatëchënganja.

³⁶ As chë jajañe nduiño chë natsanama más ba oservénënga yojichamuá. Pero chë arréndayëngna, ntšamo chë natsanëngaftaca imojamcá, cachcá chora imojama.

³⁷ “Cabana, chë jajañe nduiño cachabe uaquiñá ibojíchmua; as mëntšá yojtsejuabnaye: ‘Atšbe uaquiñá cocayé mochanjóyeunaye ca.’

³⁸ Pero chë arréndayënga chë uaquiñá imojinÿe orna, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga y lempe chabe otocana soyënga bëngbiana echanjoquéda ca.’

³⁹ As chë uaquiñá imojishache, chë uvas betiyënga jajañentšana imojtsábocna y imojtsóba.”

⁴⁰ Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ¿ntšamo šmojtsejuabná chë arrendayëngaftaca cha yochjama ca?

⁴¹ Y chënga tmojanjuá: —Chë puerte bacna arréndayënga ni mo batšatema ntjalastemaycá

echantsëbaye. Chë jajañe ínÿenga echanjárrendaye y chë uvasësangá juashacama tempo chaojobuache ora, ntšamo chë nduiño chabojsotocancá chënga mochantíyie ca.

⁴² Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana:

Chë yebna jebuanënga tmojtsanaboté ndëtšbé, mora chë más bëts uashacuanëšentše entsejájona. Chë soye Bëngbe Utabná, Bëngbe Bëtsá chca tojama, y bënga chama ojnanánënga fsëntsemna ca.

⁴³ Ntšamo chë nduiño chë arréndayënga chë fshantse echántsabaca y ínÿenga echantsatšataye y chënga chabiamá bëtscá shajuana mochanjatbanacá, cachcá, Bëngbe Bëtsabe amëndayana tšëngaftangbentšana mochantsejuána y ínÿengbioye mochantšatšataye. Chënga Bëngbe Bëtsabe soyëngama mochanjouena y chë soyëngama ínÿengbioye mochanjabuayená, Bëngbe Bëtsabe amëndayoye jamashënguama.

⁴⁴ Ndánaca chë ndëtšbeñe chaojotsatsá, chëbé bochantšatcacaye; y chë ndëtšbé ndábeñnaca chaojótsatše, polvëshe bochantšebema ca —Jesús tojánayana.

⁴⁵ Chë bachnangbe amëndayënga y fariseunga, Jesús chë jabuátambama cuentënga yojtsëtsëtsnama, tmojanenótatšëmbona chëngbiamá chca yojtsóyebuambnama.

⁴⁶ Chora chënga tmojánbošena Jesús jishachana, pero entšangbiamá imojtsauatja; chënga imojanjuabná Jesús Bëngbe Bëtsabe juabna oyebuambnáyá yojamna ca.

22

Chë casamento fiestama cuento (Lc 14.15-24)

¹ Chentšana Jesús tojanontsé cachiñe cuentëngaca chënga jabuátambana. Mëntsá tojánayana:

² “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canye réyefraca tojanopasacá. Chë rey yojamánda canye bëts fiesta jamama, chabe uaquiñabe casamentama.

³ Chora chë rey chabe oservénënga yojichamuá chë ófjanënga jobiatšama, pero chë ófjanëngna ndoñe imonjouena jama.

⁴ As chë rey inye oservénënga yojichamuá y mëntsá yojámëndaye: ‘Chë ófjanënga šmochjáuyana, ya saná stseboprontana ca. Sënjamandá, atšbe uacnënga y uamna bayënga minyicánënga jobáyama y lempe entseprontana; y chamuabo chë casamento fiestama ca.’

⁵ “Pero chë ófjanënga ndoñe imonjouena. Canya, cachabe fshantse inabomnoye yojtsoñe; ínÿana chabe obuámnayiñe trabajuama yojtsoñe;

⁶ y ínÿengna, chë reybe oservénënga imojishëche, jabuache imojtsatsetsenaye y imojtsëbaye.

⁷ Y chë rey chë soyama yojouena ora, corente ibojtsetna. As chabe soldadënga yojichamuá chë oservénënga obánayënga chamuetsëbáyama y chëngbe bëts pueblo jetsángbotjuama.

⁸ Chora chabe oservénënga yojáyuyana: ‘Lempe entseprontana chë casamento fiestama, pero chë ófjanënga ndoñe quenjatëmerecena moye jabama.

9 Motsajna tsashenangoye y ndëmuanyëngnaca chašmojánÿenënga, chë casamento fiestama šmochjúbuaja ca.’

10 As chë oservénënga tsashenangoye imojábocana y nÿetscanga imojánÿenënga imojáchembo, cánÿiñe tšabe y bacna entšanga, y chca, chë tsbocnanoica jútjena yojtsemna entšángaca.

11 “Chë ófjanënga jánÿama chë rey yojámashëngo ora, chentše cánÿabioye ibojinÿe y chana ndoñe yontsemna ntšamo canÿe casamento fiestama endbetsemncá uichëtjona.

12 As chë rey ibojauyana: ‘Sobreno, ntšamo canÿe casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nÿe iytëca yojtsemna.

13 As chë rey chë fiestentše ujuatšnayënga yojámëndaye: ‘Shecuatše y cucuatše motsebatsëca y chë ndëbinÿna luaroye, infernoye motsábocna. Chentše puerte echanjenóbošachna y chë tsetšanama juatsašënga echantsenoftëšjojnaye ca’ –cha yojayana.”

14 Jesús chca jacuéntama tojanpochocá ora, mëntšá tojánayana: “Chë fiestama ófjanënga banga montsemna, pero chë bocacánënga choca jtsemnama nÿe báseftanga. Er Bëngbe Bëtsá banga jáchembuana chabe amëndayoye jamashënguama, pero nÿe báseftanga choca mochántsemna ca.”

Chë Romoca bëts mandadbiama impuesto jtsat-squëcjnyama

(Mc 12.13-17; Lc 20.20-26)

15 Chentsana chë fariseunga tmojtsatanoñe y tmojanenoyeuná ntšamo Jesús tojayaniñe cha jisháchichiyana, as chca, mandadëngbeñe cha mal jaquédama.

16 Chama chënga tmojanichamó básefta cachëngbe usetonënga y ínÿengna Heródesbe ústonënga, Jesús jauyanama: —Buatëmbayá, bënga fsëndétatsëmbo aca ndegombre soyënga cnetsabuátambama y contsabuatambá ndegombre tšabe vida jtsebomnama, ntšamo Bëngbe Bëtsá yomandacá, y ndoñe jatuenanana nÿe ntšamo entšanga tmojatichamcá, er acbiama tondaye quenatámana nda más uamaná o nduamaná tomnana.

17 Chcasna, ¿ntšamo catjájuaboye? ¿Tšabá tayojtsemna, César, chë Romoca bëts mandadbiama, bënga impuesto jtsatsquëcjnyana o ndoñe ca?

18 Jesús yojtsetátatsëmbo chëngbe bacna juabnëngama; chíyeca tojanëyana: —Bacna entšanga, ntšamo ndegombre šmojuabnacá ndinÿinÿnayënga. ¿Ndáyeca tšëngaftanga šmojtseboše chë sóyeca atše jisháchichiyama?

19 Chë šmatsquëcjiná crocénana šminÿinÿé ca.

As canÿe crocénana tmojanoyé.

20 Jesús tojanatjá: —¿Ndabe jubiá quem crocénaniñe yojtsemna, y ntšamo muentše entsabemancá nda chca iuabaina ca?

21 Y chënga tmojanjuá: —Césarbe jubiá; cha chca enduabaina ca.

As Jesús tojanëyana: —Césarbioye šmohtoyiye cha ibotocana soye; y Bëngbe Bëtsana cha ibotocana soye ca.

22 Chënga chca tmojanuena ora, ojnánännga imojtsemna. As chënga cachcá Jesús tmojanonýá y tmojtsatanoñe.

Obanënga jtayenama Jesús tmojantjá
(Mc 12.18-27; Lc 20.27-40)

23 Báseftanga judiëngbe amëndayënga, saduceos ca uabáinënga, imojanjuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntsá tmojantjá:

24 —Buatëmbayá, Moisés tojánayana nderado canýe boyá tojóbana básenga ntjéftsabashejuancá, ana chabe uabentsá jtsemnana chë shémaftaca jtobouamayana, chca, chabe uabochená obanabiama básenga jtsabamnana ca.

25 Chcase, canýe bëngbentse canýsëfta catsátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá.

26 Y cháftaca cachcá tonjanopasá, chë inýe uabentsáftaca cachcá, y cachcá chë inýengaftaca y chë ústonoca uabentsáftacnaca.

27 Y chentšana chë shembásanaca tontsanóbana.

28 Y morna, chë obanënga chamojtayena ora, ¿ndabe chë canýsëfta catsatanguentsabe shema chë shembása yochtsemna, nýetscanga cháftaca tmojanobouamase ca? —chënga tmojantjá.

29 As Jesús tojanéjua: —Ntsamo tsëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa.

30 Chë obanënga chamojtayena ora, ni boy-abásenga, ni shembásenga quemochatóbouamnaye, y chca, chënga mochántsemna mo celoca angelotemëngcá.

31 Y chë obanënga jtayenamna, ¿ndoñe smëndualía ntšamo cach Bëngbe Bëtsá chabe uabemana palabrenguiñe tojánayanama? Cha tonjánayana:

32 “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

33 Chë entsanga chca tmojanuena ora, ojnánänënga imojtsemna ntšamo Jesús yojsabuátambama.

*Chë más bëts uámana mando
(Mc 12.28-34)*

34 Jesús chë saduceúngbioye iytëca tojánabiamama fariseunga tmojántatsëmbona ora, chënga tmojánenefjna,

35 y canya chënguentsá, ley abuatambayá, Jesúsbioye jisháchichiyama tbojantjá:

36 —Buatëmbayá, ¿Moisesbe leyiñe ndayá chë más bëts uámana mando yomna ca?

37 As Jesús tbojanjuá: —“Utabná Bëngbe Bëtsá cochtsebobonshana nÿets acbe ainánaca, nÿets espíritoca y nÿets juábnaca.”

38 Chë soye endmëna chë más bëts uámana mando y nÿetsca mandëngama chë natsanoca entsemna.

39 Y quem inye soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.”

40 Chë uta mandentšana endóbocana lempe ntšamo Moisesbe leyiñe endayancá y ntšamo chë Bëngbe Bëtsabe juabna oyebuambnayënga mond-betsabuatambacá ca —Jesús tbojaniana.

¿Cristo, ndabe entsábentšana yomna?

(Mc 12.35-37; Lc 20.41-44)

41 Chë fariseunga cabá cachentše imojt-semnëntscuana,

42 Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiama, chë Cristo? ¿Ndábentšana cha iuabó ca?

Y chënga tmojanjuá: —Davídbentšana ca.

43 As Jesús tojanëyana: —¿Ntšamo chca nántsemna, cach David, chë Uámana Espíritbe mándoca, Crístbioye Utabná ca tbojtsabobuátmëse? David mëntšá tojánayana:

44 Bëngbe Bëtsá, atšbe Utabná Crístbioye tbojaniana:

atšbe catšbioica mótbema,
atšbe obenánaca acbe uayayënga acbe cucuatšiñe
chamoquedama chjamëntscuana ca.

45 ¿Ntšámose Cristo, Davídbentšana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

46 Chora ndocná tonjanobená ni mo canye palabra jojuana. Y chë tescana ndocná yonjenñëmua Jesús más jatstjanayama.

23

Jesús chë fariseungbiana y ley abuátambayëngbiana tojánayana, chënga ndoñe tsabá montsamá ca

(Mc 12.38-40; Lc 11.37-54; 20.45-47)

¹ Chora Jesús, entšanga y chabe uatsjëndayënga mëntšá tojánëyana:

² “Chë fariseunga y chë ley abuátambayënga cmondbétsabuatambaye ntšamo Moisesbe leyënguiñe iuayancá.

³ Chcasna, tšëngaftanga cmonsamna chënga joyaunayana y ntšamo tcmojauyancá, cachá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá.

⁴ Mo canye entšá, couábyioye uauta uasmanësha juasmayana y cachá tondaye tontsasmancá, chënga entšanga jtsamëndayana bëtscá mandënga chamotsocumplínama, pero cachënga ni mo batšatema ntsamana chë mandënga jtsocumplínama.

⁵ Chënga lempe jtsamana nye entšanga chamotsënyama. Chënga chë ínÿengbiana más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguiñe juabemana ntšamo Bëngbe Bëtsabe uabemana palabrenguiñe endayancá, y juentsaca y buacuatšine chëjënga jenábatšëcana y sibajana nya tëntša uasebtotonanëjuangá jtsichëtjonana.

⁶ Chënga jtsebošana chë fiestënguiñe nya quëfseroca jtsetbiámanama, y chë judiëngbe

enefjuana yebnënguenache chë más uámana luarënguiñe.

⁷ Chënga jtsebošana tsáshenañe entsanga nÿa respétoca chamotsacheuanama, y ‘abuátambayënga ca’ chamotsachembuanámnaca chënga jtsebošana.

⁸ “Pero tsëngaftangna ndoñe šmattseboše entsanga ‘abuátambayënga ca’ chacmotsachembuanama, er nÿetsca tsëngaftanga mo catsatangcá šmondmëna, Bëngbe Bëtsábeñe betsošbuachéyeca, y nÿe canÿa endmëna tsëngaftangbe Buatëmbayá.

⁹ Tsëngaftanga ‘taitá ca’ chë ley abuátambayënga šmondbëtsachembuana, pero tsëngaftanga ndocna quem luarentsá ‘taitá ca’ šmattsechembuana; tsëngaftanga nÿe canÿe Taitá šmondbomna, chë celoca endmëná.

¹⁰ Ndoñe šmattseboše entsanga ‘mándayënga ca’ chacmotsachembuanama; er nÿe canÿe Mandayá endmëna y cha Cristo endmëna.

¹¹ Nda tsëngaftangbeñe chë más uamaná tojtsemná bontsemna chë ínÿenga jtsaservénana.

¹² Nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamnana, más bëtsá mochanjábema.

¹³ “¡Tša lastema tsëngaftangbiana, bacna entsanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga šmontsama entsangbiana puerte totcá chaotsemna Bëngbe Bëtsabe amëndayoye jamashënguama, mo bësása cuaftsebiatamiancá. Pero ni cach tsëngaftanga choye quešmátamashjuana, ni ínÿenga choye jamashënguama bošëngbioye chama quešmátalesenciana.

14 ¡Tša lastema tšëngaftangbiama, ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga chë viudángbioye chë tmobomna soyënga jtsabacayana, y entšangbe delante tšabá chacmotsëñyama y chënga šmojtsaíngñayama ndoñe chamondëtsetatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá tšëngaftanga más jabuache ínÿengbiama cmochanjácastigaye.

15 “¡Tša lastema tšëngaftangbiama, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga ba luarënguenache jtsajnana canÿa tšëngaftangbe ustoná onguayiñe, y šmojínÿena ora, tšëngaftanga jamana cha chaotsemna tšëngaftangbiama uta soye más merecido buajoná infernoye chaotsama.

16 “¡Tša lastema tšëngaftangbiama; tšëngaftanga šmondmëna mo jtanënga entšanga unachayëngcá! Tšëngaftanga šmondbëtsichamo: ‘Nda ínÿabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aíñe jtsemnana chë tbojašbuachená soye jamama ca.’

17 ¡Obëjëmënga y nduabínÿnënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiama josérviamna jtsemnana, nÿe Bëngbe Bëtsabe bëts yebnoca chë castellano

tojtsemnayeca.

18 Tšëngaftanga mëntsánaca šmondbétsichamo: ‘Nda ínÿabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiana altaroca tojtsejájona soyëngama tojajurasna, aíñe jtsemnana chë tbojašbuachená soye jamama ca.’

19 ¡Nduabínÿnënga! ¿Ndayá más uámana soye yomna, chë Bëngbe Bëtsabiana tmojacjá soyënga o chë altar? Chë tmojacjá soyënga Bëngbe Bëtsabiana joserviama jtsemnana, ñye chë altaroca chë soyënga tmojacjáyeca.

20 Nda chë altarama tojajurá, ndoñe ñye chë altarama ntsejúrayana. Lempe chë altar juatsboca tojtsemnánaca cha jtsejúrayana.

21 Nda Bëngbe Bëtsabe bëts yebnama tojajurá, ndoñe ñye Bëngbe Bëtsabe bëts yebnama ntsejúrayana. Bëngbe Bëtsabiana cha jtsejúrayana, cha chë chentše oyená.

22 Ynda celocama tojajurá, chentše reycá Bëngbe Bëtsabe tbemaniñama cha jtsejúrayana y cachora Bëngbe Bëtsabiánaca, chentše yotbemanabiana.

23 “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga Bëngbe Bëtsabiana jtsequëcñayana chë jajañentša sananga bnëtsanentšana canÿe soye; chë binche matatémënga menta, anis y chë cominentša sanángnaca. Pero tšëngaftanga ñye batšá jtsamana chë leyentša más uámana soyënga, mo chë ñyetsca entšanga cachca derechënga

chamotsebomnama, ínÿenga jtsalastemánana y chë tšabe soyënguine jtsiyenana, chca, entšanga tšëngaftangbeñe chamotsošbuáchema. Chë soyënga cocayé cmontsamna jtsamama, chë inÿe tšabe soyënga amana ntjajbanacá.

²⁴ ¡Jtanënga entšanga unachayënga! Tšëngaftanga chë base soyënga jamama puerte jtsenócochinÿenana, pero jtsebnétjombana uámana soyënga jamama, Bëngbe Bëtsá tojanmandá soyënga. Y chca, tšëngaftanga šmontsemna mo canÿe entšá ndayá tojtsabuchetjácá bayëfja jtsejuánama, ndoñe ntjasama, jasama ndoñe yondëlesenciana ca chë leyine iuayana causa. Pero šmondmëna mo entšangcá ndëmuanÿenga camellbe mëntšena jasana, y chë leyine endayana chcana jasama ndoñe yondëlesenciana ca.

²⁵ “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmondmëna mo entšangcá ndëmuanÿenga platillëjënga y tazëšënga shjoicajana jtsóbojabiana, pero tsoyna nÿe cachcá jonÿayana. Tšëngaftanga tša jtsentsénana entšangbiana mo tšabengcá jtsinÿnama, pero tšëngaftangbe ainanentše jútjena entsemna nÿe jtsatbëbanama y nÿe bëtscá soyënga jésebomnama juabnëngaca.

²⁶ ¡Nduabinÿna fariseo! Cochjshetsajbaná ainaniñe bacna soyënga bomnana. Chamna nÿe tšabe juabnënga chentše cochtsebomna, y lempe ntšamo chacojtsamcá y entšanga chamojtsonÿacá tšabá echántsemna.

²⁷ “¡Tša lastema tšëngaftangbiana, bacna entšanga ntšamo ndegombre šmojuabnacá

ndinÿinÿnayënga fariseunga y ley abuátambayënga! Tšëngaftanga šmondmëna mo obanëngbe cuevëshënga botamana uafjantsenëshëngcá; shjoicajana puerte botamanëshënga, pero tsoyna jútjena obanëngbe betashëngaca y janjuana soyëngaca.

28 Tšëngaftanga chca šmondmëna: entšangbe delante tšëngaftanga jtsinÿnana mo nÿetsca soyënguiñe tšabá amëngcá, pero ndoñe chca quešmátsmëna. Tšëngaftangbe ainanentšna chë bacna entšanga ntšamo ndegombre tmojuabnacá ndinÿinÿnayëngcá y chë bacna soye amëngcá šmontsejuabná.

29 “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnama, chëngbe cuevëshënga jtsatspórmayëse. Tšëngaftanga cachcá jtsamana chë nÿetsca soyënguiñe tšabá amëngaftaca, chë chëngbiana jtenójuaboyama pormániñe jtsatsbótamnayëse;

30 y chentšana šmondbétsichamo: ‘Bënga chë bëngbe bëtsëjëmëngbe tempo maftsjanienëse, chëngbioye ndoñe matmënjanëjabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canÿe buayenana sóyeca tmojabëngbioyna ndoñe ntsayaunanana.

31 Pero ntšamo šmojtsamcá jtsamëse, tšëngaftanga šmontsinÿanÿná ndegombre chë Bëngbe Bëtsabe juabna oyebuambnayëngbioye

tmojanëbayëngbe entšanguentšana šmomnama. Y mora cach tšëngaftangbe bëts taitangcá tšëngaftanga šmontsama.

³² ¡Mopochocanga jamama chë bacna soyënga, chë tšëngaftangbe bëts taitanga tmojanbojatsé jamama soyënga!

³³ “¡Mëtšcuayënga, mëtšcuaye entšanga! ¿Ndayá šmochjama chë infiernoca uabouana castigüentšana jótsbocama?

³⁴ Chíyeca atše tšëngaftangbioye chanjichamuá Bëngbe Bëtsabe juabna oyebuambnayënga, tšabe soye tatsëmbënga y abuátambayënga. Pero tšëngaftangna, ínÿengbioye šmochantsëbaye y šmochanjácrucificaye; ínÿengbioyna chë enefjuana yebnënguenache šmochanjátsetšenaye y nÿetsca bëts públënguenache chënga šmochandúcama.

³⁵ Chíyeca, tšëngaftangbiana nÿets castigo echántsemna chë nÿetsca soyënguiñe tšabá amënga tmojëftsóbanama; Abel, chë jóbanama chabotsemnama tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentše tmojanóba, altar y chë entšanga Bëngbe Bëtsábioye imojánadorana luariñe.

³⁶ Ndegombre cbëyana, lempe chë soyëngama castigo morsca entšangbiana echántsemna ca” — Jesús tojánayana.

*Jesús tojanošachna Jerusalenoca entšangbiana
(Lc 13.34-35)*

³⁷ Mëntšánaca Jesús tojánayana: “¡Jerusalenentša entšanga, Jerusalenentša entšanga! Tšëngaftanga chë Bëngbe Bëtsabe juabna oyebuambnayënga

jtsëbáyana y chë Bëngbe Bëtsabe ichmónënga ndëtsbéngaca jtsatëchénganjana jtsëbáyama. Bueta soye atše sënjábošena tsëngaftanga átsbioye júbuajana, mo canye tuamba chabe bolletotémënga chabe juatëngmiáša tajsoye cuaftajayecá, pero tsëngaftanga ndoñe chešmátsbošena.

³⁸ Y šmochjinýe, atše mora cachcá cbochanjesënýaye, y chca, atšna enánanga cbochanjésabashejuana, mo canye yebna cachcá tcojesonýá y énañe tcojeseboshjoncá.

³⁹ Y atše cbëyana, ndegombre tsëngaftanga morscana atše ndoñe más quešmochátinýe; y atše šmochántinýe mëntšá chašmojtsichamo ora: ‘¡Corente bendición bomná, Bëngbe Utabnabe obenánaca tojabá ca!’ ”

24

*Jesús tojánayana chë Bëngbe Bëtsabe bëts yebna lempe mochjánpochocama
(Mc 13.1-2; Lc 21.5-6)*

¹ Jesús Bëngbe Bëtsabe bëts yebnentšana tojëftsanbocna y ya yojtsaye. Chorna chë uatsjëndayënga chábioye tmojanobeconá y tmojanontsé nyetsca chentša bëts yebnënga cha jinýinýiyana.

² Chora Jesús tojanëyana: “Tsëngaftanga lempe šmontsonýá. Ndegombre šcuayana, quem Bëngbe Bëtsabe bëts yebnentše ndoñe queochaisoquéda ni mo canye ndëtsbé inye ndëtsbé juatsboye. Lempe mochantsepochoá ca.”

Ntšamo yochtsemna quem luare jopochócama tempo chaojtsobeco ora

(Mc 13.3-23; Lc 21.7-24; 17.22-24)

³ Chentšana chënga Olivos tjashoye tmojána. Jesús choca yojtsetbemana; as, chë uatsjëndayënga tmojanobobeconá nÿe chëngbiamama jatjayama, mëntšá: —Sméyana. ¿Mocna ora chë soyënga Bëngbe Bëtsabe bëts yebnoca yochjochnëngo ca? ¿Ndayá yochjochnëngo bënga jinÿanÿiyama aca jésabama ora ya yojtsemnama y quem luare jopochócama tempo yojtsobecuama ca?

⁴ As Jesús tojanjuá: —Cuedado šmochtsebomna ndocná chacmondáingñema.

⁵ Banga mochanjabo y mochantsabíchamo chënga atše imomna ca. Mochántsichamo: “Atše chë Cristo sëndmëna ca” y chca, ba entšángbioye mochanjáingñaye.

⁶ Tšëngaftanga šmochanjouena canÿe luarentša entšanga inÿe luaroca entšángaftaca imojtsentsjanama y nderado mochjentsjámna. Ndoñe matauatjëngana, er chca jochnënguama endmëna; pero masque chcase, quem luare jopochócama cabá ndoñe queochátsmëna.

⁷ Canÿe luarentša entšanga inÿe luaroca entšángaftaca mochántsentsjanaye, y canÿe amëndayábentša entšanga inÿe amëndayábioica entšangaftácnaca; y ba luarënguiñe shëntsana echanjóshjango y chentša fshantsënga echanjuangmëmëna.

⁸ Masque chca jasúfriase, más chcoye cabá más mochanjatssúfria.

⁹ “Chora, entšanga ínÿengbe cucuatšiñe

cmochanjábashejuana chacmatsetšenama
y cmochantsēbaya; y atšbe ústonēnga
bétsemnayeca n̄yetsca luarēnguentsa entsanga
cmochantsēbuayēnja.

¹⁰ Chē tempo, banga mora átšbeñe
ošbuáchiyēnga, ošbuáchiyana mochantsajbaná
y mochantsenáboyēnja y jóbanama ín̄yēngbe
cucuatšiñe mochántsenboshjuana.

¹¹ Banga Bēngbe Bētsabe ndoñe ndegombre
juabna oyebuambnayēnga mochanjábocana y ba
entsanga mochanjáingñaye.

¹² N̄yetsá bacna juabnēnga entsangbe ainaniñe
echanjésemna, y chē causa banga ndoñe que-
mochátenbobonshana.

¹³ Pero nda n̄yets tempo átšbeñe ošbuachiyá tot-
somñe, atsbocaná echántsemna.

¹⁴ Y quem tšabe noticiēnga Bēngbe
Bētsabe amēndayama n̄yets quem luariñe
entsángbioye mochántسابuayiynaye, chca, chē
ndegombre soyēnga Bēngbe Bētsabiamá chēnga
chamotsetatšēmbuama. Chentsana cocayé quem
luare jopochócama tempo echántsemna.

¹⁵ “Chē Bēngbe Bētsabe juabna oyebuambnayá
Daniel chē puerte uabouana soye tojéftsanabema
chē pochócaye soyama. Tšēngaftanga chē puerte
uabouana soye chē uámana ca uabaina luar-
entše chašmojin̄ye ora (nda tojtsalía, chabosertá),
šmochántsetatšēmbo chē puerte ngménana tempo
tojóshjanguama;

¹⁶ entsanga Judeoca chamojtsemnēnga, bats-
jabengoye chamotsacheta.

¹⁷ Y nda cachabe yebnentša tsbanánoca chaojt-
semna, chaotsachá chocana ntjtastjangcá ndayá

tsoicana jëftsábocnama.

18 Y nda jajoca chaojtsemna, yebnoye ndoñe chaondëta ni mo chabe quëfsaíya jesácñama.

19 ¡Tša lastema chë tempo ngomámanënga chamojtsemnëngbiamama o ochóchaye šešonga chamojtsabamnëngbiamama!

20 Bëngbe Bëtsá šmochtseimpadana chë tšëngaftanga jachetama, uaftena tempo ora o canye ochnayté ndoñe chaondëtsemnama.

21 Chca, chora puerta ngménana echántsemna. Tša jabuache ngmenancá, quem luare jabojátšama orscana y mëntscoñama y más chcoye, cachcá ngménana ndoñe ntjamnana.

22 Chë puerta ngménana tempo yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanyëshanayeca, echanjama yapa bën tempo ndoñe chaondëtsemnama.

23 “Chora nderado nda cmochanjáuyana: ‘Minyënga, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana.

24 Chora mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanyiyama, entšanga jáingñama, y tmojobenase, chë Bëngbe Bëtsabe bocacánëngnaca.

25 Atše ya chama tcbonjabuayená chë tempo cabá ndóshjango ora.

26 Chíyeca, nderado chënga chacmojáuyana: ‘Minyënga, chentše chë Cristo entsemna, entšanga ndoyenoca ca’, choye ndoñe šmatjá; o chacmojáuyana: ‘Cha canyë tsoca entsemna ca’, chama ndoñe šmattsayaunana.

27 Er ntšamo chë tojatcuinyë ora, shinýe bocanoicana y shinýe uenatjëmbambanëntscoñe jabuashinýinýenancá y ba luarënguenache entšanga jobenayana jinýama, cachcá, Bëngbe Bëtsá Entšá tbojanbemá quem luaroye chaojésabo te, entšanga nyets luarentše mochanjobenaye cha jinýama.

28 Canyë obanabe cuerpo tojtsemnama chë gal-linacënga tmojátatšëmbona y cachora chë béconana jojotana. Cachcá, chë castigo echántsemna nýa chama chë tempo chaojtsemna ora ca” —Jesús tojánayana.

Bëngbe Bëtsá Entšá tbojanbemá quem luaroye echanjésabo

(Mc 13.24-37; Lc 21.25-33; 17.26-30, 34-36)

29 Mëntsánaca Jesús tojánayana: “Chë puerte ngménana tempo chaojochnëngüentsana, shinýe ndoñe queochátsbuashinýinýana, juashcona ndoñe queochátsbinýnaye, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmana.

30 Chora canyë soye celoca echanjónýna entšanga jinýanýiyama Bëngbe Bëtsá Entšá tbojanbemá ya iuaisaboma, y nyets luarenache entšanga mochanjenóbošachna, y Bëngbe Bëtsá Entšá tbojanbemábioye mochanjinýe celoca

jantšetëshiñe echántsaboye, puerte obenánaca y corente buashinÿinÿaniñe.

31 Y canÿe trompetëfjua jabuache chaojuénana ora, cha chabe angelotémënga echanjichamuá Bëngbe Bëtsabe ubuáyanënga júbuajama, nÿets luarëngocana, celoca cánÿoica juachoicana y chë ínÿoica juachóntscoñe.

32 “Ntsamo higo betíyeca endbétsopasanama šmochjuatsjinÿe: Tojtsaisabuacuana y tojtsaiséjotsana ora, chë tšabe tempo ya tojtsaisobecuama jtsotatsšëmbuana.

33 Cachcá, lempe chë ndayama tšëngaftanga tčonjauyancá chašmojinÿe ora, šmochántsetatsšëmbo Bëngbe Bëtsá Entšá tbojanbemá ya jésabama yojtsemnana.

34 Ndegombre cbëyana, lempe chca echanjochnëngo, morsca entšanga cabá ndóbana ora.

35 Celoca y quem luare echanjopochóca, pero atšbe palabra ndocna te queochaisopochóca.

36 “Pero ndayté y ntseco ora Bëngbe Bëtsá Entšá tbojanbemá yochjésabama, ndocná quenátstatšëmbo, ni chë celoca angelotémënga, ni Bëngbe Bëtsabe Uaquiñá. Nÿe chë Taitá chama yotátšëmbo.

37 “Ntsamo Noé yojëftsiyena ora tojanopasacá, cachcá echanjopása chë Bëngbe Bëtsá Entšá tbojanbemá chaojésabo ora.

38 Noebe tempo, chë uabouana uaftena cabá nduáshjango ora, entšanga imnasaye, imnofšësnaye y imnóbouamnaye; natjëmbana imojtsiyëñe, y chca imojtsomñe Noé chë barquëshoye tojánamashënguëntscuana.

39 Chënga tondaye imonjántatsëmbo, nÿe chë uabouana uaftena tojánashjango y nÿetscanga tojtsanëyamba ora cocayé. Cachcá echántsemna Bëngbe Bëtsá Entsó tbojanbemá chaojésabo ora; ya chaojochnëngo ora, entšanga chama mochanjátatsëmbona.

40 Chora uta boyabásata jajoca bochántsemna; canÿa mochanjesbetše y chë ínÿana ndoñe.

41 Uta shembásata bochántsejanÿcoye; canÿa mochanjesbetše y chë ínÿana ndoñe.

42 “Chíyeca cuedado šmochtsebmna y yejuana šmochtsantješna, er ndoñe quešmátstatsëmbo ndayté tšëngaftangbe Utabná yochjésabama.

43 Pero quem soye tšabá chacmësertá: Chë yebnentša nduiño, ntseco ora ibeta atbëbaná yochjabama tojtsetatsëmbëse, cha nantsefšna y ndocnábioye buanjaleséncia jushañe chaotsendbemama tsoye jtsamashënguama y jtsatbëbama.

44 Chíyeca, tšëngaftángnaca šmochtseprontana, er Bëngbe Bëtsá Entsó tbojanbemá echanjésabo, entšanga chama tondaye chamontsejuabná ora ca” —Jesús tojánayana.

*Chë tšabe oservená y chë ndoñe tšabe oservená
(Lc 12.41-48)*

45 “¿Nda yomna chë oservená ntšamo chë nduiño tojtsebošcá amá y nÿets juábnaca amá? Cha jtsemnana nda chë nduiño bochjëftsebošhona chë yebnentšënga chaotsanÿenama y jasama tojtsemna ora chaújuatšema.

46 Chë nduiño tojtashjango ora, chë oservenábioye tbojínÿena ntšamo ibomncá

jtsamëse, chë oservená puerte oyejuayá echántsemna.

⁴⁷ Ndegombre cbéyana, chë nduiño chábioye bochanjaimpáda lempe chabe soyënga chabotsinýëñama.

⁴⁸ Pero chë oservená bacna entsá tomnësna, ja-juaboyana chë nduiño ndoñe betesco yochantaboca,

⁴⁹ y as, cha jóntsana chë inýe oservénënga jtsajantsetayana, becá jtsesana y jtsetmuana inýe tëmiëngaftaca.

⁵⁰ Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango.

⁵¹ Chora chë nduiño jabuache bochantsecastíga, y ntšamo chë bacna entsanga ndayá ndegombre tmojuabnacá ndinýinýnayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftëšjojnaye ca” —Jesús tojánayana.

25

Chë bnëtsana tobiasëngbiama cuento

¹ Mëntsánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canýe casamento fiestentše tojanopasacá. Mëntsá yojopása: Bnëtsana tobiasënga chëngbe querosine uajuinýanëshangá imojëftsájaca y imojábocana chë casamentero boyabása jajébenguama.

² Chë bnëtsana tobiasënguentsana, shachnënga sempre enójuabnayënga imnamna, y chë inýe shachnënga, ndenójuabnayënga.

3 Chë ndenójuabnayëngna chëngbe uajuinÿanëshangá imojëftsájaca, pero querosine ndoñe imonjuabuyamba chë uajuinÿanëshangañe cachiñe jtaftsuámama.

4 Pero chë sempre enójuabnayëngna chëngbe uajuinÿanëshangá imojëftsájaca y querosínënaca botellësënguiñe imojuabuyamba.

5 Chë casamento boyabásana ndoñe betscoyonjabo, chíyeca nyetsca tobiasënga ocnayana yojubuche y imojtsomaná.

6 Mo tséntseto orna, chënga imojouena mëntsá uayebuáchana: ‘¡Chë casamento boyabása ya endabó! ¡Jajëbenguama mobocana ca!’

7 Asna, nyetsca tobiasënga imojotsbaná y imojóntsá chë uajuinÿanëshangá juabopróntana.

8 Chorna, chë shachna ndenójuabnaye tobiasënga chë inÿe shachnënga siempre enójuabnayëngbioye imojáuyana: ‘Diosmanda tsëngaftangbe querosinentšana baseytema smëbuatšatá, bëngbe uajuinÿanëshangá tojontšé jtsafsanana ca.’

9 Pero chë siempre enójuabnayëngna imojayana: ‘Ndoñe. Tchojubuatšatase, tsëngaftangbiana y bëngbiámnaca querosine echántsashbe. Más tsabá entsemna, chë querosine mondbétsenoye chašma y tsëngaftangbiana chašmauábuamiñe ca.’

10 “Chorna, chë shachna ndenójuabnaye tobiasënga imojá chë querosine jauabuámiyama; pero chëntscuana chë casamento boyabása yojáshjango y chë siempre enójuabnayënga cháftaca chë casamento fiestoye imojámashjna, y chentša bësása imojtatame.

11 Chentšana chë inÿe tobiašënga imojáshjajna y mëntšá imojtsichamo: ‘¡Taita, Taita, šmebëtafjo ca!’

12 Pero chë casamentero boyabása yojójua: ‘Ndegombre cbëyana, tšëngaftanga ndoñe quechatëbuatma ca.’

13 “Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tšëngaftanga ndoñe quešmátstatsëmbo ndayté, ni mocna ora chca yochjopásama ca” —Jesús tojánayana.

Chë crocenánama cuento
(Lc 19.11-27)

14 “Bëngbe Bëtsabe amëndayana endmëna mo ntšamo canÿe boyabásaftaca tojanopasacá. Cha ibojtsemna inÿe luaroye jtsoñama; as chabe oservénënga yojáchembo y yojaimpádaye chabe crocénana chamotsinÿenama.

15 Cánÿabioye ibojántšabuachiye shachna uaranga crocénana, ínÿabioyna uta uaranga y ínÿabioyna canÿe uaranga. Chca yojamna ntšamo cada ona ibojobiashjachcá. Y as chë boyabása yojtsoñe.

16 Cachora chë shachna uaranga yojoyëngacñá yojá trato jabemama, y chca, inÿe shachna uaranga crocénana yojábotiye.

17 Chë uta uaranga yojoyëngacñá cachcá yojama y inÿe uta uaranga yojábotiye.

18 Pero chë canÿe uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

19 “Chentsana baytese chë oservénengbe amëndayá yojtashjango y yojóntša chë crocenánama chënga jatjayana.

20 Natsana yojáshjango chë shachna uaranga yojoyëngacñá y chabe mandayábioye inye shachna uaranga crocénana ibojántšabuachiye y mëntšá ibojauyana: ‘Taita, aca shachna uaranga šconjanoyé y muentše entsemna inye shachna uaranga sënjaboté ca.’

21 As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bëtscá chašcotsinyeñama. Mamáshëngo y átšeftaca cochjóyejuaye ca.’

22 Chentsana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga šconjanoyé y muentše entsemna inye uta uaranga sënjaboté ca.’

23 As chë mandayá ibojauyana: ‘Tša tšabá, tšabe oservená y ntšamo tsbošcá amá. Aca quem base soyiñe lempe ntšamo tchojamandacá tcojámayeca, atše cbochanjaimpáda más bëtscá chašcotsinyeñama. Mamáshëngo y átšeftaca cochjóyejuaye ca.’

24 “Pero chë canye uaranga yojoyëngacñe oservená yojáshjango orna, chabe mandayábioye ibojauyana: ‘Taita, atše sëndétatšëmbo aca canye tšátjaye entšá comnama; acna chë ndoñe tconjajé chentše saná jocñana y chë ndoñe tconjujquëshe luarentše jobuátbanana.

25 Chama atše uatjana šjuábuache, chíyeca atše

sënjá y fshantsiñe chë crocénana sënjetseitëme. Pero muentse acbe crocénana entsatsmëna ca.’

²⁶ As chë mandayá ibojojuá: ‘¡Bacna oservená y oyënjayá! Chë ndayentse ndoñe tijajé chentse saná jocñana y chë ndoñe tijujquëshe luarentse jobuátbanana atse tsuamanama icojátatsëmbëse,

²⁷ aca cmonjamna atšbe crocénana bancoca jetsobuájuana y atse matijtabo ora, atšbe crocénana matijtóyëngacñe y chë chentšana tojoboté crocénanëñaca ca.’

²⁸ Y as vojamënda: ‘Chë uaranga motseboca y chë bnëtsana uaranga entsebmónábioye chana motsatšetá ca.

²⁹ Er nda tojtsebmónábioye, más jatšetayana, y chca cha corente bëtská jtsebmónana; pero ton-daye tondbmónábioyna, chë batsatema tobomna sóynaca jtsebocana ca.’

³⁰ “Y chora cha vojayana: ‘Quem ndoservena trabajayá shjoca ibetoye matábocna; choca puerta echanjenóbošachna y chë tsetšanama juatsašënga echantseñoftëšjojnaye ca’ ” –Jesús tojanëyana.

Ntšamo chë quem luare jopochócama ora, nÿetsca entsangbiama mochjayana

³¹ Mëntsánaca Jesús tojánayana: “Chë Bëngbe Bëtsá Entšá tbojanbemá chabe obenánaca, buashinÿinÿaniñe y nÿetsca chabe angelotémëngaftaca chaojésabo ora, chë reybiama puerta buashinÿinÿana tbemaniñe echanjótbema.

³² Chora nÿets luarëngoca entsanga chabe natsanoica mochanjénefjna, y cha, entsanguentšana ínÿenga echanjábacacaye, mo chë oveshënga abuajëñÿa oveshënga chivëngbentšana endbetsabacacnaycá.

33 Chë abujénÿana, oveshënga chabe catšbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catšbioica echanjúbuaja y chë bacna entšangna chabe uañicuayoica echanjásaye.

34 “Chorna chë Rey, Bëngbe Utabná, chabe catšbioica chamojtsemna entšanga echanjáuyana: ‘Tšëngaftanga, Atšbe Taitá tšábeñe cmétabna, mabënga ca; atšbe amëndaye luare mo tšëngaftangbiana otocana soycá mosháchiñënga; tšëngaftangbiana endëprontana, Bëngbe Bëtsá quem luare tonjanma orscana.

35 Er atše šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafsé; inÿe luarocana ashjanganacá sënjánana y posada šmonjanántšame.

36 Enašá sënjánana y entšayá šmonjanëtšetá jtichëtjuama; šocá sënjanájona y šmonjanatsëtsaye; cárceloca sënjanëtámëna y jabëuatsëtsayama šmonjánabo ca.’

37 “As chë Bëngbe Bëtsá chabe bominÿiñe tšábënga tojábiamënga mochanjatjaye: ‘Bëngbe Utabná, ¿ntseco shëntseca tcbënjáninÿe y tcbënjanajuatšé? ¿Ntseco uajuendayá tcbënjáninÿe y tcbënjanaafsé?

38 ¿O ntseco inÿe luarocana ashjanganacá tcbënjáninÿe y posada tcbënjánántšame, o enašá y entšayá jtichëtjuama tcbënjánëtšetá?

39 ¿O ntseco šocá o cárceloca utamená tcbënjáninÿe y jauatsëtsayama tifjána ca?’

40 “As chë Utabná echanjóju: ‘Ndegom-

bre cběyana, lempe ntšamo chë atšbe catšátanguentsana chë más batšá uámanëngaftaca šmojamcá, cach átšeftaca šmonjanma ca.’

41 “Chentsana chë Utabná chabe uañicuayoica chamojtsemna entšanga echanjáuyana: ‘Atšbentsana mojuánanga atšbe Bětsabe uaboténënga. Infierno ye motsajna, chë ndocna te queochátsfsana íñeshoye; choca endëprontana Satanás y chabe ustonëngbiama.

42 Er atše shěntseca sěnjánana y tšëngaftanga saná ndoñe chešmatancaredadó; šonjanajuendá y ndoñe chešmatanafsé;

43 inye luarocana ashjanganacá sěnjánana y ndoñe posada chešmatanántšame. Enašá sěnjánana y ndoñe entšayá chešmatanětsetá; šocá sěnjanjájona y cárceloca sěnjanětámena y ndoñe chešmatanatsětsá ca.’

44 “As chënga mochanjatjaye: ‘Bëngbe Utabná, ¿ntseco tcběnjáninye shěntseca o uajuendayá, o inye luarocana ashjanganacá, o enašá, o šocá o cárceloca utamená y ndoñe tcběnjanajabuache ca?’

45 “Y chë Utabná echanjójua: ‘Ndegombre cběyana, tšëngaftanga ntšamo chë atšbe catšátanguentsana chë más batšá uámanëngaftaca, ndoñe šmonjanmcá, átšeftaca cach ndoñe chešmátanma ca.’

46 “Chëngna infierno ye nyetsca tescama mochantsěsetjango, y chë Bëngbe Bětsá chabe bominyiñe tšábenga tojábiamëngna chë nyetsca tescama yomna tšabe vida mochántsebomna ca” —Jesús tojánayana.

26

Entšanga tmojanjuabó ntšamo jaměse Jesús jishachama

(Mc 14.1-2; Lc 22.1-2; Jn 11.45-53)

¹ Lempe chca tojánayanentšana, Jesús chabe uat-sjédayěnga tojanéyana:

² “Tšəngaftanga šmondětatsəmbo, uta te y chě Bashco fiesta echántsemna y Bəngbe Bětsá Entšá tbojanbemá ínŷengbe cucuatšinė mochanjáboshjona chamocrucificama ca.” Chě fiesta inamna jtenójuaboyama Bəngbe Bětsá chě judiəngbe běts taitanga Egiptocana tojánatsebacama.

³ Chěntscuana, chě bachnangbe aměndayěnga y chě judiəngbeñe bětsějeməngcá mándayěnga tmojánenefjna, Caifás, chě bachnangbe más uámana aměndayabe běts yebnentše.

⁴ Tmojanenojuabó y tmojanenoyeuná jtseíngñase Jesús jishachama, y jtsóbama.

⁵ Pero imojtsichamo: “Quem fiestəntscuana ndoñe, entšanga yapa muanjontša enbouenanana ca.”

Canŷe shembása botamana uanguětše bėjaye Jesusbe bestšašinė tbojanbuešcja

(Mc 14.3-9; Jn 12.1-8)

⁶ Jesús Betania pueblentše yojtsemna, Simón chě bacna nguayanánaca šocá ca uabobuatmabe yebnentše.

⁷ Chëntscuana canÿe shembása Jesúsbioye tojanabeconá. Chë shembásana tojanamba canÿe alabastro jarrëtema, jútjena canÿe puerte uámana botamana uanguëtse bėjayeca. Jesús mesëshentse yojtsemnëntscuana, chë shembása chabe bestšašiñe chë botamana uanguëtse bėjaye tbojanbuešcja.

⁸ Chë uatsjëndayënga chca tmojáninÿe orna, tmojanotjayaná y tmojanontsé ichámuana: —¿Ndáyeca nÿe bonamente chë soye chca yojtsemna ca?

⁹ Chamna, matmënjobenanga chë bėjaye becá crocenánama juiyana y chánaca ndbomnjëmënga matmënjújabuache ca.

¹⁰ Jesús chë soye tojanuena; as tojanëyana: —¿Ndáyeca ndoñe cachcá quem shembása šmochanjonyaye ca? Ntšamo tonjamcá tšabá entsemna.

¹¹ Er chë ndbomnjëmëngna nÿets tempo tšëngaftangbeñe mochanjëftsemna, pero atše tšëngaftangaftaca ndoñe nÿets tempo quicháisemna.

¹² Ntšamo chë shembása tojamcá, chë botamana uanguëtse bėjaye atšbe cuerpiñe jabuéšcjëse, cha šontsepróna atše juatbontsa tescama.

¹³ Ndegombre cbëyana, quem luariñe ndayéntšnaca Bëngbe Bëtsabe soyëngama chamojtsabuayiyná chentše, ntšamo quem shembása tojamánaca becá mochanjëftsóyebuambaye, chca, entšanga chabiama chamotsenójuabnama ca — Jesús tojanëyana.

*Judas tojána bachnangbe amëndayëngbioye, Jesús chamuishachama
(Mc 14.10-11; Lc 22.3-6)*

14 Canya chë bnětsana uta uatsjendayěnguentśá, Judas Iscariote ca uabainá, tojána bachnangbe aměndayěngaftaca jencuéntama.

15 Y tojanatjá: “¿Ntsachetśá šmatjtabuénaye y Jesús tšěngaftangbe cucuatśiñe cboch-jayentśbashejuana ca?”

As chěngna, unga bnětsana ralbenga tmojtanabuená.

16 Y cach orscana Judas yojtsenguaye ntśámose y ntseco ora, Jesús chěngbe cucuatśiñe jayentśbáshejuanama.

Jesús chabe uatsjéndayěngaftaca Bashco saná tojanse

(Mc 14.12-25; Lc 22.7-23; Jn 13.21-30; 1 Co 11.23-26)

17 Chë Bashco fiesta bojatśenté, chë levadúraca nděpormana tanděše jasama fiestěntscuana, chë uatsjéndayěnga Jesúsbioye tmojanobeconá y tmojantjá: —¿Nděmoca aca cojtseboše běnga fchaiprontama Bashco saná chacosama ca?

18 Y Jesús tojaněyana: —Chë běts puebloye mot-sajna canye bacobe yebnoye y cha šmochjauyana: “Buatěmbayá tonjayana: ‘Atśbe ora ya echan-jobuache, y atśe acbe yebnoye sěntsá, Bashco fiesta jamama atśbe uatsjéndayěngaftaca ca.’ ”

19 As chë uatsjéndayěnga tmojanma ntśamo Jesús tojanaměndacá y chë Bashco fiesta saná tmojan-prontá.

20 Y tojanibétata orna, Jesús chë bnětsana uta uatsjéndayěngaftaca mesěshentśe yojtsemna.

21 Y imojtsesantscuana, Jesús tojaněyana: — Ndegombre cběyana, canya tšəngaftanguentsá uayayəngbe cucuatšine šochanjáboshjona ca.

22 Chora chě uatsjəndayənga puerte ngménaca imojtsemna y tmojanontšé canyánya Jesús jat-jayama: —Bəngbe Útabná, ¿nderado atše cha chtsemna ca?

23 As Jesús tojanějua: —Canya nda chabe tanděse entsefchecuacná cach atše səntsefchecuacná šcnenentše, cha uayayəngbe cucuatšine šochanjáboshjona.

24 Ndegombre, Bəngbe Bětsá Entšá tbo-janbemáftaca echanjopása ntšamo Bəngbe Bětsabe uabemana palabrenguiñe chabiamá iuayancá; pero, itša lastema chě bochjáboshjonabiamá! Más tšabá chabiamá manjamna ndoñe ntjónyñana ca.

25 As Judas, chě boshjuaná, Jesúsbioye tbojantjá: —Buatəmbayá, ¿nderado atše chtsemna ca?

Y Jesús tbojanjuá: —Ndegombre tcjayana ca.

26 Imojtsesantscuana, Jesús tanděse tojanca, Bəngbe Bětsábioye chama tbojtanchuá, tojanjatá y chě uatsjəndayənga tojanatšatá. Y mēntšá tojánayana: “Mocñənga, mosənga. Atšbe cuerpo entsemna ca.”

27 Chentšana, canye coptema vínoyeca tojanaca, Bəngbe Bětsábioye tbojtanchuá y chě uatsjəndayənga tojaněšasé. Y mēntšá tojánayana: “Nyətscanga quem coptémentšana mofšenga.

28 Quem vínoy atšbe buiñe entsemna. Atšbe buiñe echanjuábuashana entšanga chamotsetatšəmbuama ntšamo Bəngbe Bětsá entšanga tojanašebuachenacá aíñe yochjochnənguama. Chě buiñe bətscá entšangbiamá echanjuábuashana,

chëngbe bacna soyëngama perdonánënga chamotsemnama.

²⁹ Y ndegombre cbëyana, morscana atše ya ndoñe más chë uvasentsana obocniye quichaisofsiye. Chë tsëm vínoye tsëngaftangaftaca chanjofsiye, atšbe Taitabe amëndayoca chamojtsemna ora ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama

(Mc 14.26-31; Lc 22.31-34; Jn 13.36-38)

³⁰ Bëngbe Bëtsá jëtschuayama tmojancantá chentsana, Olivos tjashoye tmojëftsanbocana.

³¹ Choca Jesús tojanëyana: —Tšëngaftanga nyëtscanga quem ibeta átšbeñe ošbuáchiyana šmochantsobuetše y šmochántasacheta, er Bëngbe Bëtsabe uabemana palabrënguiñe, cha mëntšá tojánayana: “Chë oveshëngbe abujënña chanjóba y chë oveshënga mochantsáshana ca.” Chca tsëngaftangaftaca echanjopása, uayayënga chašmojishache ora.

³² Pero obanënguentšana chaitayenentšana, tsëngaftangbe natsana Galileoye chanjá ca —cha tojanëyana.

³³ Chora Pedro tbojanjuá: —Masque nyëtscanga ácbeñe ošbuáchiyana chamotsobuetše y chamotsacheta, ntšamo ácaftaca yochjopása causa, atše ndocna te ca.

³⁴ As Jesús tbojanayana: —Ndegombre cbëyana, cam ibeta, ngallo cabá ndëcánta ora, aca unga soye cochanjayana ndoñe šconduabuatma ca.

35 Pero Pedro tbojaniyana: –Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nÿetsca uatsjéndayëngnaca cachcá imojtsichamo.

Getsemaní luarentše Jesús Bëngbe Bëtsáftaca tbojanencuentá

(Mc 14.32-42; Lc 22.39-46)

36 Chentšana, Jesús chabe uatsjéndayëngaftaca canÿe luare Getsemaní ca uabáinoye tojána. Choca tojanëyana: “Muentše motbiama, chëntscuana atše choye chanjá Bëngbe Bëtsáftaca jencuéntama ca.”

37 Y Pedro y chë Zebedeobe uta uaquiñata tojëftsanëbiatše. Choca yojóntša puerte ngménaca y corente cochtsetšenaná jtsemnama.

38 Jesús tojanëyana: “Atšbe ainana puerte ngménaca entsemna, mo jobanamcá. Muentše moquedanga y átšeftaca šmochtsefšna ca.”

39 Chora Jesús más natsanoye tojána, tojanoshamentšé y fshantsóntscoca yojotsejbéna, y mëntšá Bëngbe Bëtsáftaca tbojanencuentá: “Atšbe Taitá, jopódianëse moma atše japadésama ndoñe chašondëtsemnama. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

40 Chentšana, Jesús chabe unga uatsjéndayëngbioye tojtanabo y chëngna imnétsomañe. Chca tojánanÿena ora, Pédrëbioye tbojaniyana: “¿Ni mo canÿe horatema tšëngaftanga šmonjobená átšeftaca jtsefšnana ca?”

41 Smochtsefšna y Bëngbe Bëtsáftaca šmochtsencuéntaye, chca, bacna soye jamama

ndoñe chacmondócochënguama. Tšëngaftanga ndegombre šmontseboše espírituca Bëngbe Bëtsá joyeunayama, pero cuerpiñe añemo ndoñe quešmátsbomna ca” —Jesús tojanéyana.

⁴² Uta soyama tojtesaná y mëntsá Bëngbe Bëtsáftaca tbojanencuentá: “Atšbe Taitá, atše japadésama ndoñe chašondëtsemnama jamama ndoñe jopódianësna, nÿe ntšamo aca cojtsebošcá chaotsemna ca.”

⁴³ Y tojtano ora, chë uatsjëndayënga cachiñe imnëtsomañe; yapa ocñaye causa nÿe imojtsefshëtana.

⁴⁴ As Jesús cachcá yojëftsënÿaye, y ungama cachiñe tojtesaná Bëngbe Bëtsáftaca jencuëntama, y cach palabrenga tojánayana.

⁴⁵ Chora chë uatsjëndayëngbioye tojtano y tojanéyana: “¿Cabá šmotsomañe y šmotsochñañe ca? Ya ora tocjobuache, Bëngbe Bëtsá Entšá tbojanbemá bacna soye amëngbe cucuatšña mochanjáboshjona.

⁴⁶ Motsbananga, cuajna. Minÿënga, chë boshjuaná ya entsebeconá ca.”

*Uayayënga Jesús tmojánishache
(Mc 14.43-50; Lc 22.47-53; Jn 18.2-11)*

⁴⁷ Jesús cabá yojtsóyebuambnantscuana, Judas, canÿe chë bnëtsana uta uatsjëndayënguentšá, tojánashjango, y cháftaca imojtsemna ba entšanga espadëjangaca y ngarotbéngaca prontánënga. Chënga imojamna chë bachnangbe amëndayënga y chë judiëngbeñe bëtsëjemëngcá amëndayëngbe ichmónënga.

⁴⁸ Judas, chë boshjuaná, tojanjuabó ntšamo jamana entšanga jinŷanŷiyama ndëmua Jesús bétsemnana. Chíyeca yojáuyana: “Nda chajiauámocho, cha echántsemna. Smochjishache ca.”

⁴⁹ Cachora Judas Jesúsbioye tojanobeconá y tbojanchuá: —Buajtana, Buatëmbayá ca.

Y tbojtanámocho.

⁵⁰ Jesús tbojaniyana: —Enutá, moma chë ndayá jabomama tcojabo ca.

Chorna, chë entšanga tmojanobeconá, Jesús tmojánishache y tmojanánatse.

⁵¹ Chca orna, canŷe enutá Jesúsëftaca yojtsemná, chabe espadéja tojanenosëngbotëntšena, y chë bachnangbe más uámana amëndayabe oservenábioye canŷe matscuaše tbojtsanëštjango.

⁵² As Jesús tbojaniyana: “Espadéja matosëngbuajonŷá. Nda espadéjaca tbojóba chana, cach espadéjaca echanjóbana.

⁵³ ¿Aca ndoñe condëtatsëmbo, atše atšbe Taitábioye stjaimpádase, cha cachora atšbiana nanjichamuá bnëtsana utama más ejércitënga angelotëmëngaca?

⁵⁴ Pero chcasna, ¿ndayá Bëngbe Bëtsabe uabemana palabrënguiñe endayancá ntšamo nanjochnëngo? Chiñe endayana ntšamo entsopasancá jochnënguama canmëna ca.”

⁵⁵ Cachora Jesús entšanga tojanatjá: “¿Ndáyeca šmojabo espadéjangaca y ngarotbéngaca atše jishachama, mo atše canŷe bacá uamana entšá cuaftsemncá ca? Atše cada te Bëngbe Bëtsabe bëts yebnoca tšëngaftangaftaca sënjántbemana abuatambaye, y choca ndoñe chešmátanishache.

⁵⁶ Pero lempe quem soyënga chca entsopasana, cachcá chaotsemnama ntšamo Bëngbe Bëtsabe uabemana palabrenguiñe chë Bëngbe Bëtsabe juabna oyebuambnayënga tmojanayancá ca” —Jesús tojánayana.

Cachora nÿetsca uatsjëndayënga tmojt-sanëuatjaná y tmojtsanacheta, y Jesús chë uayayëngaftaca cachcá tmojesanonÿá.

Jesús tmojanánatse chë judiëngbe más uámana amëndayëngbioye

(Mc 14.53-65; Lc 22.54-55, 63-71; Jn 18.12-14, 19-24)

⁵⁷ Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentše chë ley abuátambayënga y chë judiëngbeñe bëtsëjemëngcá amëndayënga tmojánenefjna.

⁵⁸ Pedro bënocana Jesús tbojanasto, chë bachnangbe más uámana amëndayabe chashjóntsoñe; choye tojánamashëngo y chë Bëngbe Bëtsabe bëts yebnocá josticiëngaftaca yojótbema, chca, jtsetatšëmbuama ntšamo yochjopásama.

⁵⁹ Chë bachnangbe amëndayënga, chë bëtsëjemëngcá amëndayënga y ínÿënga judiëngbe amëndayënga imojtsenguaye ndánaca masque uayátsenaye soye Jesusbe contra cháuyanama, as chënga jobenayama cha chaóbana ca jayanama,

⁶⁰ pero ndoñe tmonjáninÿena, masque banga tmojánashjajna Jesusbe contra uayátsenaye soyënga jayanama. Cabana, útata tbojánashjango,

61 y chata tbojánayana: “Quem boyabása tonjayana canobena Bëngbe Bëtsabe bëts yebna jt-senásatajchcana y nÿe unga tese jtëtsjebuana ca.”

62 As chë bachnangbe más uámana amëndayá tojantsá y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

63 Pero Jesús nÿe iytëca yojtsemna. Chíyeca chë bachnangbe más uámana amëndayá tbojanियana: —Bëngbe Bëtsá Ainabe mándoca cbomandá chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

64 Chora Jesús tbojanjuá: —Aca ndegombre yomncá tcjayana. Y quem sóynaca cbëyana: Tšëngaftanga šmochanjinÿe, atše, Bëngbe Bëtsá Entšá tbojanbemá, chë nÿets obenana bomnabe catšbioica jtsetbemanana y celoca jantšetëshiñe jtsaboyana ca.

65 Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¡Ntšamo quem boyabása tonjoyebuambacá, Bëngbe Bëtsabiama entsemna mo cha cuafjoyenguangá, chë chabe Uaquiñá yomna ca cha tonjayana ora! ¿Ndayama más entšanga šochjátëjamoto Jesusbe contra chamuayanama?

66 ¿Ntšamo šmatjayana ca? —cha tojanatjá.

As chë entšanga tmojanjuá: —Ndegombre cha bëts bacna soye entsebmna; jóbanama bontsemna ca.

67 Chora tmojanontsé Jesús juebëbuashëtjnayana, jabuache jantšetayana y ínÿengna imojtsejuëbjantšetaye,

68 y imojtsatsëtsnaye: “Cristo, aca ndegombre Bëngbe Bëtsabe juabna oyebuambnayá tcomnëse, jmomalisiá nda tcmënjajantsetá ca!”

Pedro tojánayana Jesúsbiøye ndoñe bonjanabuátma ca

(Mc 14.66-72; Lc 22.55-62; Jn 18.16-18, 25-27)

69 Chëntscuana Pédrëna shjoca yojtsemna, chashjoca yojtsetbemana. Chora, canÿe shembása chentša oservená tbojanobobconá y tbojaniyana: —Acnaca, Jesús chë Galileocáftaca conjánana ca.

70 Pero Pédrëna, nÿetscangbe delante tojánayana chábioye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnátësertana ca.

71 Chora Pedro bëšoye yojábocna. Chentšna, inÿe shembása oservená chábioye tbojáninÿe y chë inÿe entšanga tojanëyana: —Cha, Jesús chë Nazaretocáftaca enjánana ca.

72 Pedro cachiñe tojánayana ndoñe bonjanabuátma ca, y mëntšá yojtsejúrayer: —¡Chë boyabása ndoñe quetsatabuatma ca!

73 Chentšana, chë chentše imojtsemnënga Pédrëbioye tmojanobobconá y tmojaniyana: —Ndegombre, ácnaca chë uatsjendayënguentsá condmëna. Chë contsoyebuambnacá contsoyátëmbana ca.

74 Chora Pedro tojanontsé ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúrayer y yojtsichamo: —¡Chë boyabása ndoñe quetsatabuatma ca!

Y cachora canÿe ngallo yojacánta.

⁷⁵ Y Pedro yojenójuaboye ntšamo Jesús tbojaniyanama. Cha mēntšá tbojaniyana: “Cabá ngallo ndēcánta ora, aca unga soye cochanjayana ndoñe šconduabuatma ca.” Y chentšana tojésanbocna y corente ngménaca yojtsenóbošachna.

27

*Jesús, Pilátbioye tmojanánatse
(Mc 15.1; Lc 23.1; Jn 18.28-32)*

¹ Tojanbinýna ora, nyetsca chē bachnangbe amēndayēnga y judiēngbeñe bētsējemēngcá amēndayēnga tmojánenefjna jenóyeunayama ntšamo jamēse Jesús chaóbanama.

² As, Jesús tmojanēcuébatsēca y tmojanánatse, y chca, Pilato, chē Judeoca Romano mandadbe cucuatšíñe tmojánboshjona.

Ntšamo Judas tojanóbana

³ Judas, chē boshjuaná, Jesús jóbanama ibojtsemnama tojanuena ora, puerte yojtsenócochinýena ntšamo tojánchjanguama, y chē unga bnétsana ralbenga chē bachnangbe amēndayēnga y bētsējemēngbioye tojtanamba,

⁴ y mēntšá tojanéyana: —Puerte bacna soye tijama. Atše canýe bacna soye ndbomná tšēngaftangbe cucuatšíñe tijáboshjona chaóbanama ca.

Pero chēnga tmojanjuá: —¿Chē soye ndayá bēngbiama? Cach aca cochátotatšēmbñe ca.

⁵ As Judas chē ralbenga Bēngbe Bētsabe bēts yebnentše yojesētšana, y yojá y yojétsentsešaye.

6 Chë bachnangbe amëndayëngna chë ralbenga tmojtanatbaná y tmojánayana: —Quem crocenánama buiñe echanjuábuashana; ntšamo leyiñe endayancá, bënga ndoñe quemuátobena chë Bëngbe Bëtsabiama soyënga quëcjnyëtémiñe chana jasegórana ca.

7 Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámiyana, y chca, canye luare jtsebomnama ndayentše chë inye luarëngocana entšanga áshjajnënga jutabuantsama.

8 Chiyeca, chë fshantse mëntscoñama Buiñe Luare ca iuabaina.

9 Chca, tojanochnëngo ntšamo Jeremías, chë Bëngbe Bëtsabe juabna oyebuambnáyá, tempscá tojanayancá, ndayá yochjanchnënguama. Chana mëntsá tojánayana: “Y chë unga bnëtsana ralbenga tmonjanca, ntsachetšá chë Israeloca entšanga cha tmojanamananacá,

10 y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

Jesús Pilatbe delante

(Mc 15.2-5; Lc 23.2-5; Jn 18.33-38)

11 Chentšana Jesús, chë mandado Pilátbioye tmojanánatse y cha mëntsá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

12 Chë bachnangbe amëndayënga y chë bëtsëjëmënga Jesús mal imojtsequédantscuana, cha ndocá ntjojuana.

13 Chíyeca Pilato tbojantjá: —¿Ndoñe contsunana lempe ntšamo acbe contra montsichamcá ca?

14 Pero Jesús ni canye palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

Jesús chaóbana ca tmojánayana
(Mc 15.6-20; Lc 23.13-25; Jn 18.38-19.16)

15 Bashco fiesta ora, chë mandado yojanamana canye utamená jëtsboshjonana, nda entšanga tmojuabuayaná.

16 Chë tempo canye uachuana utamená inamna, Jesús Barrabás ca uabainá.

17 Njëtsca entšanga chentše imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabobuatmá ca?”

18 Er chë mandado yojtsetátšëmbo, entšangna envidia causa Jesús chabe cucuatšëne tmojãnboshjonama.

19 Pilato chë tribunal ca uabáinentše yojtsetbe-manëntscuana, chabe shema canya tbojanichmó mëntšá cha jauyanama: “Chë njëtsca soyënguiñe tšabá ama entšábioye ndocá matsborlánana; chabe causa ibeta otjénayoca puerte sënjasufrí ca.”

20 Pero chë bachnangbe amëndayënga y chë bëtsëjëmënga entšanga tmojanayëñjaná, Barrabás jëtsboshjonama y Jesús chaóbana ca chamuayanama.

21 Chora chë mandado cachiñe tojanatjá: —¿Chë útatentšana nda šmojtseboše atše chjëtsboshjonama ca?

Y chënga tmojánayana: —¡Barrabás ca!

22 Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nÿetscanga tmojanjuá: —¡Motsecrucificá ca!

23 Chora Pilato tojtëtanatjá: —¿Ndáyeca? ¿Ntsámo cha tojobuachjanguá ca?

Pero chënga cachiñe tmojanáyebuachena: — ¡Motsecrucificá ca!

24 Ndocá jamama yontsobenama y entsanga más jabuache enbouenanama tmojanontšema Pilato tojáninÿe ora, cha tojanmandá búyeshe juabuíyëboñana y nÿetscangbe delante yojtsenacuentšabiá. Mëntsá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe šmonjama ca.

25 Chora nÿetsca entsanga tmojanjuá: —¡Quemuá yochjóbanama, bënga y bëngbe básengbiama castigo chaotsemna ca!

26 As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entsangbe cucuatšične tbojánboshjona chamocrucificama.

27 Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nÿetsca soldadënga chabe shëconana tmojanófoto.

28 Chorna, entsáyá tmojtsanabotsca y shbuenda uafjatsenga entsáyá mo reycá tmojanichëtjo.

29 Canÿe coronësha tmojanapormá uchmašëfjangaca y tmojanabestšajó, y catšbioica cucuatšične canÿe niñëfja. Chorna, chabe shecuatšëntše imojtsofshëntsaméntšenaye y imojtsáboyejuana. Mëntsá imojtsichamo: “¡Bayté judiëngbe Rey cochtsemna ca!”

30 Chëngnaca imojtsanbuashëtjnaye y cach niñëfjaca bestšašentše imojtsëtsjanjnaye.

31 Y chca imnaftsáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y chora, jacrucificama tmojanánatse.

Jesús tmojancrucificá

(Mc 15.21-32; Lc 23.26-43; Jn 19.17-27)

32 Chë entšanga chentšana tmojánbocana ora, tmojánenbetše canye bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetsocutsama.

33 Canye luare Gólgota ca uabáinoca tmojánashjajna ora (hebreo biyañe chca endayana “Obanabe Bestšashe Luare ca”),

34 Jesúsbioye vínoye hiéloyeca enájuaabniye tmojanabuiyé chaofšema; pero yojaftántia y ndoñe yonjábošena chiye jofšiyama.

35 Ya tmojancrucificá orna, chë soldadënga Jesusbe entšayamna, tsbanánoye tmojanëtšena, chca, jtsetatšëmbuama ndabiama yochjanáquedama.

36 Y chora chënga chentše tmojanotbiama Jesús jtsebojanýama.

37 Y chabe bestšaše juatsboicna canye uabemana soye tmojananjo. Chiñe yojétsayana ndáyeca cha tmojancrucificama, mëntšá: MUA JESÚS ENDMËNA, CHË JUDIËNGBE REY ca.

38 Utata bacna soye ochjajnayátnaca chënga chentše tmojanacrucificá, canya Jesusbe catšbioica y chë ínýana chabe uañicuayoica.

39 Y chëjana imojtsachnëjuana entšangna, Jesús imojtsóyenguaye, imojtsobestšfshanenaye

40 y imojtsatsaye: “¡Aca chë icobena Bëngbe Bëtsabe bëts yebna jtsenásatajchcana y nÿe unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

41 Chë bachnangbe amëndayënga, ley abuatambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntsá imojtsichamo:

42 “Cha ínÿenga tojëftsatsebacá, pero cachá jéntsbecama ndoñe quenátobena. Cha Israeloca entšangbe Rey tojtsemnëse, chë cruzocana chauatastjango, y chca, bënga chábeñe fchtsošbuáchiye.

43 Cha tojayana Bëngbe Bëtsábeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánëse!, er cha tonjánayana Bëngbe Bëtsabe Uaquiñá canmëna ca” –chënga imojtsichamo.

44 Y chë bacna soye ochjajnayata, Jesúsëftaca ibojtsecrucificanátnaca cachcá ibojtsóyenguaye.

Jesús tojanóbana

(Mc 15.33-41; Lc 23.44-49; Jn 19.28-30)

45 Nÿetsto orscana las tresëntscoñe, nÿets quem luare yojtseibétata.

46 Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonÿá ca?”)

47 Chca tmojanuena ora, báseftanga chentše imojtsemna entsanguentsana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

48 As chora, chentša canya tojéftsánótjajo canye esponjéshe janguanguama, untja vínoyeca chéshe tojanfchecuacuá, canye niñefjiñe tojananguésétjo y Jesúsbioye tojanbeconá chaofšema.

49 Pero ínýengna tmojánayana: “Cachcá mochjonýaye, er Elías tayochjabo jabátsbocama ca.”

50 Pero Jesús cachiñe jabuache tojanoyó y tojanóbana.

51 Y cachora, Bëngbe Bëngbe Bëtsabe bëts yebnoca yojújonýana entséjua tséntsaca yojtsenájataye, tsbanánocana fshantsoye. Chëjua bënëjua inauamna y chë tsatséntsaca inaújonýana. Fshantse yojuangmémama, ndëtsbenga yojtsashtëtšana,

52 y chë cuevëshënga obanëngaca yojtsëtëfjo y banga Bëngbe Bëtsabe entsanga tmojtanayena.

53 Y chënga, Jesús tojtanayenentsana, chë cuevëshënguentsana tmojánbocana, y Jerusalén, chë uámana bëts pueblo ca uabáinoye tmojánamashjna y ba entsángbioye tmojánebëbuacana.

54 Chë soldadëngbe amëndayá y chë ínýenga, Jesús jtsebojanýama cháftaca tmojanoquedanga, chë fshantse yojuangmémamana tmojáninýe ora, y nyetsca chë yojtsëchnëjuana soyëngama, puerte auatjanánënga imojtsemna y tmojánayana: “¡Ndegombre quem boyabása Bëngbe Bëtsabe Uaquiñá yomna ca!”

⁵⁵ Ba shembásengnaca chentše imojtsemna y bënocana imojtserreparana. Chëngna, Galileocana Jesús tmojanasto y cha imojanájabuachana.

⁵⁶ Chë shembásengbeñe imojtsemna María Magdalena; María, Santiago y Josebe mamá; y Zebedeobe uaqüñatbe mamá.

Jesús tmojanatbontsá

(Mc 15.42-47; Lc 23.50-56; Jn 19.38-42)

⁵⁷ Ya yojtseibétatana ora, canye bomna boyabása, José ca uabainá, tojánashjango. Cha inamna Arimatea luarocá y Jesusbe ustoná.

⁵⁸ José tojána Pilato jinýama, Jesusbe cuerpo jotjañama. As Pilato tojanmandá chë cuerpo chamontšabuáchema.

⁵⁹ José chë cuerpo tojanca y canye nduatsenga lino entsëjuaca tbojanandmaná.

⁶⁰ Y canye chabe tsëm cuevëshiñe tbojanajó. Tempo cha inamánda chë cuevëshna ndëtsbenguiñe chamopormama. Canye bëts ndëtsbé tojansjoná y chë cuevëshoye amashjuanentše tojánachto; y chentšana José yojtsatoñe.

⁶¹ Pero María Magdalena y chë inýe Mariyna chentše tbojtsanoquedañe y chë cuevëshe ndirichiñe tbojanótbema.

Soldadënga tmojána Jesús yojtsatbontsánentše jtsebojanýama

⁶² Yëfsana, chë ochnayté, chë bachnangbe amëndayënga y chë fariseunga cánýiñe tmojána Pilato jinýama.

⁶³ Tmojanianya: –Taita, bēnga fsēntsejuabná ntšamo chē bostero cabá ainá ora tonjánayanama, chē unga tianoye cha jtayenama ca.

⁶⁴ Chiyeca, momandá chē cuevēshe soldadēnga chamotsashanjá unga tentscuana. Chca, chabe uatsjēndayēnga ndoñe ibeta chamondabo chabe cuerpo jabétsatbēbama, y chentšana chēnga entšanga chamúyana, Jesús tojtayena ca. Y chca, chabiana quem ústonoye bostero soye, chē cachabiana tojánayana soyēngama puerte más bacá nántsemna ca –chēnga tmojanianya.

⁶⁵ As Pilato tojanēyana: –Tšēngaftanga cach tšēngaftangbiana soldadēnga šmondábamna. Mot-sajna y chē cuevēshe cuedádoca šmochtsashanjá, ntšamo šmondētatsēmbcá ca.

⁶⁶ Chora chēnga tmojána chē cuevēshe jtsashanjáma; chē ndētsbena, tsengájašeca imojuinñaná, ntsotatsēmbcá ndocná choye chaondámashēnguama, y soldadēnga chentše tmojēftsanashejuana.

28

Jesús tojtayanena

(Mc 16.1-8; Lc 24.1-12; Jn 20.1-10)

¹ Ochnayté chentšana, chē inye semana bo-jatšenté yojtsebínýana ora, María Magdalena y chē inye María tbojána cuevēshoye jarrepárama.

² Ndeolpe fshantse tojanangmēmama, er Bēngbe Bētsabe canye ángel celocana tojántasma, chē cuevēshoye tojanobeconá, chē atamiana ndētsbé tojtsanjuaná y chiñe tojanótbema.

3 Chë ángelna mo canye tcuinjëjca yojtsebuashinÿina, y chabe uichëtjonëjuangá uafjantsëjuangá mo jantsetëshcá yojtsamna.

4 Chë soldadënga chca tmojáninÿe ora, de auatja yojtsangmëmnye y mo obanëngcá imojtsemna.

5 Chora chë ángel chë shembásatbioye tojanëyana: “Ndoñe batauatjana. Atse sëntsetatsëmbo tšëngaftanga Jesús, chë tmonjancrucificá cha šmojtsenguama.

6 Cha muentše ndoñe quenátsmëna; cha tontayena, ntšamo cachá tonjanayancá. Mabata y šochjinÿe cha endétsesegoranentše.

7 Betsco motsata y chë uatsjëndayënga šochjáuyana: ‘Jesús tontayena y tšëngaftangbe natsana Galileoye echanjá; choca šmochanjinÿe ca.’ ” Y chora cha tojánayana: “Chca šondmëna tšëngaftanga jauyanana ca.”

8 Cachora chë shembásata chë cuevëshentšana tbojésanbocna, auatjanánata pero puerta oyejuayata, y tbojëftsannotjajo chë soye chë uatsjendayëngbeñe jobuambayama.

9 Y ndeolpe Jesús chata tojánëbëbuacna y tojanacheuá. Chatna, chábioye tbojanobéconata, tbojtanadorata y chabe shecuatše shëconana imojtobojcjuá.

10 Y Jesús tojanëyana: “Ndoñe batauatjana. Motsata atšbe uatsjëndayënga, atšbe catšátanga jáuyanama Galileoye chamotsá y choca atše šmochjinÿe ca.”

Ntšamo chë soldadënga tmojánayana ndayá tojanochnënguama

11 Chë shembásata ibojsayëntsjuana, básefta soldadënga chë bëts puebloye tmojána y ntšamo tojanopasacá lempe chë bachnangbe amëndayëngbeñe tmojanobuambá.

12 As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenefjna jenóyeunayama. Chëngna chë soldadëngbioye bëtscá crocénana tmojtanatšatá,

13 y mëntšá tmojanabuayená: “Tšëngaftanga šmochjayana, ibeta šmotsomáñëntsjuana, Jesusbe uatsjëndayënga tmojabo y chabe cuerpo tmojabétsatbëba ca.

14 Y chë mandado chë soyama chaojátatsëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” —chënga tmojanéyana.

15 As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y mëntscoñama judiënga cachcá mondbétsichamo.

Jesús chë uatsjëndayënga tojanichamó, Bëngbe Bëtsabe soyëngama nyëtsquénache jábuayenama (Mc 16.14-18; Lc 24.36-49; Jn 20.19-23)

16 Chentšana, chë bnëtsana canye uatsjëndayënga Galileoye tmojána, chë ndëmua tjoye Jesús chënga tojanabuayená choye.

17 Y Jesús tmojáninye ora, tmojtanadorá. Pero báseftangna imojétsejuabnaye nderado cha ndoñe Jesús yontsemna ca.

¹⁸ Jesús chëngbioye tojanobeconá y tojanëyana: “Bëngbe Bëtsá nÿets mando atše šonjatšetá celoca y quem luarentše.

¹⁹ Chcasna, motsajna, nÿets luarënguenache oyenënga atšbe uatsjëndayënga šmochjábiana. Entšanga šmochjubaye atšbe Taitá, atše chabe Uaquiñá y chë Uámana Espíritbe uabaina jayanëse, átšbeñe šmošbuachéyeca,

²⁰ y šmochjabuatambá lempe ntšamo atše tchojamëndacá chënga chamóyeunama. Y ndegombre atše nÿets tempo tšëngaftangaftaca chanjëftsemna, quem luare jopochócantscuana ca” —Jesús tojanëyana.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
19104c0e-9046-5ff3-82fb-eb838c88dcf9